

INTERNACIONALNI UNIVERZITET U SARAJEVU

INTERNATIONAL UNIVERSITY OF SARAJEVO

Broj: IUS-SENAT-11-3326/24

Sarajevo, 22.10.2024. godine

S T A T U T

INTERNACIONALNOG UNIVERZITETA U SARAJEVU

Prečišćen tekst

Sadržaj

DIO PRVI - UVODNE ODREDBE	7
DIO DRUGI – PRISTUP VISOKOM OBRAZOVANJU I CILJEVI UNIVERZITETA	11
DIO TREĆI - PRAVA I OBAVEZE UNIVERZITETA	12
DIO ČETVRTI - DJELATNOST I ORGANIZACIJA UNIVERZITETA	13
DIO PETI - TIJELA UNIVERZITETA	18
POGLAVLJE I - UPRAVNI ODBOR	19
POGLAVLJE II - SENAT	20
POGLAVLJE III – REKTOR	23
POGLAVLJE IV - PROREKTORI	27
POGLAVLJE V – SEKRETARIJAT I DRUGA STRUČNA I SAVJETODAVNA TIJELA	28
DIO ŠESTI - TIJELA I NADLEŽNOSTI FAKULTETA	30
POGLAVLJE I - VIJEĆE FAKULTETA	31
POGLAVLJE II – DEKAN	33
POGLAVLJE III – PRODEKANI	36
POGLAVLJE IV - DEKANSKI KOLEGIJ	37
POGLAVLJE V - VIJEĆE POSTDIPLOMSKOG STUDIJA	38
POGLAVLJE VI - VIJEĆE STUDIJSKOG PROGRAMA	38
POGLAVLJE VII - NAUČNO VIJEĆE INSTITUTA	39
POGLAVLJE VIII - INTERNACIONALNI UNIVERZITET U SARAJEVU - CENTAR ZA CJELOŽIVOTNO UČENJE IUS LIFE	39
DIO SEDMI - ORGANIZOVANJE I IZVOĐENJE STUDIJSKIH PROGRAMA	40
POGLAVLJE I - POKRETANJE STUDIJA	40
POGLAVLJE II - ORGANIZACIJA I IZVOĐENJE NASTAVE	43

POGLAVLJE III - INFO KATALOG I REGISTAR STUDIJSKIH PROGRAMA	44
DIO OSMI – UPISI I STJECANJE STATUSA STUDENTA	44
POGLAVLJE I – KONKURS ZA UPIS	44
POGLAVLJE II - ŠKOLA ENGLESKOG JEZIKA – ELS (ENGLISH LANGUAGE SCHOOL)	52
POGLAVLJE III - PRAVA I OBAVEZE STUDENATA	52
DIO DEVETI - SISTEM OSIGURANJA KVALITETA	54
DIO DESETI - IZBOR U AKADEMSKA ZVANJA	55
POGLAVLJE I – AKADEMSKA ZVANJA I PERIOD IZBORA	55
POGLAVLJE II - USLOVI ZA IZBOR U AKADEMSKA ZVANJA	56
POGLAVLJE III - NAČIN IZBORA U AKADEMSKA ZVANJA	57
POGLAVLJE IV - POSTUPAK IZBORA U AKADEMSKO ZVANJE	59
POGLAVLJE V - KOMISIJA ZA IZBOR	60
POGLAVLJE VI – PRIJEDLOG ODLUKE O IZBORU	62
POGLAVLJE VII – ODLUKA O IZBORU	62
POGLAVLJE VIII – ODGOVORNOST KOMISIJA	62
POGLAVLJE IX – REDOVNI PROFESOR	63
POGLAVLJE X - POČASNI DOKTORAT	64
POGLAVLJE XI - PROFESOR EMERITUS	64
POGLAVLJE XII – STRUČNI SARADNICI	65
DIO JEDANAESTI - ANGAŽMAN AKADEMSKOG OSOBLJA BEZ ZASNIVANJA RADNOG ODNOSA	66
POGLAVLJE I - VRSTE ANGAŽMANA	66
DIO DVANAESTI - PRAVA I OBAVEZE AKADEMSKOG OSOBLJA	68
DIO TRINAESTI - EVALUACIJA AKADEMSKOG OSOBLJA	72
DIO ČETRINAESTI - NEAKADEMSKO OSOBLJE	72

DIO PETNAESTI - POSLOVNA TAJNA.....	73
DIO ŠESNAESTI - AKTI UNIVERZITETA.....	74
DIO SEDAMNAESTI - PRELAZNE I ZAVRŠNE ODREDBE	75

Na osnovu člana 56. stav (2) i člana 61. stav (1) tačka c) Zakona o visokom obrazovanju („Službene novine Kantona Sarajevo“, broj: 36/22), tačke I i VIII Odluke o izmjeni i dopuni Statuta, broj IUS-SENAT-11-3325/24 od 22.10.2024. godine, te Odluke Ministarstva za nauku, visoko obrazovanje i mlade Kantona Sarajevo o davanju saglasnosti na Prijedlog Odluke o izmjeni i dopuni Statuta Internacionalnog univerziteta u Sarajevu - International University of Sarajevo, broj: 27/03-02-23989-10/24 od 17.10.2024. godine, Senat Internacionalnog univerziteta u Sarajevu, na svojoj 184. sjednici održanoj dana 22.10.2024. godine, d o n o s i

STATUT INTERNACIONALNOG UNIVERZITETA U SARAJEVU

Prečišćen tekst

DIO PRVI - UVODNE ODREDBE

Član 1.

(Predmet Statuta)

Statutom Internacionalnog univerziteta u Sarajevu (u daljem tekstu: Statut), kao osnovnim aktom Internacionalnog univerziteta u Sarajevu (u daljem tekstu: Univerzitet) uređuju se organizacija, tijela Univerziteta, način rada, organizovanje i izvođenje studijskih programa, upravljanje, rukovođenje i ostala pitanja od značaja za zakonito obavljanje djelatnosti visokoškolske ustanove kao ustanove (u privatnom vlasništvu), koja organizira i izvodi nastavu u sva tri ciklusa studija i bavi se djelatnošću u skladu sa zakonom.

Član 2.

(Osnivanje i upis u Registar)

- (1) Univerzitet je visokoškolska ustanova koja se bavi nastavnim, naučnonastavnim, umjetničkim, umjetničkonastavnim, naučnoistraživačkim i umjetničkoistraživačkim radom, necikličnim oblicima obrazovanja kao i drugim registrovanim djelatnostima u skladu sa zakonom, čiji je osnivač Fondacija za razvoj obrazovanja (u daljem tekstu: Osnivač), sa sjedištem u Sarajevu, u ulici Hrasnička cesta 15.
- (2) Univerzitet je osnovan na temelju sljedećih upravnih akata:
 - a) Odluke Vlade Kantona Sarajevo, broj: 02-05-10404-10/03 od 18.06.2003. godine, koja je objavljena u "Službenim novinama Kantona Sarajevo", broj 14/03 od 19.06.2003. godine, kojom je data saglasnost Fondaciji za razvoj obrazovanja, za osnivanje Internacionalnog univerziteta u Sarajevu kao ustanove.
 - b) Rješenja Ministarstva obrazovanja i nauke Kantona Sarajevo, broj: 11-38-3509 od 16.03.2003. godine, kojim je utvrđeno da su ispunjeni zakonom predviđeni uslovi za osnivanje Internacionalnog univerziteta u Sarajevu, kao ustanove i da je Osnivač Internacionalnog univerziteta u Sarajevu Fondacija za razvoj obrazovanja.
 - c) Rješenja Ministarstva obrazovanja i nauke Kantona Sarajevo, broj: 11-01-38 od 23.06.2004. godine o ispunjavanju uvjeta za početak rada Internacionalnog univerziteta u Sarajevu kao ustanove, kojim je utvrđeno da su ispunjeni svi predviđeni uvjeti za početak rada u školskoj 2004/2005 godini.
- (3) Univerzitet ima svojstvo pravnog lica koje je stekao upisom u Registru privrednih društava/poslovnih subjekata Općinskog suda u Sarajevu, pod brojem MBS: 65-05-00-24-10(stari broj MBS: 2-82), na osnovu rješenja: Kantonalnog suda Sarajevo, broj UF/I-1905/04 od 06.10.2004. godine, Kantonalnog suda Sarajevo broj: UF/I-1656/03 od 23/10/2003. godine, Općinskog suda u Sarajevu broj: 065-0-Reg-10-003421 od

31.12.2010. godine, Općinskog suda u Sarajevu broj: 065-0-Reg-10-001737 od 11.06.2010. godine, Općinskog suda u Sarajevu broj: 065-0-Reg-09-002967 od 20.05.2010 godine, Općinskog suda u Sarajevu broj 065-0-Reg-08-003031 od 01.11.2008. godine, Općinskog suda u Sarajevu broj: UF/I-1045/05 od 30.09.2005. godine, kao i na osnovu naknadnih izmjena podataka u skladu sa zakonom.

Član 3.

(Naziv Univerziteta)

- (1) Puni naziv Univerziteta glasi: INTERNACIONALNI UNIVERZITET U SARAJEVU - INTERNATIONAL UNIVERSITY OF SARAJEVO.
- (2) Skraćeni naziv Univerziteta glasi: IUS.
- (3) U zvaničnoj korespondenciji, dokumentima i javnim ispravama može se koristiti puni naziv Univerziteta, ili umjesto punog naziva, Univerzitet po potrebi može koristiti i kratke nazive, i to:
 - a) na bosanskom jeziku: INTERNACIONALNI UNIVERZITET U SARAJEVU
 - b) na engleskom jeziku INTERNATIONAL UNIVERSITY OF SARAJEVO.
- (4) Skraćeni i kratki naziv Univerziteta mogu se koristi umjesto punog naziva, na logu i po potrebi u ostalim oblicima neslužbene korespondencije.

Član 4.

(Sjedište Univerziteta)

- (1) Sjedište Univerziteta je u Sarajevu, u Ulici Hrasnička cesta 15.
- (2) Univerzitet može vršiti promjenu naziva i sjedišta, u skladu sa zakonom i Statutom.

Član 5.

(Obilježja Univerziteta)

- (1) Univerzitet ima svoj znak i zastavu.
- (2) Znak Univerziteta je plave boje (šifra boje: Pantone 294 M(CMYK 100/58/0/2) na bijeloj pozadini okruglog oblika, sa ispisanim skrećenim nazivom IUS na dnu kruga. U središtu znaka je obris Sebilja na Baščaršiji sa radialnim motivom u pozadini koji simbolizira izvor znanja. Pri dnu Sebilja napisan je broj 2004, što označava godinu osnivanja Univerziteta. Iznad Sebilja polukružno uz obod je ispisan naziv Univerziteta na engleskom jeziku. Na samom dnu znaka horizontalno je napisan naziv Univerziteta u tri alternativne varijante: na bosanskom jeziku latinicom, na engleskom jeziku i na turskom jeziku.
- (3) Zastava je bijele boje sa znakom Univerziteta u sredini.
- (4) Fakulteti u sastavu Univerziteta kao organizicione jedinice (u daljem tekstu: fakulteti) imaju pravo da pored naziva fakulteta koriste naziv, znak i zastavu Univerziteta.

Član 6.

(Pečat i žig Univerziteta)

- (1) Pečat i suhi žig Univerziteta usklađeni su sa znakom Univerziteta.
- (2) Univerzitet ima pečat okruglog oblika, prečnika 35 mm i 50 mm. Na obodu pečata je naziv Univerziteta na engleskom i bosanskom jeziku. U sredini pečata je obris Sebilja na Baščaršiji sa radialnim motivom u pozadini koji simbolizira izvor znanja, a u dnu Sebilja napisan je broj 2004. Ispod Sebilja, na obodu napisan je skraćeni naziv IUS, a između skraćenog naziva i oboda upisuje se redni broj pečata, osim broja „0“ (nultog), koji isljučivo koristi rektor.

- (3) Univerzitet ima suhi žig okruglog oblika, prečnika 50 mm, sa sadržajem kao i pečat, a koji se koristi za ovjeru izdatih univerzitetskih diploma i drugih isprava.
- (4) Upravni odbor posebnom odlukom određuje broj numerisanih pečata iz stava (2) ovog člana i povjerena ovlašćenja za njihovo korišćenje.
- (5) Ovlašćenja iz stava (4) ovog člana mogu se utvrditi i sistematizacijom radnih mjesta na IUS-u, koji donosi Upravni odbor.

Član 7.

(Nastava na Univerzitetu)

- (1) U cilju realizacije nastavnih planova i programa, nastava na Univerzitetu se izvodi na engleskom jeziku.
- (2) U skladu sa pravilima studiranja, poseban program engleskog jezika se organizuje za studente čije poznavanje engleskog jezika nije dovoljno za potrebe studiranja.
- (3) Studenti iz stava (2) ovog člana, za vrijeme pohađanja programa engleskog jezika, odnosno do stjecanja znanja engleskog jezika potrebnog za praćenje nastave, ne pohađaju nastavu studijskog programa.
- (4) Nastava na Univerzitetu može se izvoditi i na drugim jezicima, ukoliko to zahtijeva nastavni plan i program datog studijskog programa.

Član 8.

(Službeni jezik)

- (1) Službeni jezici u upotrebi na Univerzitetu su bosanski i engleski, a pismo latinica.
- (2) Ostali službeni jezici u zvaničnoj upotrebi u Bosni i Hercegovini, kao i službena pisma u ravnopravnoj su upotrebi.
- (3) Službena korespodencija sa državnim institucijama vlasti i trećim licima u Bosni i Hercegovini vrši se na bosanskom jeziku, latiničnim pismom.
- (4) Interni akti, dokumentacija i evidencija vode se na bosanskom jeziku, a po potrebi na engleskom jeziku.
- (5) Ukoliko se unutar službene korespondencije pojavi nekonzistentnost između sadržaja dokumenta na bosanskom/engleskom jeziku, kao relevantan uzet će se originalni dokument na bosanskom jeziku.

Član 9.

(Realizacija djelatnosti visokog obrazovanja)

Univerzitet realizira djelatnost visokog obrazovanja u skladu sa rješenjem o osnivanju odnosno u skladu sa rješenjem o akreditaciji koju izdaje Ministarstvo za nauku, visoko obrazovanje i mlade Kantona Sarajevo (u daljem tekstu: Ministarstvo), saglasno Zakonu o visokom obrazovanju u Kantonu Sarajevo (u daljem tekstu: Zakon).

Član 10.

(Javnost rada)

- (1) Rad Univerziteta i njegovih tijela je javan.
- (2) Univerzitet ispoljava otvorenost prema javnosti, promovira poštivanje i afirmaciju ljudskih prava, te razvija osjećaj društvene odgovornosti studenata, akademskog osoblja i zaposlenika.
- (3) O značajnim događanjima na Univerzitetu obavještava se javnost putem službene internet stranice i sredstava javnog informisanja.
- (4) Rektor i lica koje on ovlasti, mogu putem sredstava javnog informisanja ili na drugi propisan način, davati zvanična saopćenja za javnost o pitanjima važnim za rad Univerziteta.

- (5) Strategijom komuniciranja i Pravilnikom o javnosti rada preciznije se uređuju pitanja javnosti rada na Univerzitetu.
- (6) U realiziranju načela javnosti, Univerzitet primjenjuje načela iz Zakona o slobodi pristupa informacijama i Zakona o zaštiti ličnih podataka.

Član 11.

(Službena internet stranica)

- (1) Univerzitet ima službenu internet stranicu: www.ius.edu.ba.
- (2) Organizacione jedinice Univerziteta mogu imati i vlastite internet stranice, koje su poddomene internet stranice Univerziteta.

Član 12.

(Zastupanje i predstavljanje Univerziteta)

- (1) Univerzitet u unutrašnjem i vanjskom poslovanju zastupa i predstavlja rektor, sa ovlašćenjem samostalnog zaključivanja svih pravnih poslova čija mjesečna vrijednost ne prelazi iznos od ukupno 150.000,00 KM (stotinupedesethiljadakonvertibilnihmaraka), a preko tog iznosa uz obavezno pisano odobrenje Upravnog odbora Univerziteta (u daljem tekstu: Upravni odbor).
- (2) U ovlašćenja iz stava (1) ovog člana ne ulaze redovni mjesečni troškovi za plaće i doprinose zaposlenika kao i drugi redovni mjesečni troškovi Univerziteta, a za čije naloge za uplatu i isplatu rektor obavezno pribavlja supotpis rukovodioca Službe za finansije i ekonomska pitanja Univerziteta.
- (3) U odsutnosti ili privremene spriječenosti rektora da zastupa i predstavlja Univerzitet, zastupanje i predstavljanje Univerziteta vrši prorektor kojeg u pismenoj formi opunomoći rektor, sa ovlašćenjima navedenim u punomoći.
- (4) Ovlašćenja iz ovog člana odnose se i na vršioce dužnosti rektora i prorektora.
- (5) Rektor, kao i prorektor mogu svoja ovlašćenja ili dio ovlašćenja prenijeti i na druga lica, putem generalnih i pojedinačnih punomoći.

Član 13.

(Finansijska sredstva za rad)

- (1) Univerzitet i organizacione jedinice stiču prihode od Osnivača, školarina, realizacije naučnoistraživačke i umjetničke djelatnosti; pružanja intelektualnih odnosno naučnih, stručnih i umjetničkih usluga; necikličnih vidova obrazovanja; izdavačke djelatnosti; postupaka priznavanja inostranih visokoškolskih kvalifikacija; prihoda od autorskih prava i patenata; donacija pravnih i fizičkih lica; legata, poklona i zavještanja; sredstava koje uplaćuju studenti na svim ciklusima studija za sve vrste obrazovnih, administrativnih i drugih usluga; djelatnosti laboratorija, centara, instituta, podorganizacionih jedinica i drugih organizacionih struktura Univerziteta; dijagnostičkih i drugih stručnih usluga kao i ostalih izvora u skladu sa zakonom i registriranom djelatnošću Univerziteta.
- (2) Upravni odbor Univerziteta, na prijedlog rektora, usvaja godišnji finansijski plan i utvrđuje planove finansiranja i razvoja koje podnosi Osnivaču.
- (3) Prijedlog godišnjeg finansijskog plana zajedno sa planovima finansiranja i razvoja predstavljaju zahtjev Osnivaču za obezbjeđenje sredstava potrebnih za rad Univerziteta i njegovih organizacionih jedinica u narednoj kalendarskoj godini.
- (4) Osnivač Univerziteta, u pravilu, do kraja kalendarske godine, usvaja budžet Univerziteta za narednu kalendarsku godinu.

Član 14.

(Finansijski plan)

- (1) Osnovu za finansijski plan Univerziteta predstavlja: planirani ukupan broj studenata, planirani broj nastavnog i nenastavnog osoblja propisan Standardima i normativima za obavljanje djelatnosti iz oblasti visokog obrazovanja na području Kantona Sarajevo (u daljem tekstu: Standardi i normativi), planirana visina troškova plata i sa njima povezanih izdataka, te troškovi u skladu sa vizijom razvoja Univerziteta i druge finansijske potrebe unutar finansijskog plana.
- (2) Univerzitet raspolaže prihodima shodno zakonu i propisima donijetim na osnovu zakona, te programskim i planskim dokumentima Univerziteta.
- (3) Prilivi i odlivi sredstava vode se putem transakcijskih računa Univerziteta.

Član 15.

(Obaveze rektora prema Upravnom odboru i Osnivaču)

- (1) Rektor Univerziteta podnosi Osnivaču putem Upravnog odbora godišnji izvještaj o radu sa finansijskim informacijama.
- (2) Ukoliko opravdani razlozi nalažu, Osnivač je ovlašten da u svako vrijeme zatraži od Upravnog odbora dostavljanje finansijskog izvještaja o poslovanju Univerziteta.

Član 16.

(Statusne promjene Univerziteta)

Univerzitet može proširiti djelatnost, promijeniti naziv i sjedište, osnivati nove organizacione i podorganizacione jedinice, kao i vršiti statusne promjene: spajanje, podjelu i izdvajanje, uz saglasnost i odobrenje Osnivača, u skladu sa zakonom.

Član 17.

(Školarina i druge naknade)

- (1) Odluku o visini školarine i drugih naknada donosi Upravni odbor, a koja se objavljuje najkasnije sedam dana prije objave konkursa za upis studenata.
- (2) Od plaćanja školarine oslobođena su lica koja ostvare punu stipendiju na godišnjem testu znanja koji organizuje Univerzitet, kao i lica koja ostvare „Kvalifikacijsku stipendiju“ na prijemnom ispitu u okviru „ÖSYM“ (*Centar za izbor i raspoređivanje studenata Republike Turske*).
- (3) Upravni odbor donosi opći akt kojim se preciznije utvrđuju kategorije, kriteriji i uslovi u vezi sa sticanjem prava iz stava (2) ovog člana.

DIO DRUGI – PRISTUP VISOKOM OBRAZOVANJU I CILJEVI UNIVERZITETA

Član 18.

(Pristup visokom obrazovanju)

- (1) Svim licima koja ispunjavaju propisane uslove za studiranje na Univerzitetu, omogućava se pravo pristupa visokom obrazovanju u skladu sa zakonom i općim aktima Univerziteta.
- (2) Na Univerzitetu se ne može ograničiti pristup obrazovanju, direktno ili indirektno, prema bilo kojoj stvarnoj ili pretpostavljenoj osnovi suprotnoj ustavnim načelima, zakonima i međunarodnom pravu.

Član 19.

(Ciljevi visokog obrazovanja)

- (1) Visoko obrazovanje usmjereno je ka punom razvoju ljudske ličnosti, poštivanju ljudskih prava, građanskih i drugih demokratskih, akademskih, zakonskih i ustavnih načela i sloboda.
- (2) Univerzitet će služiti kao visokoškolska ustanova koja pruža kvalitetno obrazovanje i služi zajednici, kao multikulturalno središte za naučne aktivnosti koje su usmjerene na inovacije u obrazovanju, te stvaranje i primjenu znanja putem istraživanja i projekata.

DIO TREĆI - PRAVA I OBAVEZE UNIVERZITETA

Član 20.

(Prava i obaveze Univerziteta)

Osim prava i obaveza utvrđenih zakonom, Univerzitet u realiziranju svoje djelatnosti ima prava i obaveze da:

- a) osigura kvalitet u svim segmentima rada kroz osnivanje tijela i uspostavljanje procedura kvaliteta osiguranja;
- b) donese i usvoji Strateški plan i uspostavi efektivan sistem osiguranja implementacije, redovnog praćenja rada i daljnjeg razvoja;
- c) razvija strategiju međunarodnih aspekata svojih aktivnosti, a koja je usklađena sa općim Strateškim planom Univerziteta;
- d) stiče imovinu, upravlja njome i koristi je u skladu sa zakonom;
- e) raspolaze finansijskim sredstvima koja ostvari vlastitom djelatnošću;
- f) predlaže Upravnom odboru vrste i cijene usluga za studente;
- g) utvrđuje iznose naknada po osnovu ustupljenih prava za korištenje imena, znaka i drugih obilježja Univerziteta;
- h) bira upravna i rukovodna tijela i utvrđuje njihova ovlašćenja, u skladu sa zakonom;
- i) uređuje organizaciju rada na Univerzitetu, u skladu sa zakonom i općim aktima Univerziteta;
- j) zaključuje ugovore o studiranju kojim se preciznije uređuju međusobna prava i obaveze između Univerziteta i studenata;
- k) osigurava slobodu govora, organizovanja i okupljanja u skladu sa zakonom;
- l) osigurava slobodu akademskog osoblja i studenata da ispituju i testiraju primljena znanja i da nude nove ideje i mišljenja, a da se pri tom ne izlažu opasnosti od gubitka svog statusa ili bilo koje druge privilegije koju uživaju;
- m) osigurava efikasne mehanizme zaštite protiv diskriminacije, uznemiravanja na osnovu spola i seksualnog uznemiravanja za studente, nastavno osoblje i uposlenike kroz implementaciju općih akata donesenih od strane Senata ili Upravnog odbora;
- n) organizuje i izvodi studij, odlučuje o načinu implementacije ECTS transfer sistema kao i izdavanju odgovarajućih diploma i dodataka diplomi, odnosno drugih javnih isprava, u skladu sa zakonom;
- o) zaključuje ugovore o radu i odlučuje o vrstama angažmana fizičkih i pravnih lica, u skladu sa zakonom;
- p) kao i druge nadležnosti propisane zakonom i općim aktima.

Član 21.

(Istraživanje i stvaralaštvo)

- (1) Sloboda naučnog, umjetničkog i stručnog istraživanja i stvaralaštva, ispitivanje i testiranje znanja, ideja i mišljenja, te međusobna saradnja i udruživanje smatra se univerzalnim pravom u skladu sa ustavom i zakonom, koje pripada svim članovima akademske zajednice.
- (2) Naučna, umjetnička i stručna istraživačka djelatnost je temeljno pravo i obaveza zaposlenika Univerziteta i njegovih članica izabranih u naučno-nastavna i umjetničko-nastavna zvanja, naučna radna mjesta i saradnička zvanja utvrđena ovim Statutom, u skladu sa općim aktima i ugovorima o radu.
- (3) Istraživačka djelatnost zaposlenika iz stava (2) ostvaruje se:
 - a) preuzimanjem ugovornih obaveza i radom na istraživačkim programima, projektima, analizama i ekspertizama, i
 - b) individualnim istraživanjima i stvaralaštvom.

Član 22.

(Sloboda obrazovnog procesa)

Univerzitet ima slobodu da u skladu sa zakonom i Statutom inovira obavljanje djelatnosti visokog obrazovanja kao i da samostalno pokreće studijske programe za stjecanje neophodnih znanja i vještina potrebnih za svrhu ostvarenja ciljeva visokog obrazovanja i koncepta cjeloživotnog učenja.

Član 23.

(Jednakost i zabrana diskriminacije)

- (1) U obavljanju svoje djelatnosti Univerzitet je usmjeren na jednakost u mogućnostima i tretmanu svih osoba koje sudjeluju u naučnonastavnom procesu, bez bilo kojeg oblika diskriminacije po osnovama: spola, rase, seksualne orijentacije, jezika, vjere, političkih ili drugih uvjerenja, nacionalnog, etničkog ili socijalnog porijekla, bračnog statusa, imovinskog statusa, onesposobljenosti ili po nekom drugom ličnom svojstvu, položaju ili okolnosti.
- (2) Univerzitet osigurava jednak tretman svih organizacionih jedinica u vršenju utvrđenih ovlaštenja, te jednakost u mogućnostima i tretmanu osoblja Univerziteta.
- (3) S ciljem podstjecanja pune socijalne integracije i učešća u životu zajednice osoba sa onesposobljenjem, Univerzitet u skladu sa svojim mogućnostima preduzima mjere za pristup obrazovanju tim kategorijama.

DIO ČETVRTI - DJELATNOST I ORGANIZACIJA UNIVERZITETA

Član 24.

(Djelatnost Univerziteta)

- (1) Osnovna djelatnost Univerziteta usklađena je sa Klasifikacijom djelatnosti Bosne i Hercegovine ("Službeni glasnik BiH", broj 47/10), i obuhvata:

02.40	<i>Pomoćne usluge u šumarstvu;</i>
17.23	<i>Proizvodnja kancelarijskog materijala od papira;</i>

18.11	<i>Štampanje novina;</i>
18.12	<i>Ostalo štampanje;</i>
18.13	<i>Usluge pripreme za štampanje i objavljivanje;</i>
18.14	<i>Knjigovezačke i srodne usluge;</i>
18.20	<i>Umnožavanje snimljenih zapisa;</i>
55.90	<i>Ostali smještaj;</i>
56.10	<i>Djelatnosti restorana i ostalih objekata za pripremu i usluživanje hrane;</i>
56.21	<i>Djelatnosti keteringa;</i>
56.29	<i>Ostale djelatnosti pripreme i usluživanja pića;</i>
56.30	<i>Djelatnosti pripreme i usluživanja pića;</i>
58.11	<i>Izdavanje knjiga;</i>
58.13	<i>Izdavanje novina;</i>
58.14	<i>Izdavanje časopisa i periodičnih publikacija;</i>
59.11	<i>Proizvodnja filmova, videofilmova i televizijskog programa;</i>
59.20	<i>Djelatnosti snimanja zvučnih zapisa i izdavanje muzičkih zapisa;</i>
60.10	<i>Emitiranje radijskog programa;</i>
60.20	<i>Emitiranje televizijskog programa;</i>
62.01	<i>Računalno programiranje;</i>
62.09	<i>Ostale uslužne djelatnosti u vezi s informacijskom tehnologijom i računarima;</i>
70.21	<i>Odnosi s javnošću i djelatnosti saopćavanja;</i>
70.22	<i>Savjetovanje u vezi s poslovanjem i ostalim upravljanjem;</i>
71.11	<i>Arhitektonske djelatnosti;</i>
71.12	<i>Inžinjerske djelatnosti i s njima povezano tehničko savjetovanje;</i>
71.20	<i>Tehničko ispitivanje i analiza;</i>
72.11	<i>Istraživanje i eksperimentalni razvoj u biotehnologiji;</i>
72.19	<i>Ostalo istraživanje i eksperimentalni razvoj u prirodnim, tehničkim i tehnološkim naukama;</i>
72.20	<i>Istraživanje i eksperimentalni razvoj u društvenim i humanističkim naukama;</i>
73.11	<i>Agencija za promociju (reklamu i propagandu);</i>
73.20	<i>Istraživanje tržišta i ispitivanje javnog mnijenja;</i>
74.30	<i>Prevodilačke djelatnosti i usluge tumača;</i>
74.90	<i>Ostale stručne, znanstvene i tehničke djelatnosti, d.n.;</i>

82.11	<i>Kombinirane kancelarijske administrativne uslužne djelatnosti;</i>
82.19	<i>Fotokopiranje, priprema dokumenata i ostale specijalizirane kancelarijske pomoćne djelatnosti;</i>
82.99	<i>Ostale poslovne pomoćne uslužne djelatnosti, d. n.;</i>
85. 42	Visoko obrazovanje
85.51	<i>Obrazovanje i poučavanje u području sporta i rekreacije;</i>
85.52	<i>Obrazovanje i podučavanje u području kulture;</i>
85.59	<i>Ostalo obrazovanje i poučavanje, d.n.;</i>
85.60	<i>Pomoćne uslužne djelatnosti u obrazovanju;</i>
90.01	<i>Izvođačka umjetnost;</i>
90.02	<i>Pomoćne djelatnosti u izvođačkoj umjetnosti;</i>
90.03	<i>Umjetničko stvaralaštvo;</i>
90.04	<i>Rad umjetničkih objekata;</i>
91.01	<i>Djelatnost biblioteka i arhiva;</i>
93.11	<i>Rad sportskih objekata;</i>
93.12	<i>Djelatnosti sportskih klubova;</i>
93.13	<i>Fitnes centri;</i>
93.19	<i>Ostale sportske djelatnosti;</i>
95.11	<i>Popravak računara i periferne opreme;</i>

- (2) Djelatnost visokog obrazovanja Univerzitet realizira kao djelatnost od posebnog općeg i javnog interesa za Kanton Sarajevo i bosanskohercegovačko društvo.
- (3) Djelatnosti navedene u stavu (1) ovog člana Univerzitet vrši ukoliko su u funkciji obrazovanja, naučnonastavne i naučnoistraživačke djelatnosti.
- (4) Univerzitet obavlja usluge vanjskog prometa, iz okvira registrovane djelatnosti, u skladu sa zakonom.

Član 25.

(Promjena i proširivanje djelatnosti)

- (1) Osnivač vrši promjenu, odnosno proširivanje djelatnosti, na način i po postupku utvrđenim zakonom i drugim propisima koji uređuju predmetnu oblast.
- (2) Univerzitet može, u skladu sa zakonom i propisima donijetim na osnovu zakona, biti suosnivač samostalnih naučnih organizacija i ustanova, pri čemu se međusobni odnosi Univerziteta i drugih suosnivača regulišu posebnim pisanim ugovorom, a koji se zaključuje uz prethodnu saglasnost Osnivača.

Član 26.

(Program rada)

- (1) Univerzitet donosi godišnji program rada za svaku kalendarsku godinu.
- (2) Godišnji program rada donosi se na osnovu Strategije Univerziteta.

Član 27.
(Rektorat)

Rektorat je administrativna služba Univerziteta koja objedinjuje funkcije podrške nastavi, naučnoistraživačkom radu i pomoći rektoru u obavljanju njegove funkcije, a sačinjavaju ga:

- a) rektor,
- b) prorektori,
- c) savjetnik(ici) rektora, i
- d) generalni sekretar.

Član 28.
(Organizacione jedinice i naučna i stručna zvanja)

U sastavu Univerziteta, organizacione jedinice putem kojih se izvodi naučni, umjetnički, nastavni, naučnoistraživački i umjetničkoistraživački rad, integrisani su:

- a) Fakultet umjetnosti i društvenih nauka
Naziv na engleskom: Faculty of Arts and Social Sciences
Skraćeni naziv: FASS
Adresa: Hrasnička cesta 15, 72 210 Ilidža
Studijski programi I, II i III ciklusa studija;
- b) Fakultet menadžmenta i javne uprave -
Naziv na engleskom: Faculty of Business and Administration
Skraćeni naziv: FBA
Hrasnička cesta 15, 72 210 Ilidža,
Studijski programi I, II i III ciklusa studija
- c) Fakultet prirodnih i tehničkih nauka
Naziv na engleskom: Faculty of Engineering and Natural Sciences
Skraćeni naziv: FENS
Hrasnička cesta 15, 72 210 Ilidža
Studijski programi I, II i III ciklusa studija;
- d) Pravni fakultet
Naziv na engleskom: Faculty of Law
Skraćeni naziv: FLW
Hrasnička cesta 15, 72 210 Ilidža,
Studijski programi I, II i III ciklusa studija
- e) Edukacijski fakultet
Naziv na engleskom: Faculty of Education
Skraćeni naziv: FEDU
Hrasnička cesta 15, 72 210 Ilidža,
Studijski programi I, II i III ciklusa studija

- f) Fakultet medicinskih nauka
Naziv na engleskom: Faculty of Medical Sciences
Skraćeni naziv: FMS
Hrasnička cesta 15, 72 210 Ilidža,
Studijski programi: I, II i integrisani studiji.
- g) Istraživački institut
Naziv na engleskom: Research Institute

Član 29.

(Nadležnost organizacione jedinice u pravnom prometu)

- (1) U organizacionim jedinicama se izvodi nastavni, naučnonastavni, umjetnički, umjetničkonastavni i naučnoistraživački rad iz oblasti visokog obrazovanja, odnosno djelatnost utvrđena zakonom, Statutom i aktom o osnivanju.
- (2) Organizacione i podorganizacione jedinice nemaju status pravnog lica.
- (3) Organizacione jedinice istupaju u pravnom prometu pod nazivom Univerziteta i svojim nazivom.
- (4) Sredstva za rad organizacione jedinice obezbjeđuju se iz imovine Osnivača ili iz ostvarenog prihoda od realizacije djelatnosti Univerziteta.
- (5) Kada organizaciona jedinica u pravnom prometu nastupa u ime i za račun Univerziteta, može ostvarivati prihod, koji se knjigovodstveno i računovodstveno vodi i iskazuje kao prihod Univerziteta.
- (6) Rukovodilac organizacione jedinice može raspolagati sredstvima Univerziteta samo uz pismenu saglasnost Rektora, na način i u granicama navedenim u toj saglasnosti.
- (7) Rukovodilac organizacione jedinice u pravilu je odgovoran za realizaciju prava i obaveza iz naučnonastavnog procesa organizacione jedinice koja su propisana zakonom, osnivačkim aktom i općim aktom Univerziteta.

Član 30.

(Odsjek)

- (1) Odsjek je podorganizaciona jedinica koja se osniva radi obavljanja djelatnosti visokog obrazovanja i nauke/umjetnosti u jednom ili više srodnih naučnih/umjetničkih polja ili područja.
- (2) Odsjek na Univerzitetu ne predstavlja zasebnu administrativnu strukturu, već mu je dodijeljena okvirna funkcionalna uloga koju ostvaruju programski koordinatori kroz nadzor realizacije studijskih programa.

Član 31.

(Programski koordinator)

- (1) Studijski program predstavlja programski koordinator, kojeg na prijedlog dekana i uz saglasnost rektora, imenuje vijeće fakulteta na period od dvije godine, sa mogućnošću reizbora.
- (2) Programski koordinator može biti imenovan za jedan ili više studijskih programa koji se realiziraju unutar odsjeka.
- (3) Programski koordinator studijskog programa ima sljedeće dužnosti:
 - a) nadgleda realizaciju i konzistentnost sadržaja studijskog plana i programa na studijskom programu,
 - b) prati i odgovara za realizaciju i kvalitet nastave i ispita na predmetima iz nastavnog plana i programa,

- c) brine o naučnoistraživačkom radu i stručnom napredovanju akademskog osoblja na studijskom programu,
- d) blagovremeno predlaže organima matičnog fakulteta mjere i podsticaje potrebne za unapređenje djelatnosti u naučnim oblastima/poljima koje se izučavaju na studijskom programu,
- e) prijavljuje organima matičnog fakulteta i Univerziteta povredu radnih i drugih obaveza od strane nastavnog i saradničkog osoblja,
- f) odgovara za ispunjenost svih uslova propisanih nastavnim planom i programom za završetak studija i stjecanje diplome,
- g) predstavlja studijski program i predsjedava sjednicama programskog vijeća,
- h) podnosi dekanu redovne semestralne izvještaje o realizaciji studijskog programa,
- i) izvršava odluke vijeća fakulteta,
- j) i druge dužnosti povjerene od strane vijeća fakulteta.

Član 32.

(Istraživački institut)

- (1) Istraživački institut (u daljem tekstu: Institut) je organizaciona jedinica Univerziteta.
- (2) Institut ima za cilj pomoći ostvarivanju bolje povezanosti između privrede i Univerziteta kao i bolje efikasnosti organizacije interdisciplinarnih istraživanja i projekata.
- (3) Institut direktno surađuje sa nastavnim osobljem Univerziteta i time omogućava brzu primjenu naučnih rezultata. Na Institutu se može organizirati dio praktične nastave I, II i III ciklusa studija.

Član 33.

(Organizacija Instituta)

- (1) Upravni odbor, na prijedlog rektora, odlukom može osnivati, ukidati i reorganizirati centre kao podorganizacione jedinice Instituta.
- (2) Institutom upravlja direktor Instituta.
- (3) Centrima unutar Instituta upravljaju koordinatori centara.
- (4) Direktora Instituta bira naučno vijeće uz pribavljenu saglasnost Osnivača, a rješenje o imenovanju potpisuje rektor Univerziteta.
- (5) Koordinatora centra imenuje rektor.
- (6) Djelatnost, organizacija i rad Instituta, način izbora direktora, kao i ostala relevantna pitanja preciznije se uređuju općim aktom koji donosi Upravni odbor.

Član 34.

(Druge poslovne jedinice)

S ciljem upotpunjavanja osnovnih ciljeva registrovane djelatnosti, u okviru Univerziteta ustanovljene su i djeluju sljedeće poslovne jedinice:

- a) Internacionalni univerzitet u Sarajevu - Centar za cjeloživotno učenje IUS LIFE (u daljem tekstu: IUS LIFE),
- b) Košarkaški klub Internacionalnog univerziteta u Sarajevu - IUS Wolves, i
- c) druge poslovne jedinice koje osnuje Osnivač.

DIO PETI - TIJELA UNIVERZITETA

Član 35.

(Tijela Univerziteta)

- (1) Tijela Univerziteta su:
 - a) Upravni odbor;

- b) Senat;
- c) rektor;
- d) druga stručna i savjetodavna tijela.

POGLAVLJE I - UPRAVNI ODBOR

Član 36.

(Sastav Upravnog odbora)

- (1) Upravni odbor Univerziteta je organ upravljanja i imenuje se na mandat od četiri godine.
- (2) Upravni odbor Univerziteta ima devet članova od kojih je jedan predsjednik Upravnog odbora.
- (3) Osam članova Upravnog odbora imenuje Osnivač.
- (4) Jednog člana Upravnog odbora, bez raspisivanja konkursa, imenuje Senat Univerziteta.
- (5) Rektor, prorektori, članovi Senata i rukovodioci organizacionih jedinica ne mogu biti članovi Upravnog odbora.
- (6) Predsjednika Upravnog odbora imenuje Osnivač.
- (7) Rektor, prorektori i generalni sekretar prisustvuju sjednicama Upravnog odbora bez prava odlučivanja.
- (8) Postupak izbora i imenovanja predsjednika i članova Upravnog odbora pokreće Osnivač odnosno Senat najkasnije šest mjeseci prije isteka mandata aktuelnog sastava Upravnog odbora.
- (9) Za člana Upravnog odbora ne može biti imenovana osoba u radnom odnosu u organima koji vrše nadzor nad provođenjem propisa iz oblasti visokog obrazovanja i nadzor nad zakonitošću rada Univerziteta, kao ni druga lica u skladu sa zakonom i drugim propisima.
- (10) Sva ostala pitanja vezana za rad Upravnog odbora, a koja nisu definisana Statutom preciznije se uređuju općim aktom koji usvaja Upravni odbor.

Član 37.

(Nadležnost Upravnog odbora)

- (1) Upravni odbor odgovoran je Osnivaču za poslovanje Univerziteta odnosno za rezultate rada Univerziteta.
- (2) U okviru svoje nadležnosti, Upravni odbor je ovlašten da traži informacije od svih tijela Univerziteta kao i da ima slobodan pristup istim.
- (3) Upravni odbor obavještava o svom radu Osnivača dostavljanjem zapisnika sa sjednica Upravnog odbora u roku od deset dana od dana njihovog usvajanja, kao i dostavljanjem šestomjesečnih i godišnjih izvještaja.
- (4) Upravni odbor obavlja poslove utvrđene zakonom i Statutom, a naročito:
 - a) daje mišljenje o predloženom Statutu;
 - b) donosi Pravilnik o radu Univerziteta kojim se uređuju plata, organizacija rada, sistematizacija radnih mjesta, te ostala pitanja iz radnopravnog statusa radnika;
 - c) donosi druge opće akte u skladu sa zakonom i Statutom;
 - d) utvrđuje planove finansiranja i razvoja Univerziteta;
 - e) usvaja godišnji izvještaj o radu koji dostavlja rektor, a koji obuhvata finansijski izvještaj;
 - f) donosi godišnji plan rada Univerziteta, na prijedlog Senata;
 - g) donosi finansijski plan;
 - h) zahtjeva od rektora/dekana dostavu izvještaja vezanih za određeni period ili konkretne aktivnosti iz plana rada;

- i) usmjerava, kontroliše i ocjenjuje rad rektora u domeni finansijskog poslovanja i preduzima potrebne mjere i aktivnosti da bi se osigurala zakonitost finansijskog i ukupnog poslovanja Univerziteta;
 - j) rješava pitanja koja regulišu odnos Univerziteta i Osnivača;
 - k) odlučuje o korištenju sredstava preko iznosa kojim može raspolagati rektor, u skladu sa ovim Statutom;
 - l) donosi odluku o visini školarine i drugih naknada za sve cikluse i vrste studija definisane ovim Statutom;
 - m) na prijedlog Senata i uz saglasnost Osnivača, donosi odluku o osnivanju i ukidanju fakulteta i drugih članica Univerziteta, u skladu sa zakonom i ovim Statutom;
 - n) odlučuje o prigovoru odnosno žalbama zaposlenika na odluke tijela Univerziteta koji su u prvom stepenu odlučivali o pravima, obavezama i odgovornostima iz radnog odnosa;
 - o) podnosi osnivaču godišnji izvještaj o poslovanju Univerziteta;
 - p) daje prijedlog za prijevremeno razrješenje rektora/dekana;
 - q) na inicijativu Senata, donosi odluku o organizaciji i reorganizaciji Univerziteta odnosno postojećih organizacionih jedinica, odsjeka i studijskih programa;
 - r) odlučuje o finansiranju novih fakulteta, članica i podorganizacionih jedinica odnosno studijskih programa i ostalih vrsta programa, u skladu sa ovim Statutom;
 - s) donosi odluku o davanju ili uskraćivanju saglasnosti na dinamički plan potreba za raspisivanje konkursa za izbor u akademska zvanja, a u skladu sa planovima razvoja i finansiranja;
 - t) zaključuje ugovor o radu sa rektorom Univerziteta;
 - u) obavlja i druge poslove u skladu sa zakonom i Statutom.
- (5) Sva tijela Univerziteta obavezna su na zahtjev Upravnog odbora blagovremeno dostaviti tražene i druge relevantne informacije i dokumentaciju.

POGLAVLJE II - SENAT

Član 38.

(Sastav Senata)

- (1) Odgovornost za akademska pitanja na Univerzitetu ima Senat kao najviše akademsko tijelo koje čine predstavnici akademskog osoblja i predstavnici studenata.
- (2) Senat sačinjavaju:
 - a) rektor, kao predsjedavajući Senata;
 - b) prorektor (i);
 - c) dekani fakulteta;
 - d) po jedan predstavnik fakulteta iz reda nastavnika ili saradnika, koje bira vijeće fakulteta, sa mandatom u trajanju od dvije godine, sa mogućnošću reizbora;
 - e) direktor Centra za cjeloživotno učenje IUS LIFE; i
 - f) po jedan predstavnik studenata iz sva tri ciklusa studija, (prvi, drugi i treći ciklus) uz uslov da imaju status redovnog studenta na Univerzitetu, sa mandatom u trajanju od jedne godine.
- (3) Predstavnike studenata bira Studentski parlament na osnovu rezultata izbora.
- (4) Sjednicama Senata prisustvuju generalni sekretar ili zamjenik generalnog sekretara bez prava odlučivanja.

- (5) U slučaju da se po isteku mandata izabranog člana Senata ne izabere novi član, prethodno izabrani član obavlja dužnost punopravnog člana sve do izbora novog, a najduže jednu godinu.
- (6) Sastav članova Senata odražava ravnopravnu zastupljenost spolova.

Član 39.
(Nadležnost Senata)

- (1) Senat u svom djelovanju ima nadležnost da:
- a) odlučuje o svim akademskim pitanjima, a posebno o pitanjima koja se odnose na nastavnu, naučnu, umjetničku i stručnu djelatnost Univerziteta, u okviru planova i programa poslovanja koje utvrdi Upravni odbor;
 - b) pokreće proceduru razrješenja rektora u skladu sa zakonom;
 - c) donosi Statut Univerziteta u skladu sa zakonom uz prethodno pribavljeno mišljenje Upravnog odbora i uz saglasnost Ministarstva;
 - d) donosi Etički kodeks i opće akte u skladu sa zakonom i Statutom,
 - e) razmatra i prosljeđuje na usvajanje Upravnom odboru godišnji izvještaj o radu sa finansijskim poslovanjem Univerziteta;
 - f) donosi Smjernice za izbor u akademska zvanja, na osnovu prijedloga vijeća fakulteta;
 - g) daje prijedlog Upravnom odboru za osnivanje i ukidanje fakulteta i drugih članica Univerziteta na osnovu zakona i Statuta;
 - h) predlaže Upravnom odboru godišnji program rada;
 - i) daje saglasnost na prijedlog vijeća fakulteta za pokretanje novih, modifikaciju, reorganizaciju ili ukidanje postojećih odsjeka i studijskih programa prvog, drugog i trećeg ciklusa studija, integrisanih studijskih programa prvog i drugog ciklusa, stručnih studija (kratki ciklus studija), kao i programa cjeloživotnog i necikličnog obrazovanja, ljetnih/zimskih škola, interdisciplinarnih programa, mikroakreditiva, „slobodnih predmeta“, kao i drugih programa;
 - j) donosi pravila studiranja;
 - k) predlaže Upravnom odboru uspostavljanje i razvoj sistema osiguranja kvaliteta;
 - l) donosi nastavne planove i programe za sve cikluse studija na prijedlog vijeća fakulteta, te prati njihovu primjenu;
 - m) razmatra i usvaja prijedloge organizacionih jedinica o realizaciji studija u saradnji sa domaćim i stranim visokoškolskim ustanovama koje mogu imati za rezultat izdavanje dvojnih ili zajedničkih diploma;
 - n) bira i razrješava rektora Univerziteta;
 - o) bira i razrješava prorektore Univerziteta na prijedlog rektora;
 - p) vrši izbor akademskog osoblja na prijedlog vijeća fakulteta, u skladu sa dinamičkim planovima;
 - q) imenuje komisije u postupku stjecanja akademske titule odnosno naučnog zvanja trećeg ciklusa studija, na prijedlog vijeća fakulteta;
 - r) dodjeljuje počasno zvanje profesor emeritus;
 - s) dodjeljuje zvanje počasni doktor nauka/umjetnosti;
 - t) daje inicijativu Upravnom odboru za razmatranje pitanja iz domena organizacije i reorganizacije Univerziteta;
 - u) imenuje jednog člana Upravnog odbora;
 - v) usvaja informaciju o dinamičkom planu potreba za raspisivanje konkursa u akademska zvanja;
 - w) usvaja prijedlog plana realizacije nastave;

- x) daje saglasnost na objavu konkursa za izbor u akademska zvanja koji predlažu vijeća fakulteta, a u skladu sa planovima finansiranja i razvoja Univerziteta koje usvaja Upravni odbor;
 - y) odlučuje o angažmanu akademskog osoblja sa drugih visokoškolskih ustanova u svojstvu gostujućih profesora;
 - z) donosi odluku o klasifikaciji naučnih oblasti, polja i grana i pripadajućih predmeta, na prijedlog vijeća fakulteta;
 - aa) donosi kalendar organizacije i realizacije nastavnih programa za studijsku godinu najkasnije 60 dana prije početka izvođenja nastave;
 - bb) ustanovljava komisije za vanredno odlučivanje o pitanjima stečenih akademskih ili studentskih prava i obaveza;
 - cc) raspisuje konkurs za upis u prvu godinu svih ciklusa studija u statusu redovnih, vanrednih ili studija putem učenja na daljinu;
 - dd) obavlja poslove iz nadležnosti komisije matičara u postupku osnivanja do pune uspostave tijela organizacione jedinice;
 - ee) obavlja i druge poslove u skladu sa zakonom i Statutom.
- (2) Odluke Senata su konačne, a protiv istih se može pokrenuti upravni postupak pred nadležnim sudom u Sarajevu u roku od 30 dana od dana prijema odluke.

Član 40.

(Sjednice Senata)

- (1) Senat obavlja poslove iz svog djelokruga na redovnim sjednicama, koje se u pravilu održavaju, najmanje jedanput mjesečno, odnosno kada rektor odluči da je to potrebno.
- (2) Rektor je dužan sazvati vanrednu sjednicu Senata kada to u pismenoj formi zahtjeva najmanje:
 - a) trećina članova Senata,
 - b) najmanje trećina članova Upravnog odbora, ili
 - c) Osnivač.
- (3) Vanredne sjednice u smislu ovog člana obavezno se održavaju u roku od 15 dana od dana prijema poziva.

Član 41.

(Odlučivanje Senata)

- (1) Senat može raspravljati o pitanjima iz svoje nadležnosti i odlučivati kada sjednici prisustvuje natpolovična većina od ukupnog broja članova Senata.
- (2) Senat donosi odluke natpolovičnom većinom glasova ukupnog broja članova Senata, osim ako zakonom, Statutom ili drugim općim aktima za odlučivanje o pojedinim pitanjima nije određena druga kvalifikovana većina.
- (3) Senat donosi odluke javnim glasanjem, osim za ona pitanja za koja je zakonom, Statutom ili drugim općim aktom utvrđeno da odlučuje tajnim glasanjem.
- (4) Ostavka na članstvo u Senatu predstavnika fakulteta iz reda nastavnika kao i predstavnika studenata podnosi se tijelima koja ih imenuju u skladu sa Statutom.
- (5) Na osnovu pisane ostavke, tijela iz stava (4) ovog člana donose odluke o usvajanju/neusvajanju ostavke.
- (6) U slučaju iz stava (5) ovog člana, odluke se dostavljaju Senatu u vidu informacije.
- (7) U slučaju uskraćivanja zastupanja izabranim predstavnicima, tijela iz stava (4) većinskim glasovima mogu i prijevremeno razriješiti prethodno imenovane predstavnike u Senatu.
- (8) Preciznije odredbe o postupku, radu i načinu donošenja odluka Senata utvrđuju se Poslovnikom o radu Senata koji usvaja Senat.

POGLAVLJE III – REKTOR

Član 42. (Izbor rektora)

- (1) Postupak izbora rektora pokreće Senat donošenjem odluke o raspisivanju konkursa za izbor rektora.
- (2) Odluka iz stava (1) ovog člana sadrži cjelovit tekst konkursa kao i opće i posebne kriterije za izbor rektora, uz odredbu o imenovanju tročlane Komisije za provođenje konkursa koju čini jedan predstavnik Senata koji ne može biti lice koje se prijavljuje za rektora, jedan predstavnik osnivača i jedan član iz reda diplomiranih pravnika na Univerzitetu.
- (3) Rektor se bira na mandatni period od četiri godine sa mogućnošću još jednog uzastopnog izbora.
- (4) Izbor rektora vrši se na osnovu rezultata javnog konkursa koji ne može biti kraći od 15 dana, a koji se objavljuje na internet stranici Univerziteta, uvažavajući rok koji omogućuje da se rektor izabere prije isteka mandata rektora na dužnosti.
- (5) Za rektora može biti izabran nastavnik u naučnonastavnom ili umjetničkonastavnom zvanju redovnog profesora na Univerzitetu, uz obavezu podnošenja izjave o prihvatanju zasnivanja radnog odnosa sa Univerzitetom.
- (6) Pored općih zakonskih uslova, lice koje se prijavljuje za rektora obavezno je uz prijavu za konkurs priložiti i pozitivno mišljenje Osnivača na dostavljeni plan i viziju razvoja Univerziteta kao i dokaz o poznavanju engleskog jezika, u suprotnom se isključuje iz konkursne procedure.
- (7) Ukoliko lice koje se prijavljuje na konkurs ne pribavi mišljenje Osnivača u roku do zatvaranja konkursa, uz prijavu je obavezan priložiti dokaz o blagovremenoj predaji zahtjeva za ocjenu predloženog plana i vizije razvoja Osnivaču.
- (8) U slučaju iz stava (7) ovog člana, Osnivač razmatra predloženi plan i viziju razvoja i dostavlja mišljenje Univerzitetu najkasnije u roku od 7 dana od dana zatvaranja konkursa.
- (9) Komisija za provođenje konkursa za izbor rektora obavezna je najkasnije u roku od 15 dana od dana isteka roka za dostavljanje prijave na konkurs pregledati sve prijave, te predsjedavajućem Senata dostaviti izvještaj o urednosti i blagovremenosti istih, odnosno sačiniti listu kandidata koji ispunjavaju formalnopravne uslove za izbor, radi zakazivanja izborne sjednice.
- (10) Nakon dostavljanja izvještaja i liste kandidata iz stava (9) ovog člana, predsjedavajući Senata zakazuje izbornu sjednicu na kojoj se bira rektor tajnim glasanjem natpolovičnom većinom od ukupnog broja članova Senata.
- (11) Ukoliko niti jedan od kandidata ne dobije potrebnu većinu glasova, donosi se odluka o poništavanju konkursa i raspisivanju novog konkursa za izbor rektora, te se vrši imenovanje vršioca dužnosti rektora, u skladu sa ovim Statutom.
- (12) Senat nakon izbora rektora glasanjem će na istoj sjednici ovlastiti člana Senata koji će potpisati odluku o izboru rektora.
- (13) Najkasnije sedam dana od donošenja odluke o izboru rektora, član Senata iz stava (12) ovoga člana obavezan je potpisati odluku o izboru rektora i istu proslijediti pravnoj službi, koja blagovremeno posredstvom generalnog sekretara dostavlja informaciju o izboru prijavljenim kandidatima na konkurs. Istu odluku pravna služba Univerziteta dostavlja Upravnom odboru radi zaključivanja ugovora o radu sa rektorom Univerziteta.

- (14) Odluka senata o izboru je konačna, a protiv iste se može pokrenuti postupak pred nadležnim sudom u Sarajevu u roku od 30 dana od dana prijema odluke.
- (15) Znak rektorske časti je rektorska toga (odora), čiji se oblik i sadržaj, odnosno izgled utvrđuju općim aktom koji donosi Senat.

Član 43.

(Imenovanje vršioca dužnosti rektora)

- (1) U slučaju neuspješnog izbora rektora, ostavke, prijevremenog razrješenja, kao i izbora rektora na neku drugu funkciju nespojivu sa funkcijom rektora, predsjedavajući Senata zakazuje sjednicu gdje se bez konkursa, na period od najduže šest mjeseci, imenuje vršilac dužnosti rektora iz reda redovnih ili vanrednih profesora koji imaju zaključen ugovor o radu na Univerzitetu i koji ispunjavaju uslove za izbor rektora u skladu sa Statutom.
- (2) Prijedlog za vršioca dužnosti rektora, u smislu stava (1) ovog člana, može dati svaki član Senata, pri čemu se izbor vrši tajnim glasanjem natpolovičnom većinom od ukupnog broja članova Senata sa pravom glasa.
- (3) Senat, nakon izbora vršioca dužnosti rektora, glasanjem na istoj sjednici ovlašćuje člana Senata koji potpisuje odluku o imenovanju vršioca dužnosti rektora.
- (4) Istovremeno sa imenovanjem vršioca dužnosti rektora, Senat donosi odluku o raspisivanju konkursa za izbor rektora.

Član 44.

(Prava i obaveze rektora)

- (1) Rektor obavlja poslove utvrđene zakonom i Statutom Univerziteta, a naročito:
- a) zastupa i predstavlja Univerzitet;
 - b) organizira i rukovodi radom Univerziteta i odgovoran je za zakonitost rada;
 - c) podnosi na razmatranje Senatu godišnje izvještaje o radu Univerziteta;
 - d) donosi pojedinačne akte u skladu sa zakonom i Statutom;
 - e) predlaže opće akte u skladu sa zakonom i Statutom;
 - f) predlaže tijelima Univerziteta mjere za unapređenje rada;
 - g) donosi rješenje o imenovanju i razrješenju dekana fakulteta;
 - h) predlaže Upravnom odboru mjere za djelotvorno i zakonito obavljanje djelatnosti Univerziteta;
 - i) predlaže Upravnom odboru i Senatu plan rada i razvoja Univerziteta;
 - j) predlaže Upravnom odboru unutrašnju organizaciju i sistematizaciju radnih mjesta;
 - k) izvršava odluke Upravnog odbora i drugih tijela Univerziteta;
 - l) raspoloža sredstvima do iznosa utvrđenog Statutom;
 - m) odlučuje o zasnivanju radnog odnosa na Univerzitetu i zaključivanju ugovora o radu, kao i o pravima, obavezama i odgovornostima zaposlenika iz radnog odnosa u skladu sa zakonom i planovima razvoja koje utvrdi Upravni odbor;
 - n) podnosi Upravnom odboru izvještaj o radu sa finansijskim poslovanjem Univerziteta;
 - o) razmatra i usvaja izvještaj o radu dekana, koji se u slučaju neusvajanja prosljeđuje Upravnom odboru na konačno odlučivanje;
 - p) podnosi Senatu izvještaje o akademskim pitanjima na Univerzitetu;
 - q) izvršava finansijski plan koji usvoji Upravni odbor;
 - r) učestvuje u radu Rektorske konferencije Bosne i Hercegovine;
 - s) obavlja i druge poslove u skladu sa zakonom i Statutom.
- (2) Rektor saziva sjednice Senata i predsjedava njima.

- (3) Rektor u radu pomažu prorektori, generalni sekretar i druga tijela utvrđena Zakonom i Statutom.
- (4) Rektor ima pravo na samostalno donošenje odluka iz domena svoje nadležnosti i odgovoran je za zakonitost istih.
- (5) Rektor je odgovoran za poštivanje zakona i izvršavanje odluka nadležnih organa vlasti i tijela Univerziteta u obavljanju registrirane djelatnosti.
- (6) Rektor je obavezan obustaviti izvršenje odluke dekana ili nekog drugog tijela fakulteta, ako je protivna zakonu, podzakonskim i provedbenim aktima i ovom Statutu, i o tome u roku od sedam dana od dana donošenja odluke obavijestiti Senat, odnosno Upravni odbor u skladu sa njihovim nadležnostima.
- (7) U slučaju kada je protiv osobe nosioca funkcije u tijelima Univerziteta i/ili člana akademskog osoblja potvrđena optužnica za krivična djela za koja se odredbama Krivičnog zakona Federacije Bosne i Hercegovine/Bosne i Hercegovine može izreći kazna zatvora u trajanju od šest mjeseci i više, rektor, odnosno Upravni odbor u slučaju razrješenja rektora obavezan je donijeti odluku o suspenziji iz nastavno-naučnog procesa do okončanja krivičnog postupka.
- (8) U smislu stava (7) ovog člana, osobama kojima je izrečena pravosnažna presuda ili mjera zbog počinjenog jednog ili više krivičnih djela, rektor odnosno Upravni odbor u slučaju rektora kao počinioca krivičnog djela obavezan je donijeti rješenje o prestanku radnog odnosa i u pisanoj formi obavijestiti organ koji vrši nadzor nad zakonitošću rada Univerziteta.
- (9) Rektor je ovlašten suspendovati dekana ukoliko ima dokaz nadležnog tijela da nezakonito izvršava svoje obaveze utvrđene zakonom, Statutom ili drugim općim aktima Univerziteta i o tome u roku od 24 sata od dana donošenja obrazložene odluke obavijestiti:
 - a) Upravni odbor
 - b) Senat i
 - c) vijeće fakulteta.
- (10) U slučaju iz stava (9) ovog člana, rektor je obavezan imenovati osobu koja će vršiti dužnost predsjedavajućeg vijeća, te sazvati sjednicu fakultetskog vijeća u roku od sedam dana od dana suspenzije, radi imenovanja vršioca dužnosti dekana za vrijeme trajanja suspenzije.
- (11) Vijeće fakulteta imenuje vršioca dužnosti za period suspenzije, a koji ne može biti duži od šest mjeseci.
- (12) Rektor može pokrenuti i postupak utvrđivanja odgovornosti dekana za počinjene povrede iz zakona, Statuta ili drugog općeg akta.
- (13) Rektor i prorektor u toku mandata ne mogu vršiti funkciju dekana ili prodekana, kao ni člana Upravnog odbora.

Član 45.

(Ograničenja rektora)

- (1) Rektor ne može bez prethodne pisane saglasnosti Upravnog odbora i Osnivača vršiti pravne poslove i radnje koje se odnose na opterećenje ili otuđenje imovine Univerziteta, stvarati kreditne i druge vrste zaduženja.
- (2) Rektor ne može bez prethodne pisane saglasnosti Osnivača donositi rješenje o imenovanju i razrješenju generalnog sekretara Univerziteta i menadžera Službe za finansije i ekonomske pitanja Univerziteta.

Član 46.

(Prestanak mandata rektora)

Rektoru prestaje mandat u sljedećim slučajevima:

- a) istekom perioda na koji je biran;
- b) ostavkom;
- c) prijevremenim razrješenjem;
- d) izborom na neku drugu funkciju nespojivu sa funkcijom rektora.

Član 47.

(Prijevremeno razrješenje rektora)

- (1) Senat donosi odluku o razrješenju rektora i prije isteka perioda na koji je izabran odnosno imenovan, u slučaju:
 - a) ako Univerzitet negativno posluje unutar dvije uzastopne godine;
 - b) ako Upravni odbor ne usvoji izvještaj o radu za traženi period;
 - c) ako odbije ili ne izvrši odluke Osnivača ili Upravnog odbora;
 - d) ako neodgovornim rukovođenjem onemogući Univerzitet u ostvarenju prihoda kroz realizaciju međunarodnih i domaćih projekata ili ostvarenim prihodom po tom osnovu nenamjenski raspolaže;
 - e) ako bude pravosnažno osuđen za krivično djelo;
 - f) ako ne izvršava zadatke predviđene zakonom i ovim Statutom ili ih izvršava suprotno njima;
 - g) ako prekorači ovlašćenja i time nanese štetu ugledu Univerziteta, a posebno u slučaju utroška sredstava u iznosu većem od iznosa odobrenog Statutom ili preuzmanja ovlašćenja iz nadležnosti Upravnog odbora ili Osnivača;
 - h) zbog odsutnosti ili spriječenosti da u neprekidnom periodu dužem od tri mjeseca obavlja dužnost;
 - i) ako svojim ponašanjem povrijedi ugled funkcije rektora.
- (2) Obrazložen prijedlog za razrješenje rektora, zbog jednog ili više razloga navedenih u stavu (1) ovog člana, Senatu može podnijeti:
 - a) Osnivač Univerziteta;
 - b) Upravni odbor;
 - c) najmanje jedna trećina članova Senata;
 - d) najmanje jedna trećina vijeća članica.
- (3) U slučajevima iz stava (1) Senat donosi odluku o razrješenju po službenoj dužnosti (*ex officio*).
- (4) Rektor je dužan sazvati sjednicu Senata najkasnije petnaest dana od dana prijema prijedloga iz stava (3) ovog člana i o tome obavijestiti Osnivača odnosno Upravni odbor.
- (5) U slučaju da rektor na sazove sjednicu Senata u roku iz stava (4) ovog člana, Upravni odbor imenuje vršioca dužnosti predsjedavajućeg Senata koji je obavezan u roku od sedam dana od dana imenovanja sazvati sjednicu Senata.
- (6) O prijedlogu za prijevremeno razrješenje rektora, Senat odlučuje tajnim glasanjem, a za donošenje odluke o razrješenju potrebna je natpolovična većina od ukupnog broja članova Senata.
- (7) Nakon donošenja odluke o razrješenju rektora, Senat donosi odluku o imenovanju vršioca dužnosti rektora i raspisivanju konkursa za izbor rektora, u skladu sa ovim Statutom.

POGLAVLJE IV - PROREKTORI

Član 48.

(Izbor i razrješenje prorektora)

- (1) U skladu sa potrebom utvrđenom od strane Osnivača, a na prijedlog rektora, Senat bira:
 - a) Prorektora za akademska i studentska pitanja;
 - b) Prorektora za međunarodnu saradnju i istraživanje;
 - c) Prorektora za opće poslove.Izuzetno, Univerzitet može imati i manje od tri prorektora.
- (2) U slučaju imenovanja više od jednog prorektora, najmanje jedan prorektor mora biti državljanin Bosne i Hercegovine.
- (3) Prorektori su odgovorni za svoj rad rektoru i Senatu.
- (4) Prorektori moraju biti u naučnonastavnom ili umjetničkonastavnom vanrednog profesora ili redovnog profesora, koji su u radnom odnosu sa punim radnim vremenom na Univerzitetu.
- (5) Izbor se vrši većinom glasova od ukupnog broja članova Senata sa pravom glasa.
- (6) Mandat svih prorektora, osim u izuzetnim okolnostima, prati mandat rektora.
- (7) Pod izuzetnim okolnostima iz stava (6) ovog člana podrazumijevaju se sljedeći razlozi:
 - a) prijevremena ostavka prorektora;
 - b) prijevremeno razrješenje;
 - c) izbor na neku drugu funkciju nespojivu sa funkcijom prorektora;
 - d) ostvarivanje loših poslovnih rezultata iz djelokruga rada prorektora;
 - e) pravosnažna osuda za krivično djelo;
 - f) neizvršavanje zadataka predviđenih zakonom i Statutom ili postupanje suprotno njima;
 - g) prekoračenje ovlašćenja i nanošenje štete Univerzitetu u većem obimu;
 - h) narušavanje ugleda funkcije prorektora, i
 - i) prestanak radnog odnosa prorektora na Univerzitetu.
- (8) Obrazložen prijedlog za razrješenje prorektora, zbog jednog ili više razloga navedenih u stavu (7) ovog člana, Senatu može podnijeti rektor ili Upravni odbor.
- (9) U slučaju neimenovanja nekog od prorektora iz stava (1), Senat može odlučiti da dio nadležnosti tog prorektora obavlja neki od imenovanih prorektora.
- (10) Vršilac dužnosti prorektora ima sva prava i obaveze izabranog prorektora.

Član 49.

(Nadležnosti prorektora)

- (1) Prorektori imaju sljedeće nadležnosti:
 - a) Prorektor za akademska i studentska pitanja:
 - 1) predlaganje odgovarajućih rješenja u skladu sa utvrđenom politikom u oblasti nastavnog procesa;
 - 2) koordinacija aktivnosti na nivou Univerziteta koje se odnose na izradu nastavnih planova i programa te praćenje njihove implementacije;
 - 3) rukovođenje aktivnostima na nivou Univerziteta koje se tiču upisa studenata na sva tri ciklusa studija;
 - b) Prorektor za međunarodnu saradnju i istraživanje:
 - 1) predlaganje odgovarajućih rješenja u skladu sa utvrđenom politikom u oblasti međunarodne saradnje i istraživanja;
 - 2) koordinacija aktivnosti na nivou Univerziteta koje se odnose na međunarodnu saradnju i istraživanja;

- 3) preduzimanje aktivnosti i mjera na nivou Univerziteta radi uspostavljanja optimalne i poželjne saradnje po pitanju nastave sa drugim Univerzitetima u zemlji i inozemstvu;
 - 4) preduzimanje aktivnosti i mjera na nivou Univerziteta koje za cilj imaju razmjenu akademskog osoblja;
 - 5) iniciranje i koordinacija aktivnosti i mjera na nivou Univerziteta, uključujući i prijedloge nadležnim organima, koje su usmjerene na uspostavljanje saradnje u zajedničkim projektima po pitanju nastave sa univerzitetima u zemlji i inozemstvu;
 - 6) predlaganje općih i pojedinačnih pravnih akata vezanih za međuuniverzitetsku saradnju;
 - 7) realiziranje mobilnosti studenata i akademskog osoblja;
 - 8) obavljanje poslova koji po svojoj prirodi spadaju u nadležnost međuuniverzitetske saradnje;
- c) Prorektor za opće poslove
- 1) koordinacija aktivnosti na nivou Univerziteta koja se odnosi na organizacionu strukturu i usklađenost rada stručnih službi sa potrebama Univerziteta;
 - 2) predlaganje mjera za implementaciju standarda iz oblasti visokog obrazovanja na Univerzitetu;
- (2) Pored nadležnosti navedenih u Statutu, nadležnosti prorektora koje su navedene u okviru sistematizacije radnih mjesta na Univerzitetu, mogu se međusobno preraspodijeliti odlukom o imenovanju prorektora.

Član 50.

(Student-prorektor)

Ukoliko postoji iskazana potreba za takvim imenovanjem od strane Studentskog parlamenta, Senat na prijedlog Studentskog parlamenta može izabrati studenta-prorektora.

POGLAVLJE V – SEKRETARIJAT I DRUGA STRUČNA I SAVJETODAVNA TIJELA

Član 51.

(Univerzitetski sekretarijat)

- (1) Administrativno-pravne i tehničke poslove obavlja sekretarijat putem svojih službi.
- (2) Sekretarijat rukovodi generalni sekretar sa svojim zamjenicima.
- (3) Sekretarijat organizira se radi realiziranja poslova i zadataka u okviru djelatnosti Univerziteta, u sljedećim oblastima:
 - a) vođenja pravnih i administrativnih poslova;
 - b) podrške nastavnom procesu;
 - c) podrške naučnoistraživačkom radu;
 - d) izdavačke djelatnosti;
 - e) međunarodne saradnje;
 - f) finansija;
 - g) protokolarnih poslova i odnosa sa javnošću;
 - h) informaciono - dokumentacionih poslova;
 - i) ekonomskih i tehničkih poslova;
 - j) upravljanja objektima i obezbjeđenja;
 - k) pomoćnih i drugih poslova.
- (4) Pored poslova utvrđenih Zakonom, generalni sekretar sa svojim zamjenicima, usklađuje rad sekretara fakulteta i stručnih službi Univerziteta.

- (5) Generalni sekretar, odnosno odgovarajući zamjenik generalnog sekretara i sekretari fakulteta pružaju usluge pravnog savjetovanja i drugu pomoć na Univerzitetu odnosno fakultetu.
- (6) Sekretari fakulteta u pravilu čine Službu za pravne poslove i normativnu djelatnost.
- (7) Organizacija rada sekretarijata i Službe za pravne poslove i normativnu djelatnost bliže se uređuje sistematizacijom radnih mjesta na Univerzitetu.

Član 52.

(Rektorski kolegij)

Rektorski kolegij je stručno tijelo rektora čiji sastav, funkciju i nadležnost propisuje rektor svojom odlukom.

Član 53.

(Centar za istraživanje i razvoj)

Centar za istraživanje i razvoj je stručno tijelo koje ima nadležnost da prati realizaciju, te predlaže i preduzima mjere za poboljšanje infrastrukture naučnoistraživačkog rada i ostalih aktivnosti, u skladu sa općim aktom Univerziteta.

Član 54.

(Ured za osiguranje kvaliteta)

Ured za osiguranje kvaliteta sudjeluje u stvaranju mreže za osiguranje i unaprjeđenje kvaliteta na Univerzitetu, te stvara pretpostavke za integraciju Univerziteta u nacionalnu i međunarodnu mrežu za osiguranje kvaliteta.

Član 55.

(Centar za inovacije i poduzetništvo)

Centar za inovacije i poduzetništvo ustanovljen je s ciljem stvaranja okvira za stalan razvoj inovacija i poduzetništva na Univerzitetu, kao i ukupnih kapaciteta iz oblasti rukovođenja organizacijama koje se bave inovacijama i poduzetništvom, a što se bliže uređuje općim aktom.

Član 56.

(Centar za balkanske studije)

- (1) Centar za balkanske studije ustanovljen je s ciljem da podrži istraživačke aktivnosti u zemljama balkanskog regiona i razvija edukativne i savjetodavne aktivnosti na temu balkanskog regiona.
- (2) Organizacija i rad Centra za balkanske studije bliže se uređuje općim aktom koji donosi Upravni odbor.

Član 57.

(Etički savjet)

- (1) Etički savjet je stručno i savjetodavno tijelo Senata za oblast akademske etike i povezanih pitanja akademskog integriteta, a koji ima nadležnosti da:
 - a) donosi politiku etičkog djelovanja, etičkog programa i programa obavezne edukacije iz oblasti etike, kao i mjera i/ili intervencija u cilju realizacije programa;
 - b) predlaže Senatu usvajanje Etičkog kodeksa (dalje: Kodeks) i drugih akata u skladu sa zakonom;
 - c) prati primjenu i poštivanje etičkih načela od strane osoba na koje se odnosi Kodeks;
 - d) štiti prava, sigurnost, dostojanstvo i dobrobit učesnika istraživanjama, a za tu svrhu ima pravo da razmatra prijave za istraživanje, te da daje mišljenje o učešću predloženog učesnika istraživanja odnosno i da li je određeno istraživanje ispravno sa etičkog stajališta;

- e) provodi postupke za utvrđivanje postojanja povrede načela iz Kodeksa;
 - f) predlaže Senatu izricanje odgovarajućih mjera nakon što utvrdi da je učinjena povreda Kodeksa;
 - g) podnosi prijedloge rektoru za izricanje drugih sankcija/mjera, ukoliko povreda načela sadržanih u Kodeksu, istovremeno, predstavlja i povredu radne obaveze;
 - h) samostalno donosi plan rada;
 - i) donosi pravilnik o radu Etičkog savjeta;
 - j) donosi mehanizme zaštite protiv diskriminacije, uznemiravanja na osnovu spola i seksualnog uznemiravanja;
 - k) vrši i druge zadatke u skladu sa Statutom i Kodeksom.
- (2) Etički savjet sačinjavaju članovi akademskog osoblja iz svih naučnih i umjetničkih oblasti na Univerzitetu, predstavnik studenata i prorektor za naučnoistraživački rad.
- (3) Članove Etičkog savjeta bira Senat na prijedlog vijeća fakulteta ili drugih ovlaštenih predlagača, na mandat od četiri godine, izuzev predstavnika studenata, čiji mandat traje jednu godinu dana.
- (4) Etički savjet obavlja poslove iz svoje nadležnosti na sjednicama koje saziva predsjednik Etičkog savjeta.

Član 58.

(Centar za psihološko savjetovanje studenata)

Centar za psihološko savjetovanje studenata pruža stručnu pomoć studentima kroz aktivnosti naučno-stručnog savjetovanja, u skladu sa općim aktom.

Član 59.

(Centar poslovne izvrsnosti - BECIUS)

- (1) Centar BECIUS je stručno tijelo Univerziteta koje predstavlja institucionalni okvir za generiranje inovacija i održivog rješenja kod pozicioniranja Univerziteta i rada u saradnji sa industrijom i inovacijama.
- (2) Detaljnija pitanja o organizaciji i radu centra uređuju se općim aktom.

Član 60.

(Imenovanje drugih tijela)

- (1) Upravni odbor, Senat i rektor mogu imenovati stalna tijela kao što su komisije, odbori i druga stručna i savjetodavna tijela.
- (2) Pored tijela iz stava (1) ovog člana, Senat, Upravni odbor i rektor mogu imenovati i *ad hoc* tijela prema ukazanoj potrebi, a što se utvrđuje općim ili pojedinačnim aktom.

DIO ŠESTI - TIJELA I NADLEŽNOSTI FAKULTETA

Član 61.

(Fakultet)

Fakultet predstavlja organizacionu jedinicu Univerziteta koja obavlja nastavnu, umjetničku, naučnoistraživačku i umjetničkoistraživačku djelatnost u oblasti jedne ili više srodnih, odnosno međusobno povezanih naučnih disciplina i osigurava njihov razvoj i druge djelatnosti koje proizilaze iz prirode osnovne djelatnosti fakulteta, u skladu sa zakonom i Statutom.

Član 62.
(Tijela fakulteta)

Tijela fakulteta čine:

- a) vijeće,
- b) dekan i
- c) druga stručna i savjetodavna tijela kao što su: prodekan/i, dekanski kolegij i vijeće studijskog programa.

POGLAVLJE I - VIJEĆE FAKULTETA

Član 63.
(Vijeće fakulteta)

- (1) Vijeće fakulteta čine: nastavnici, predstavnici saradnika, stručnog nenastavnog osoblja i studenata, i to:
 - a) akademsko osoblje u zvanju docenta, vanrednog i redovnog profesora koje je u radnom odnosu na Univerzitetu,
 - b) predstavnici asistenata, viših asistenata i lektora koji su u radnom odnosu na Univerzitetu,
 - c) sekretar fakulteta kao predstavnik stručnog nenastavnog osoblja,
 - d) predstavnici studenata.
- (2) Član akademskog osoblja koji je u radnom odnosu na Univerzitetu, odnosno fakultetu, u skladu sa zakonom može biti član vijeća samo jednog fakulteta.
- (3) Članovi vijeća su student prodekan i po jedan predstavnik studenata sa svih ciklusa studija koji se realiziraju na određenom fakultetu, a koje bira Studentski parlament.
- (4) U slučaju da Studentski parlament ne izabere predstavnike prvog, drugog, trećeg i integrisanog ciklusa studija, funkciju predstavnika navedenih ciklusa studija obavlja student prodekan.
- (5) U slučaju da je izabranom predstavniku viših asistenta, asistenata ili studenata izrečena neka od disciplinskih mjera, vijeće fakulteta ima pravo odbiti prihvatiti članstvo u vijeću takvog člana i zatražiti izbor drugog predstavnika.

Član 64.
(Nadležnost vijeća)

Vijeće fakulteta posebno je nadležno da:

- a) donosi odluke o svim akademskim, nastavnim, naučnim, umjetničkim i stručnim pitanjima u okviru svoje nadležnosti;
- b) kreira i predlaže Smjernice za izbor u akademska zvanja Senatu i rektoru;
- c) inicira, vrši preispitivanje i predlaže nastavne planove i nastavne programe za sve cikluse studija;
- d) bira i razrješava dekana i prodekana,
- e) donosi opće akte fakulteta;
- f) formira komisiju za podnošenje izvještaja za izbor u naučnonastavna, umjetničkonastavna i naučnoistraživačka zvanja i utvrđuje prijedlog odluke o izboru kandidata;
- g) predlaže studijske programe svih ciklusa studija;
- h) bira i razrješava programskog koordinatora;
- i) predlaže Senatu program naučnoistraživačkog i umjetničkog rada i programe stručnog usavršavanja akademskog osoblja i drugih zaposlenika;

- j) predlaže komisije koje se imenuju za provođenje postupka stjecanja akademske titule i stručnog zvanja za sva tri ciklusa studija, odnosno bakaleureata, magistra i doktora nauka;
- k) daje prijedlog Senatu za izbor profesora emeritusa;
- l) razmatra zahtjeve i utvrđuje prijedloge za stručno usavršavanje akademskog osoblja u zemlji i inostranstvu;
- m) utvrđuje privremene posebne mjere za otklanjanje diskriminacije i neravnopravnosti;
- n) utvrđuje prijedlog broja studenata za upis u prvu godinu sva tri ciklusa studija;
- o) donosi odluku o izbornim predmetima u okviru studijskog programa koji će se izvoditi u određenoj studijskoj godini;
- p) utvrđuje prijedlog plana realizacije nastave prije početka studijske godine koji sadrži prijedlog liste odgovornih nastavnika i saradnika na fakultetu koji se dostavlja Senatu;
- q) analizira uspješnost izvođenja nastave i provedenih ispita iz nastavnih predmeta u semestru i studijskoj godini i utvrđuje mjere za unapređenje i poboljšanje;
- r) analizira, ocjenjuje i izvještava o rezultatima uspješnosti izvođenja nastave u okviru studijskih programa;
- s) utvrđuje prijedlog preventivnih i korektivnih mjera za unapređenje nastave;
- t) odlučuje po prigovoru studenata na rješenje dekana o mirovanju prava i obaveza studenata, odnosno odlučuje u drugom stepenu o pravima i obavezama studenata;
- u) utvrđuje prijedlog programa rada i razvoja fakulteta;
- v) daje rektoru mišljenje na prijedlog pravilnika o unutrašnjoj organizaciji i sistematizaciji radnih mjesta u djelu koji se tiče te članice;
- w) inicira i vrši evaluaciju studijskih programa za sve cikluse studija i to najmanje jedanput po isteku trajanja ciklusa studija u kojem se realizuje studijski program;
- x) bira i razrješava predstavnike fakulteta u tijela Univerziteta na način utvrđen Statutom i aktima Univerziteta;
- y) sačinjava dinamički plan potreba za raspisivanje konkursa za izbor u akademska zvanja prije početka studijske godine i dostavlja ga Senatu i Upravnom odboru;
- z) razmatra izvještaj o radu fakulteta za proteklu akademsku godinu;
- aa) donosi odluke o svim drugim akademskim, naučnim, umjetničkim i stručnim pitanjima na nivou fakulteta, koja nisu u nadležnosti Senata i drugih tijela Univerziteta;
- bb) obavlja i druge poslove u skladu sa zakonom, Statutom i općim aktom Univerziteta.

Član 65.

(Sjednice vijeća fakulteta)

- (1) Vijeće fakulteta obavlja poslove iz svog djelokruga na sjednicama koje se u pravilu najmanje jedanput mjesečno.
- (2) Dekan je dužan sazvati sjednicu vijeća fakulteta kada to, u pisanoj formi, zahtjeva najmanje polovina članova vijeća fakulteta, rektor ili/i Senat.

Član 66.

(Donošenje odluka vijeća fakulteta)

- (1) Vijeće fakulteta može raspravljati određena pitanja za koje je nadležno i odlučivati kada na sjednici prisustvuje više od polovine od ukupnog broja članova vijeća.
- (2) Vijeće fakulteta donosi odluke većinom glasova ukupnog broja članova vijeća, osim kada zakonom, Statutom ili drugim općim aktom za odlučivanje o pojedinim pitanjima nije određena druga kvalifikovana većina.

- (3) Vijeće fakulteta donosi odluke javnim glasanjem, osim za ona pitanja za koja je zakonom, Statutom ili drugim općim aktom utvrđeno da se odlučuje tajnim glasanjem.
- (4) Dekan može zatražiti od vijeća zauzimanje stava, po pojedinim pitanjima, kada smatra da je to od posebne važnosti za fakultet i kada procijeni da će na taj način rješavanje određenog problema biti kvalitetnije i efikasnije.
- (5) Sjednicom vijeća fakulteta predsjedava dekan.
- (6) Sjednice vijeća fakulteta saziva i njihovim radom rukovodi dekan fakulteta, a u njegovoj odsutnosti jedan od prodekana kojeg dekan ovlasti.
- (7) Rad vijeća se detaljnije uređuje Poslovníkom o radu vijeća koji donosi vijeće fakulteta.

POGLAVLJE II – DEKAN

Član 67.

(Izbor dekana)

- (1) Izbor dekana vrši se na osnovu javnog konkursa koji objavljuje vijeće fakulteta na internet stranici Univerziteta najkasnije dva mjeseca prije isteka mandata.
- (2) Vijeće fakulteta pokreće postupak za izbor dekana odlukom o raspisivanju konkursa.
- (3) Odluka iz stava (2) ovog člana sadrži cjelovit tekst konkursa kao i opće i posebne kriterije za izbor dekana, uz odredbu o imenovanju tročlane komisije za provođenje konkursa koju čine tri člana akademskog osoblja, i sekretar fakulteta kao zapisničar.
- (4) Dekan se bira na mandatni period od četiri godine sa mogućnošću još jednog uzastopnog izbora.
- (5) Dekan fakulteta bira se iz reda članova akademskog osoblja u nastavnom zvanju redovnog profesora, vanrednog profesora ili docenta, koji je u radnom odnosu sa punim radnim vremenom na Univerzitetu, pri čemu se puno radno vrijeme definiše se kao radni angažman od 40 sati sedmično.
- (6) Pored općih zakonskih uslova, lice koje se prijavljuje za dekana obavezno je uz prijavu za konkurs priložiti i pozitivno mišljenje Upravnog odbora na dostavljeni plan i viziju razvoja fakulteta, u suprotnom se isključuje iz konkursne procedure.
- (7) Ukoliko lice koje se prijavljuje na konkurs ne pribavi i priloži pozitivno mišljenje iz stava (6) ovog člana u roku do zatvaranja konkursa, uz prijavu je obavezan priložiti dokaz o blagovremenoj predaji zahtjeva za ocjenu predloženog plana i vizije razvoja Upravnom odboru.
- (8) U slučaju iz stava (7) ovog člana, Upravni odbor dostavlja mišljenje nadležnom fakultetu, najkasnije u roku od sedam dana od dana zatvaranja konkursa.
- (9) Komisija za provođenje konkursa obavezna je najkasnije u roku od 15 dana od dana isteka roka za dostavljanje prijave na konkurs otvoriti i pregledati sve prijave, te predsjedavajućem vijeća dostaviti izvještaj o urednosti i blagovremenosti istih, odnosno sačiniti listu kandidata koji ispunjavaju formalnopravne uslove za izbor.
- (10) Nakon dostavljanja izvještaja i liste kandidata iz stava (9) ovog člana, predsjedavajući vijeća zakazuje izbornu sjednicu na kojoj se vrši izbor tajnim glasanjem članova vijeća fakulteta, pri čemu je za donošenje odluke o imenovanju potrebna podrška natpolovične većine od ukupnog broja članova vijeća.
- (11) Vijeće fakulteta, nakon donesene odluke o izboru dekana, dostavlja prijedlog rješenja sa pratećom dokumentacijom rektoru na potpis.
- (12) Rektor je obavezan potpisati rješenje o imenovanju i isto prosljediti fakultetu radi dostavljanja obavještenja prijavljenim kandidatima o obavljenom izboru kao i Ministarstvu, najkasnije sedam dana od dana prijema rješenja na potpis.

- (13) Rješenje rektora o imenovanju dekana je konačno, a protiv istog se može pokrenuti upravni spor pred nadležnim sudom u Sarajevu u roku od 30 dana od dana prijema.
- (14) Rektor može odbiti da potpiše rješenje o imenovanju, uz obrazloženje koje dostavlja vijeću fakulteta na očitovanje. Ukoliko vijeće fakulteta prihvati takvo obrazloženje, postupak za izbor dekana se ponavlja, u suprotnom, obrazloženje rektora i očitovanje vijeća razmatra Senat i donosi konačnu odluku.
- (15) Dekan za svoj rad odgovara vijeću fakulteta, rektoru i Upravnom odboru Univerziteta.
- (16) Dekanu u radu pomažu prodekani, sekretar fakulteta i druga tijela utvrđena Statutom.
- (17) Dekan je odgovoran za poštivanje zakona i izvršavanje odluka vijeća fakulteta, univerzitetskih tijela i organa vlasti u skladu sa zakonom i Statutom.
- (18) Znak dekanske časti je dekanska toga (odora), čiji se oblik i sadržaj, odnosno izgled, utvrđuje općim aktom koji donosi Senat.

Član 68.

(Imenovanje vršioca dužnosti dekana)

- (1) U slučaju neuspješnog izbora dekana, ostavke, kao i izbora dekana na neku drugu funkciju nespojivu sa funkcijom dekana, vijeće donosi odluku o izboru vršioca dužnosti dekana, u skladu sa Statutom.
- (2) Vijeća fakulteta će bez konkursa, tajnim glasanjem, imenovati vršiloca dužnosti iz reda nastavnika u akademskom zvanju docenta, vanrednog i redovnog profesora zaposlenih na Univerzitetu, između kandidata koji ispunjavaju uslove za izbor dekana u skladu sa Statutom.
- (3) Rektor je obavezan potpisati rješenje o imenovanju vršioca dužnosti dekana iz stava (2) ovog člana.
- (4) Vršilac dužnosti se imenuje na period od najduže šest mjeseci od dana imenovanja i ima sva prava i dužnosti dekana.
- (5) Postupak imenovanja vršioca dužnosti dekana iz ovog člana analogno se primijenjuje i u slučaju ostavke vršioca dužnosti dekana.

Član 69.

(Nadležnosti dekana)

- (1) Dekan ima sljedeće nadležnosti:
 - a) rukovodi fakultetom u skladu sa zakonom i statutom;
 - b) zastupa i u pravnom prometu predstavlja organizacionu jedinicu u skladu sa zakonom, statutom i općim aktima;
 - c) predlaže planove rada i razvoja fakulteta;
 - d) podnosi izvještaj o radu fakulteta za prethodnu studijsku godinu rektoru najkasnije do 30. septembra tekuće godine;
 - e) donosi pojedinačne akte u skladu sa zakonom, Statutom i općim aktima;
 - f) saziva i predsjedava sjednicama vijeća fakulteta;
 - g) odlučuje o pravima i obavezama studenata u prvom stepenu i donosi odluke o istim;
 - h) predlaže rektoru unutrašnju organizaciju i sistematizaciju radnih mjesta na fakultetu;
 - i) suspendira rukovodioca podorganizacione jedinice ili nekog drugog tijela fakulteta ukoliko isti ne izvršava zakonito i savjesno svoje obaveze definirane zakonom, Statutom ili drugim općim aktom Univerziteta i o tome u roku od sedam dana od dana donošenja odluke obavijesti vijeće fakulteta i rektora;
 - j) pokreće postupak odgovornosti programskog koordinadora ili člana akademskog osoblja za počinjene povrede zakona, Statuta ili drugog općeg akta Univerziteta;

- k) odgovaran je za provođenje odluka, zaključaka i drugih akata nadležnih organa;
 - l) na prijedlog vijeća imenuje komisije u postupku stjecanja akademske titule i stručnog zvanja bakaleureata i magistra;
 - m) dostavlja rektoru zapisnike sa sjednica vijeća fakulteta;
 - n) obavlja i druge poslove utvrđene zakonom, Statutom i općim aktom Univerziteta.
- (2) Dekan je obavezan poništiti, staviti van snage, odnosno obustaviti od izvršenja akt progamskog koordinатора ili nekog drugog tijela fakulteta, ako je protivan zakonu, podzakonskim i provedbenim aktima, i o tome obavijestiti u roku od sedam dana od dana donošenja odluke rektora Univerziteta.
- (3) Dekan u odsutnosti, može ovlastiti prodekana da ga zamjeni u obavljanju poslova iz nadležnosti dekana.
- (4) Ovlaštenje iz stava (3) ovog člana sačinjava se u pismenoj formi sa naznakom tačnog vremenskog perioda važenja ovlaštenja.

Član 70.

(Prestanak mandata i postupak razrješenja dekana)

- (1) Dekanu prestaje mandat:
- a) istekom perioda na koji je biran;
 - b) ostavkom;
 - c) prijevremenim razrješenjem;
 - d) izborom na neku drugu funkciju nespojivu sa funkcijom dekana.
- (2) Vijeće fakulteta donosi odluku o razrješenju dekana i prije isteka perioda na koji je imenovan:
- a) ako ostvaruje loše poslovne rezultate;
 - b) ako bude pravosnažno osuđen za krivično djelo;
 - c) ako ne izvršava zadatke predviđene zakonom i Statutom ili ih izvršava protivno njima;
 - d) ako Upravni odbor/ректор ne usvoje izvještaj o radu dekana za traženi period;
 - e) ukoliko odbije ili ne izvrši odluke rektora ili Upravnog odbora;
 - f) prekorači ovlašćenja i time nanese štetu fakultetu;
 - g) ako ne izvrši odluke senata, vijeća, rektora, te ostalih tijela Univerziteta, u skladu sa zakonom i Statutom;
 - h) zbog odsutnosti ili spriječenosti da u neprekidnom periodu dužem od tri mjeseca obavlja dužnost; i
 - i) ako svojim ponašanjem povrijedi ugled funkcije dekana.
- (3) Obrazložen prijedlog za razrješenje dekana, zbog jednog ili više razloga navedenih u stavu (2) ovog člana, vijeću fakulteta može podnijeti:
- a) Osnivač;
 - b) Upravni odbor;
 - c) najmanje jedna trećina članova Senata;
 - d) rektor;
 - e) najmanje jedna trećina članova vijeća fakulteta.
- (4) Dekan je dužan sazvati sjednicu vijeća fakulteta najkasnije 15 dana od dana prijema prijedloga iz stava (3) ovog člana i o tome obavijestiti rektora i Osnivača.
- (5) U slučaju da dekan ne sazove sjednicu vijeća fakuteta u roku predviđenom u prethodnom stavu, Senat će imenovati vršioca dužnosti predsjedavajućeg vijeća fakulteta, koji je dužan u roku od sedam dana od dana imenovanja sazvati sjednicu vijeća.

- (6) O prijevremenom razrješenju dekana, vijeće fakulteta odlučuje tajnim glasanjem, pri čemu je za donošenje odluke o razrješenju potrebna natpolovična većina od ukupnog broja članova vijeća.
- (7) U slučajevima razrješenja iz ovog člana, vijeće fakulteta postupa po službenoj dužnosti (*ex officio*).
- (8) Na istoj sjednici vijeća fakulteta, nakon donošenja odluke o razrješenju dekana, donosi se odluka o imenovanju vršioca dužnosti dekana i raspisivanju konkursa za izbor dekana.
- (9) Vršioca dužnosti dekana bira vijeće fakulteta, između kandidata koji ispunjavaju uslove za izbor dekana u skladu sa ovim Statutom, tajnim glasanjem, na vremenski period do šest mjeseci, natpolovičnom većinom ukupnog broja članova vijeća fakulteta.
- (10) Vijeće fakulteta, nakon donesene odluke o razrješenju, dostavlja prijedlog rješenja o razrješenju sa pratećom dokumentacijom rektoru na potpis.
- (11) Rješenje rektora o razrješenju dekana je konačno, a protiv iste se može pokrenuti upravni spor pred nadležnim sudom u Sarajevu u roku od 30 dana od dana prijema rješenja.

POGLAVLJE III – PRODEKANI

Član 71.

(Izbor prodekana)

- (1) U skladu sa prijedlogom dekana, vijeće bira dva prodekana:
 - a) Prodekana za nastavu i studentska pitanja, i
 - b) Prodekana za naučnoistraživački rad.
- (2) Prodekani se biraju iz reda akademskog osoblja koji su u radnom odnosu na Univerzitetu.

Član 72.

(Mandat i ovlaštenja prodekana)

- (1) Prodekan se imenuje na period od četiri godine, sa mogućnošću ponovnog izbora.
- (2) Mandat prodekana prati mandat dekana.
- (3) Prodekan za svoj rad odgovara dekanu i vijeću fakulteta.
- (4) U obavljanju poslova iz svog djelokruga, prodekan je ovlašten zahtijevati od nastavnika i saradnika na fakultetu dostavljanje potrebnih podataka i dokumentacije.
- (5) Odlukom o imenovanju prodekana određuje se obim ovlaštenja prodekana.

Član 73.

(Dužnosti prodekana)

Odlukom o imenovanju prodekana određuju se opća i posebna zaduženja prodekana u skladu sa organizacijom i sistematizacijom radnih mjesta na Univerzitetu, a mogu se dodijeliti i neka od sljedećih dužnosti:

- a) da pomaže dekanu u njegovom radu;
- b) da učestvuje u pripremi sjednica vijeća fakulteta;
- c) da učestvuje u realizaciji odluka vijeća fakulteta i Senata koje se tiču nastavnog procesa fakulteta;
- d) da predlaže dekanu plan pokrivenosti nastave na dodiplomskim predmetima;
- e) da prati realizaciju izvođenja nastave i održavanja ispitnih rokova;
- f) da predlaže dekanu angažovanje spoljnih saradnika u nastavi;
- g) da saraduje sa organizacionim, podorganizacionim jedinicama i programima na Univerzitetu;
- h) da ostvaruje saradnju sa studentskim organizacijama Univerziteta;

- i) da preduzima mjere za usavršavanje nastavnika i saradnika u cilju stjecanja novih i produbljivanja stečenih znanja kroz različite oblike usavršavanja;
- j) da podstiče stvaralački i kreativni rad na fakultetu u cilju stjecanja novih i korištenja postojećih znanja za primjenu u različitim oblicima ljudskog djelovanja;
- k) da predlaže program izdavačke djelatnosti fakulteta;
- l) da obavlja poslove vezane za planove nabavki;
- m) da obavlja i druge poslove po nalogu dekana.

Član 74.

(Postupak razrješenja prodekana)

- (1) Na prijedlog dekana, prodekan može biti razriješen i prije isteka mandata na koji je izabran, analogno razlozima u slučaju razrješenja dekana.
- (2) Inicijativu za razrješenje mogu dati rektor, dekan ili najmanje jedna trećina članova vijeća fakulteta.
- (3) O prijedlogu za razrješenje prodekana odlučuje vijeće fakulteta natpolovičnom većinom od ukupnog broja članova vijeća fakulteta.
- (4) Nakon donošenja odluke o razrješenju prodekana, vijeće fakulteta na prijedlog dekana na istoj sjednici može predložiti drugog člana akademskog osoblja na funkciju prodekana, koji ispunjava uslove u skladu sa zakonom i Statutom.

Član 75.

(Student prodekan)

- (1) Za studenta prodekana može biti birano lice koje ispunjava uvjete utvrđene zakonom, Statutom i statutom Studentskog parlamenta Univerziteta.
- (2) Studenta prodekana bira i razrješava Studentski parlament.
- (3) Mandat studenta prodekana je jedna godina dana, uz mogućnost ponovnog izbora.
- (4) U slučaju da nakon isteka mandata Studentski parlament ne delegira novog studenta prodekana, mandat prethodno imenovanog studenta prodekana traje do izbora novog, a najduže godinu dana.
- (5) Student prodekan obavlja sljedeće poslove:
 - a) predstavlja i zastupa interese studenata u vijeću fakulteta;
 - b) predlaže mjere za unapređenje studentskog standarda i prati stanje u toj oblasti;
 - c) obavlja i druge poslove koji se odnose na studentska pitanja na način utvrđen zakonom i ovim Statutom.

POGLAVLJE IV - DEKANSKI KOLEGIJ

Član 76.

(Dekanski kolegij)

- (1) Dekanski kolegij je tijelo fakulteta koje sačinjavaju dekan, prodekani, programski koordinatori, sekretar fakulteta i drugo nastavno osoblje koje odredi dekan.
- (2) Dekanski kolegij ima nadležnost da:
 - a) pomaže dekane u rukovođenju fakultetom;
 - b) razmatra sva pitanja prije nego što se dostave vijeću fakulteta na razmatranje;
 - c) predlaže vijeću fakulteta odluke za usvajanje;
 - d) priprema nacrt odluka koje usvaja vijeće fakulteta;
 - e) izvršava odluke vijeća fakulteta;
 - f) obavlja i druge poslove po nalogu vijeća fakulteta i dekana.
- (3) Dekan saziva sjednicu dekanskog kolegija po potrebi.

POGLAVLJE V - VIJEĆE POSTDIPLOMSKOG STUDIJA

Član 77.

(Vijeće postdiplomskog studija)

- (1) Vijeće postdiplomskog studija je stalno naučno-stručno tijelo odgovorno za realizaciju drugog i trećeg ciklusa studija na Univerzitetu.
- (2) Direktor vijeća rukovodi radom vijeća postdiplomskog studija, koji imenuje Senat na prijedlog rektora na period od četiri godine uz mogućnost jednog ponovnog izbora.
- (3) Članove vijeće postdiplomskog studija čine direktor vijeća, predstavnici fakulteta koje na prijedlog dekana bira nadležno vijeće fakulteta na period od 4 godine uz mogućnost ponovnog izbora, te prorektor za nastavu i studentska pitanja u svojstvu predstavnika rektorata.
- (4) Predstavnike fakulteta može prijevremno razrješiti nadležno vijeće fakulteta, na prijedlog direktora vijeća postdiplomskog studija.
- (5) Ured postdiplomskog studija je administrativna služba u okviru vijeća postdiplomskog studija koja je nadležna za pružanje i obezbjeđenje administrativne i tehničke podrške u radu vijeću postdiplomskog studija.

Član 78.

(Nadležnost vijeća postdiplomskog studija)

Vijeće postdiplomskog studija ima sljedeće nadležnosti:

- a) kontinuirano razmatra i daje preporuke u vezi s kvalitetom, prirodom, politikama i standardima postdiplomskog studija,
- b) razmatra i donosi odluke po različitim žalbama,
- c) obavlja i druge aktivnosti koje su bliže definirane pravilima studiranja i općim aktom koji donosi Senat Univerziteta.

POGLAVLJE VI - VIJEĆE STUDIJSKOG PROGRAMA

Član 79.

(Definicija vijeća studijskog programa)

- (1) Vijeće studijskog programa je tijelo koje se bavi aktivnostima vezanim za opće naučnonastavne/umjetničkonastavne procese na studijskom programu.
- (2) Vijeće studijskog programa čine nastavnici angažirani s punim radnim vremenom u realizaciji nastavnih predmeta na studijskom programu.
- (3) Programski koordinator saziva sjednice vijeća studijskog programa na koje može pozvati i lektore, više asistente, i/ili asistente.

Član 80.

(Nadležnost vijeća studijskog programa)

Vijeće studijskog programa nadležno je da:

- a) preispituje ciljeve studijskog programa;
- b) priprema i predlaže mjere za osavremenjavanje studijskog programa;
- c) organizira redovne sastanke laboratorijskih i projektnih timova u vezi s tekućim istraživačkim projektima, seminarima i časopisnim kružocima;
- d) inicira i predlaže plan realizacije nastave na fakultetu;
- e) razmatra studentske žalbe i predlaže dekanu način njihovog rješavanja;
- f) odlučuje o ostalim pitanjima u skladu sa općim aktom Univerziteta.

POGLAVLJE VII - NAUČNO VIJEĆE INSTITUTA

Član 81.

(Naučno vijeće Istraživačkog instituta)

- (1) Na rad i organizaciju naučnog vijeća primjenjuju se relevantne odredbe Zakona o naučnoistraživačkoj djelatnosti u Kantonu Sarajevo.
- (2) Detaljnija pitanja koja nisu regulisana Zakonom iz tačke (1) ovog člana, uređuju se općim aktom Univerziteta.

POGLAVLJE VIII - INTERNACIONALNI UNIVERZITET U SARAJEVU - CENTAR ZA CJELOŽIVOTNO UČENJE IUS LIFE

Član 82.

(Centar za cjeloživotno učenje IUS LIFE)

- (1) U okviru Univerziteta uspostavljen je Centar za cjeloživotno učenje IUS LIFE (u daljem tekstu: IUS LIFE) sa ciljem implementacije koncepta cjeloživotnog učenja (kao necikličnog oblika obrazovanja).
- (2) Programi IUS LIFE-a realiziraju se u saradnji sa odsjecima odnosno studijskim programima Univerziteta, na način da svojim sadržajem upoznaju polaznike sa najnovijim dostignućima iz struke, čime se ostvaruju ciljevi kontinuiranog stručnog i profesionalnog usavršavanja.

Član 83.

(Aktivnosti IUS LIFE-a)

IUS LIFE ostvaruje zadatke utvrđene zakonom i općim aktom, a naročito vrši sljedeće aktivnosti:

- a) realizira neciklične vidove obrazovanja;
- b) realizira pripremne programe stranih jezika kao neciklične vidove obrazovanja;
- c) vrši poduku iz stranih jezika;
- d) vrši poduku za učenike i studente;
- e) obavlja djelatnosti centara za obuku koji nude pomoć pri učenju putem raznih kurseva;
- f) organizuje pripremne kurseve za polaganje ispita radi stjecanja stručnih certifikata;
- g) vrši poduku iz jezika i konverzacijskih vještina;
- h) organizuje računarsko usavršavanje i obuku;
- i) organizuje kurseve za javno govorništvo (osposobljavanje polaznika za nastupanje u javnosti);
- j) vrši poduku u brzom čitanju;
- k) realizira obrazovanje odraslih, odnosno obrazovanje stanovništva van sistema redovnog školskog i univerzitetskog obrazovanja;
- l) pruža edukativne usluge firmama i institucijama;
- m) organizuje panele, okrugle stolove, seminare, savjetovanja, konferencije i sl.
- n) organizuje stručne i naučne skupove;
- o) organizuje dodatne edukacije studenata;
- p) posreduje u organizaciji u obavljanju studentske prakse;
- q) organizuje formalne i neformalne susrete studenata, nastavnika, asistenata i poslovnih osoba;
- r) organizuje stručne ekskurzije;
- s) izvodi programe profesionalnog usavršavanja;

- t) organizuje posjete firmama i institucijama;
- u) razmatra i podržava studentske poduzetničke aktivnosti i projekte;
- v) realizira formalne, neformalne i informalne oblike nastave u skladu s programima Univerziteta i vrednuje svoje certifikate ECTS studijskim bodovima;
- w) vrši ostale aktivnosti vezane za programe cjeloživotnog učenja u skladu sa zakonom.

Član 84.

(Rukovođenje IUS LIFE-om)

- (1) IUS LIFE-om rukovodi direktor sa pravima i obavezama utvrđenim zakonom i općim aktom.
- (2) Na prijedlog rektora, direktora imenuje Upravni odbor Univerziteta na period od četiri godine uz mogućnost reizbora.
- (3) Direktor za svoj rad odgovara rektoru Univerziteta.
- (4) Direktor je odgovoran za poštivanje zakona i izvršavanje odluka tijela Univerziteta i nadležnih organa vlasti, u skladu sa zakonom i Statutom.
- (5) Organizacija i rad IUS LIFE-a, imenovanje i razrešenje direktora, usvajanje i realizacija programa kao i druga relevantna pitanja u vezi sa radom IUS LIFE-a bliže se uređuju Pravilnikom o cjeloživotnom učenju koji donosi Upravni odbor.

DIO SEDMI - ORGANIZOVANJE I IZVOĐENJE STUDIJSKIH PROGRAMA

POGLAVLJE I - POKRETANJE STUDIJA

Član 85.

(Studijski programi)

- (1) Obrazovanje na sva tri ciklusa studija realizira se putem studijskih programa.
- (2) Studijski program predstavlja nastavni plan i program koji pokriva jednu ili više naučnih/umjetničkih polja/grana, a čija realizacija kroz nastavno-naučni/umjetničko-nastavni proces vodi do jednog od tri akademska stepena u skladu sa Bolonjskom deklaracijom.
- (3) Odluku o davanju saglasnosti za pokretanje novog studijskog programa donosi Senat Univerziteta.
- (4) Realizacija novih studijskih programa obavezno se usklađuje sa utvrđenim planovima finansiranja i razvoja Univerziteta.
- (5) Postupak pokretanja, usvajanja, promjena i evaluacije studijskih programa kao i sva ostala relevantna pitanja bliže se uređuje Pravilnikom o pokretanju, promjenama i evaluaciji studijskih programa na Univerzitetu, koji usvaja Senat.

Član 86.

(Zajednički studiji)

- (1) Na zahtjev zainteresiranih strana, Senat donosi odluku o organiziranju zajedničkog studija za sve cikluse i oblike studija u saradnji sa domaćom ili stranom visokoškolskom ustanovom, institucijom ili poslovnim subjektom, kao i između više organizacionih jedinica/fakulteta/instituta u okviru Univerziteta.
- (2) Studijski programi iz stava (1) ovog člana mogu biti multidisciplinarni ili interdisciplinarni ili transdisciplinarni studiji, te rezultirati stjecanjem dvojnih ili zajedničkih diploma, a što se precizno uređuje ugovorom između partnera organizatora ovakvog studija.

- (3) U slučaju organiziranja studija sa međunarodnim partnerom, ugovorom o realizaciji zajedničkog studija mogu se urediti i posebna pravila studija koja imaju prioritet u primjeni u odnosu na pravila Univerziteta.
- (4) Za realizaciju zajedničkog studija iz ovog člana, Univerzitet je obavezan pribaviti i odobrenje Upravnog odbora.
- (5) Cijenu zajedničkog studija utvrđuje Upravni odbor.

Član 87.

(Dualni studij)

- (1) Univerzitet može organizovati dualni studij u kojem se kroz aktivnu nastavu na Univerzitetu i praktičnu obuku i rad u poslovnom subjektu, kao i sa vladinim i nevladinim organizacijama, stječu, usavršavaju, odnosno izgrađuju znanja, vještine i kompetencije u skladu sa studijskim programom i standardom kvalifikacije.
- (2) Dualni studiji se može organizovati kao samostalni studijski program ili kao jedan od modula unutar drugih studijskih programa.
- (3) Dualni studij se realizuje kroz teorijsku nastavu na Univerzitetu i praktičnu obuku i rad u poslovnim subjektima i drugim organizacijama, koji su upisani u registar aktera dualnog studija koji osniva i vodi Ministarstvo.
- (4) Međusobni odnos Univerziteta, poslovnih subjekata i drugih organizacija i studenta u studijskim programima, odnosno modulima po dualnom modelu, uređuju se posebnim ugovorom.
- (5) Odluku o davanju saglasnosti za pokretanje dualnog studija donosi Senat.
- (6) Sadržaj i način izvođenja studijskih programa po dualnom modelu, uzajamna prava i obaveze studenta, Univerziteta i poslodavca, kao i ostala pitanja od značaja za realizaciju dualnog obrazovanja, uređuju se Pravilnikom o dualnom obrazovanju na Univerzitetu, koji usvaja Senat.

Član 88.

(Stručni studij)

- (1) Program stručnog studija je kratki ciklus studija (*short cycle*) koji traje do dvije godine, čiji ishodi učenja omogućuju kandidatu pristup tržištu rada ili nastavak obrazovanja na prvom ciklusu studijskog programa.
- (2) Program stručnog studija vrednuje se sa minimalno 60 ECTS studijskih bodova do 120 ECTS studijskih bodova.
- (3) Završetkom stručnog studija kandidat stječe stručno zvanje „stručnjak“ sa naznakom oblasti stručnog studija u skladu sa nazivom studijskog programa.
- (4) Student koji je započeo ili završio program stručnog studija ima pravo aplicirati za upis na studije prvog ciklusa uz priznavanje ishoda učenja u skladu sa Pravilnikom o priznavanju položenih predmeta i ekvivalenciji.
- (5) Bliže odredbe o postupku predlaganja, prihvatanja, praćenja i provođenja stručnog studija propisuju se Pravilnikom o pokretanju, promjenama i evaluaciji studijskih programa na Univerzitetu.
- (6) Za realizaciju stručnog studija iz ovog člana, Univerzitet je obavezan pribaviti i odobrenje Upravnog odbora.
- (7) Školarinu za pohađanje stručnog studija utvrđuje Upravni odbor.

Član 89.

(Specijalistički studij)

- (1) Specijalistički studij je studijski program nakon završenog drugog ciklusa studija, integrisanog studija ili diplomskog studija po predbolonjskom sistemu studiranja, u

okviru fakulteta, sa fokusom na praktičnu nastavu i stjecanje znanja i sposobnosti za naučnoistraživački rad i primjenu rezultata u praksi.

- (2) Specijalistički studij traje najmanje jednu studijsku godinu i vrednuje se sa minimalno 60 ECTS studijskih bodova.
- (3) Na kraju specijalističkog studija kandidat stiče zvanje „specijalista“ sa naznakom struke.
- (4) Zahtjev za prijenos bodova stečenih tokom programa specijalističkog studija u svrhu studiranja na trećem ciklusu studija cijeni se u skladu sa Pravilnikom o priznavanju položenih predmeta i ekvivalenciji, na temelju usporedivosti stečenih ishoda učenja.

Član 90.

(Programi necikličnog obrazovanja, mikrokvalifikacije i slobodni moduli)

- (1) Na prijedlog matičnog fakulteta, Senat odlučuje o pokretanju programa cjeloživotnog i necikličnog oblika obrazovanja, "mikrokvalifikacija" kao i programa ljetnih/zimskih škola i "slobodnih modula".
- (2) Neciklični programi obrazovanja i "mikrokvalifikacije" vrednuju se sa maksimalno 60 ECTS bodova.
- (3) Ukoliko se dodjeljuju zvanja nakon okončanja studija iz ovog člana, ista se utvrđuju odlukom Senata i, te navode u ovom Statutu.
- (4) Pravo na priznavanje predmeta ili dijela predmeta položenih u sklopu programa iz ovog člana unutar nekog od cikličnih oblika studija na Univerzitetu, bliže se uređuje Pravilnikom o priznavanju predmeta i ekvivalenciji.

Član 91.

(Horizontalna i vertikalna integrisanost nastavnog procesa)

- (1) Na Univerzitetu je uspostavljen princip pune horizontalne i vertikalne integrisanosti organizacionih i podorganizacionih jedinica i studijskih programa.
- (2) Princip iz stava (1) ovog člana podrazumijeva da se svi nastavni predmeti sinhronizirano realiziraju prema načelu matičnosti i nadležnosti fakulteta, tako da student može učestvovati u nastavnom procesu u formalnoj organizaciji na više različitih fakulteta i studijskih programa, u ovisnosti od matičnosti konkretne discipline izučavanja, pri čemu na jednom nastavnom predmetu mogu prisustvovati studenti različitih studijskih programa i različitih godina studija.
- (3) Matičnost predmeta iz stava (2) ovog člana određuje se prema klasifikaciji nastavnih predmeta unutar oblasti, polja i grana.
- (4) Organizacija nastavnog procesa u smislu ovog člana ne zahtjeva formalna odobrenja za izvođenje nastave između pod/organizacionih jedinica, već se jedinstveno utvrđuje na nivou Univerziteta.

Član 92.

(Primjena Evropskog sistema prenosa studijskih bodova - ECTS)

- (1) Studijski programi zasnovani su na principu *European Credit Transfer System* (ECTS), tj. evropskom sistemu prenosa studijskih bodova kredita, za svaki nastavni predmet iz studijskog programa.
- (2) Broj ECTS kredita za svaki nastavni predmet određuje se na osnovu ukupnog vremena kojim se student angažuje na određenom predmetu, i to na:
 - a) nastavi (teorijska i/ili praktična nastava, vježbe, seminarski radovi);
 - b) samostalnim zadacima (domaći zadaci, projekti, istraživački radovi);
 - c) učenju kod pripreme za provjeru znanja (testovi, završni ispit); i
 - d) drugim propisanim aktivnostima u okviru nastavnog predmeta.

Član 93.

(Ciklusi studija)

- (1) Visoko obrazovanje na Univerzitetu organizira se u sljedećim ciklusima studija:
 - a) prvi ciklus studija koji vodi do zvanja završenog dodiplomskog studija (stepen bakaleureata/bachelora) ili ekvivalenta, stečenog nakon stjecanja svjedočanstva o završenoj srednjoj školi, traje tri ili četiri studijske godine, a vrednuje se sa najmanje 180 ili 240 ECTS bodova;
 - b) drugi ciklus studija koji vodi do stručnog zvanja magistra ili ekvivalenta, stečenog nakon završenog dodiplomskog studija, traje jednu ili dvije studijske godine, a vrednuje se sa najmanje 60, odnosno najmanje 120 ECTS bodova, i to tako da u zbiru s prvim ciklusom studija nosi 300 ECTS bodova;
 - c) integrisani studij koji vodi do stručnog zvanja magistra ili ekvivalenta, stečenog nakon ostvarenih najmanje 300 ECTS bodova.
 - d) treći ciklus studija koji vodi do naučnog zvanja doktora ili ekvivalenta, traje tri studijske godine, a vrednuje se sa najmanje 180 ECTS bodova.
- (2) Jedan semestar studija nosi najmanje 30 ECTS bodova u svakom ciklusu studija, odnosno najmanje 60 ECTS bodova na nivou studijske godine.

POGLAVLJE II - ORGANIZACIJA I IZVOĐENJE NASTAVE

Član 94.

(Organizacija zajedničkih, praktičnih i drugih nastavnih aktivnosti)

- (1) Uvažavajući Standarde i normative, studenti različitih fakulteta Univerziteta mogu zajedno pohađati predmete ukoliko su isti sadržani u nastavnom planu i programu studija koji pohađaju.
- (2) Dio nastave, naučnoistraživačkog rada, praktičnog rada i stručne prakse može biti organizovan i realiziran izvan Univerziteta, na drugim visokoškolskim ustanovama, javnim ustanovama i drugim relevantnim subjektima.
- (3) Praktični rad i stručna praksa izvode se kao sastavni dio redovne nastave.
- (4) Aktivnosti iz stava (3) ovoga člana izvode se u skladu sa pismenim sporazumom između Univerziteta i pravnih lica u okviru kojih se navedene aktivnosti realiziraju.

Član 95.

(Nastavni planovi i programi)

- (1) Studij na Univerzitetu izvodi se prema nastavnim planovima i programima koje donosi Senat, na prijedlog fakultetskog vijeća.
- (2) Sa nastavnim planom i programom studenti se upoznaju na početku studijske godine, putem internet stranice Univerziteta ili na drugi odgovarajući način.
- (3) Nastavni plan i program ne može se retroaktivno primjenjivati, u smislu utvrđivanja dodatnih obaveza studentu za tekuću studijsku godinu i studijske godine koje je uspješno okončao.
- (4) Postupak, način i vrste izmjena nastavnog plana i programa kao i ostala relevantna pitanja bliže se uređuju Pravilnikom o pokretanju, promjenama i evaluaciji studijskih programa na Univerzitetu.

POGLAVLJE III - INFO KATALOG I REGISTAR STUDIJSKIH PROGRAMA

Član 96.

(Info katalog)

- (1) Studijski programi u formi info kataloga dostavljaju se Ministarstvu u elektronskoj formi i objavljuju na internet stranici fakulteta koji ih realizira.
- (2) Uputstvo o sadržaju info kataloga odobrava rektor na prijedlog službe koja se bavi studentskim pitanjima.

Član 97.

(Zbirni registar studijskih programa)

- (1) Univerzitet formira zbirni registar studijskih programa u e-formi koji je dostupan na internet stranici Univerziteta.
- (2) Zbirni registar studijski programa vodi i ažurira Ured za osiguranja kvaliteta.
- (3) Na zahtjev zainteresiranih strana, Univerzitet može izdavati izvode iz zbirnog registra kao javne isprave.
- (4) Odluku kojom se preciznije propisuje postupak upisa, izgled i sadržaj, način vođenja i druga relevantna pitanja u vezi sa registrom iz ovog člana donosi rektor.

Član 98.

(Studentski vodič)

- (1) Univerzitet na svojoj internet stranici objavljuje studentski vodič koji sadrži informacije o načinu ostvarivanja zdravstvene zaštite studenata, studentskom udruženju na organizacionoj jedinici, sekcijama koje su na raspolaganju studentima, programima mobilnosti, mehanizmima zaštite protiv diskriminacije, uznemiravanja na osnovu spola i seksualanog uznemiravanja, kao i druge relevantne informacije.
- (2) Sadržaj studentskog vodiča utvrđuju Centar za studente i razvoj karijere i Ured za međunarodne odnose, uz prethodnu saglasnost nadležnog prorektora.

DIO OSMI – UPISI I STJECANJE STATUSA STUDENTA

POGLAVLJE I – KONKURS ZA UPIS

Član 99.

(Konkurs za upis)

- (1) Na prijedlog fakulteta i uz saglasnost Osnivača, Senat donosi odluku o raspisivanju konkursa koja uključuje tekst konkursa za upis studenata u sve cikluse studija, u statusu redovnih, vanrednih i studenata putem učenja na daljinu.
- (2) Osim konkursa za upis u treći ciklus studija, konkurs iz stava (1) ovog člana se dostavlja nadležnom Ministarstvu radi pribavljanja saglasnosti za objavljivanje konkursa.
- (3) Nakon pribavljanja saglasnosti Ministarstva, informacija o objavi konkursa za upis studenata se objavljuje u jednom dnevnom listu, a cjeloviti tekst konkursa na internet stranici Univerziteta.
- (4) Prijava i upis kandidata se vrši na način i u skladu sa rokovima kako je definisano konkursom.
- (5) Opći uslovi za upis određeni su odgovarajućim pravilima studiranja, a posebnom odlukom nadležnog tijela mogu se utvrditi i dodatni uslovi.

- (6) Kandidat koji je stekao srednjoškolsko obrazovanje izvan Bosne i Hercegovine ima pravo učešća na konkursu za upisa i prije izvršenog priznavanja inostrane visokoškolske kvalifikacije, odnosno ekvivalencije svjedočanstva o završenom srednjoškolskom obrazovanju u inostranstvu.
- (7) Kandidat iz stava (6) ovog člana koji ispunjava uslove konkursa može uslovno upisati prvu studijsku godinu i prije izvršenog priznavanja inostrane visokoškolske kvalifikacije odnosno ekvivalencije svjedočanstva.

Član 100.

(Kalendar upisa)

- (1) Upis se vrši u skladu sa kalendarom organizacije i realizacije nastavnih programa za studijsku godinu koji utvrđuje i objavljuje Senat, najkasnije 60 dana prije početka izvođenja nastave, pri čemu specifičnosti vezane za tok i realizaciju nastave fakulteti mogu objavljivati i utvrđivati i naknadnim odlukama.
- (2) Rokovi za upis stranih državljana u sve cikluse studija mogu biti određeni posebnom odlukom Senata.

Član 101.

(Izbor kandidata za upis)

- (1) Izbor kandidata za upis vrši se od strane tijela koje imenuje rektor, u skladu sa kriterijima utvrđenim zakonom, općim aktom i konkursom.
- (2) Bliža pitanja u vezi sa organizacijom, uslovima i postupkom upisa mogu se urediti posebnim općim aktom.

Član 102.

(Upis na Univerzitet)

- (1) Preliminarnu listu primljenih kandidata Univerzitet objavljuje na oglasnoj ploči nakon što je verificira tijelo koje imenuje rektor, najkasnije dva dana od posljednjeg dana polaganja prijemnog ispita, a za organizacionu jединicu na kojoj se prijemni ispit ne polaže, najkasnije dva dana nakon isteka roka za podnošenje prijave na konkurs.
- (2) Na listu iz stava (1) ovog člana kandidati imaju pravo prigovora u roku od tri dana od dana objave iste.
- (3) Na prigovor iz stava (2) ovog člana nadležno tijelo fakulteta donosi odluku u roku od tri dana.
- (4) Univerzitet objavljuje konačnu listu upisanih studenata na oglasnoj ploči Univerziteta, najkasnije dva dana nakon isteka roka za donošenje odluke po izjavljenom prigovoru.
- (5) Univerzitet može objaviti i dodatnu konačnu listu upisanih studenata za studente koji počinju sa nastavom u drugom semestru, najkasnije do početka ljetnog semestra studijske godine.
- (6) U slučaju iz stava (5) ovog člana, Univerzitet organizira realizaciju nastavnog procesa na način koji omogućava usklađeno pohađanje nastave u skladu sa nastavnim planom i programom, kao i optimalno opterećenje studenta.
- (7) Nakon okončanog upisa, Senat verificira izvještaj o provedenom upisu studenata.

Član 103.

(Stjecanje statusa studenta i „non-degree“ statusa)

- (1) Student stječe status studenta upisom na određeni studijski program, odnosno na studijske programe dodiplomskog studija (prvi ciklus studija), stručnog studija, integrisanog studija, master studija (drugi ciklus studija) ili doktorskog studija (treći ciklus studija).

- (2) Status „non degree“ polaznika može se dodjeliti licu koje podnese zahtjev za pohađanje jednog ili više nastavnih predmeta u jednom ili dva semestra, s ciljem sticanja stručnog znanja i kompetencija iz konkretnih nastavnih predmeta, a bez namjere pohađanja cjelovitog studijskog programa i stjecanja stručnog zvanja i diplome.
- (3) Nakon uspješnog polaganja nastavnih predmeta, licu iz stava (3) ovog člana izdaje se potvrda za odslušanom i uspješno položenom nastavnom predmetu/grupi predmeta i dodijeljenim ECTS bodovima.
- (4) U slučaju zahtjeva lica iz stava (3) ovog člana za upis na redovan studij, Univerzitet može izvršiti priznanje položenih predmeta u skladu sa općim kriterijima za priznanje stečenih ishoda učenja.
- (5) Upis „non-degree“ polaznika na Univerzitet vrši se u pravilu neovisno od konkursa za upis u studijske programe.
- (6) Prijavu za upis „non-degree“ polaznika odobrava nadležni prorektor, razmatrajući svaki konkretan slučaj.
- (7) Senat posebnim aktom utvrđuje uslove za sticanje „non-degree“ statusa na Univerzitetu.

Član 104.

(Modeli studiranja)

- (1) Univerzitet može organizovati sljedeće modele studija, i to:
 - a) redovni studij,
 - b) vanredni studij,
 - c) studij učenja na daljinu (DL studij), ili
 - d) studij kombinovanjem prethodna tri modela (hibridni studij).
- (2) Model studija koji se realizira učenjem na daljinu (DL studij) ili hibridni studij, predstavlja način izvođenja nastave u kojem se nastavnici i studenti ne nalaze fizički na istoj lokaciji, ali koriste naprednu kompjutersku tehnologiju i interaktivne nastavne materijale, čime se osigurava interaktivna i dvosmjerna komunikacija u okviru nastavnog procesa.
- (3) Studenti koji su upisani u određeni studijski program kao redovni studenti mogu istovremeno ostvarivati status vanrednih studenata ili DL studenta/hibrid studij na drugom studijskom programu, i obrnuto.
- (4) Studentu koji pohađa jedan od modela studija iz stava (1) ovog člana može se dozvoliti promjena modela, o čemu odlučuje vijeće nadležnog fakulteta.

Član 105.

(Studijsko opterećenje)

- (1) Redovni studenti studiraju prema programu koji se vezuje za punu nastavnu satnicu.
- (2) Vanredni studij i studij putem učenja na daljinu mogu se realizovati na sva tri ciklusa studija i u pravilu se pohađaju uz rad i druge aktivnosti.
- (3) Upis u vanredni studij i studij putem učenja na daljinu/hibridni studij, u prvi semestar određenog ciklusa studija vrši se na osnovu konkursa za upis objavljenog od strane Univerziteta u skladu sa Zakonom, ili na osnovu odluke prorektora za „non-degree“ studente.
- (4) Studentu se može omogućiti prijenos predmeta i ECTS bodova stečenih studiranjem u okviru jednog načina studiranja u studijski program koji se pohađa u okviru drugog načina studiranja, u skladu sa općim kriterijima o priznavanju predmeta.
- (5) Vanredni i DL/hibrid studenti obavezni su prisustvovati oblicima provjera znanja i ispitima kako je predviđeno izvedbenim planovima nastave na Univerzitetu.
- (6) Detaljnija organizacija vanrednog studija i studija putem učenja na daljinu/hibridnog studija uređuje se Pravilnikom o organizaciji studija na daljinu, koji usvaja Senat.

Član 106.

(Izvođenje nastave u specifičnim okolnostima)

- (1) U specifičnim okolnostima koje mogu objektivno utjecati na realizaciju nastave u sjedištu Univerziteta (pandemija, prirodne katastrofe ili druge slične okolnosti), nastava i ispiti se mogu organizirati kroz formu učenja na daljinu ili hibridnog studija za sve oblike i cikluse studija, korištenjem naprednih informacionih tehnologija i online platforme Univerziteta (online nastava).
- (2) Ukoliko se usljed okolnosti iz stava (1) ovog člana redovni studij, djelimično ili u potpunosti, ne može realizirati u prostorijama Univerziteta, student upisan na taj oblik studija može pohađati nastavu i polagati sve provjere znanja (uključujući i završne ispite) putem DL platforme Univerziteta za vrijeme trajanja takvih okolnosti.
- (3) U smislu ovog člana, nastava može trajati kraće ili se izvoditi u drugačijem obliku, o čemu odluku donosi Senat Univerziteta, uz obavezu realizacije propisanog fonda sati.

Član 107.

(Izmjena oblika realizacije nastave)

- (1) Univerzitet može donijeti odluku o izmjeni oblika realizacije nastavnog procesa ukoliko je član akademskog osoblja opravdano spriječen da izvodi nastavu, a posebno ukoliko mu je odobreno odsustvo radi naučnog, umjetničkog ili stručnog usavršavanja ili obavljanja aktivnosti od posebnog interesa za Univerzitet.
- (2) U cilju osiguranja realizacije punog fonda nastave, izmjena oblika realizacije nastavnog procesa iz stava (1) ovog člana podrazumijeva da se nastava na datom nastavnom predmetu u određenom vremenskom periodu može organizirati i kao online nastava ili nastava u formi učenja na daljinu, čime se članu akademskog osoblja dozvoljava takav vid sudjelovanja u nastavi.

Član 108.

(Dodjeljivanje ECTS bodova)

- (1) Studentu se dodjeljuju ECTS bodovi za svaki položeni nastavni predmet bez obzira na postignutu ocjenu.
- (2) Ocjena na nastavnom predmetu utvrđuje se u skladu sa ukupno ostvarenim rezultatima u okviru bodovne skale od (0-100), a što student osvaruje kroz aktivnosti koje podliježu ECTS vrednovanju (zadace, seminarski radovi, projekti, testovi, parcijalni i završni ispiti i slično).

Član 109.

(Bodovni kriteriji ocjenjivanja)

- (1) Pored ECTS sistema ocjenjivanja, na Univerzitetu se primjenjuje i usporedna internacionalna skala ocjenjivanja.
- (2) Bodovni kriterij za ocjenjivanje prikazan je u nastavku:

Bodovna skala	Ocjena po međunarodnom sistemu ocjenjivanja	IUS težinski koeficijent	Slovna ocjena u skladu sa sistemom ocjenjivanja utvrđenog Zakonom
----------------------	--	---------------------------------	--

0 - 44	F	0.0	5 (F) - ne zadovoljava minimalne uslove
45 - 54	E	1.0	
55 - 64	C	2.0	6 (E) – zadovoljava minimalne uslove u postizanju ishoda učenja
65 - 69	C+	2.3	7 (D) - općenito dobar u postizanju ishoda učenja, ali sa značajnijim nedostacima
70 - 74	B-	2.7	
75 - 79	B	3.0	8 (C) - prosječan u postizanju ishoda učenja, sa primjetnim greškama
80 - 84	B+	3.3	
85 - 94	A-	3.7	9 (B) - iznad prosjeka u postizanju ishoda učenja, sa ponekom greškom
95 - 100	A	4.0	10 (A) - izuzetan uspjeh u postizanju ishoda učenja bez grešaka ili sa neznatnim greškama

Član 110.

(Ugovor o studiranju)

- (1) Ugovorom o studiranju preciznije se uređuju međusobna prava i obaveze između Univerziteta i studenta za period trajanja ciklusa studija koji student upisuje.
- (2) Bitni elementi ugovora o studiranju su predmet studiranja i cijena školarine, dok se ostala pitanja od značaja za reguliranje međusobnih prava i obaveza bliže definišu Pravilnikom o bitnim elementima ugovora o studiranju, koji donosi Senat.
- (3) Univerzitet može potpisivati i predugovore sa kandidatima zainteresovanim za upis u skladu sa općim pravilima obligacionih odnosa.

Član 111.

(Prelazak sa druge visokoškolske ustanove)

- (1) Univerzitet može dozvoliti prelazak i upis na studijski program na odgovarajućem fakultetu/odsjeku Univerziteta studentu koji je upisan na drugoj domaćoj ili stranoj visokoškolskoj ustanovi, a nakon dostavljanja propisanih dokumenata prije početka semestra.
- (2) Student koji se upisuje putem prijelaza sa druge visokoškolske ustanove mora ispunjavati uslov poznavanja engleskog jezika za upis na Univerzitet.

Član 112.

(Priznanje stečenog znanja i kompetencije)

- (1) Studentu koji je upisan ili je prethodno završio studijski program na Univerzitetu ili drugoj visokoškolskoj ustanovi, a koji želi nastaviti isti ili drugi studijski program u okviru Univerziteta, dekan nadležnog fakulteta imenuje komisiju za priznanje predmeta, stečenog znanja i kompetencije.
- (2) Komisija iz stava (1) ovog člana uspoređuje sadržaj položenih predmeta odnosno stečena znanja i kompetencije u odnosu na predmete studijskog programa na kojem student želi nastaviti studij.
- (3) Postupak priznavanja preciznije se uređuje posebnim općim aktom.

Član 113.

(Registracija semestra)

- (1) Registracija semestra je proces prijave studentske aktivnosti na početku semestra od strane Studentske službe.
- (2) Uslovi za registraciju semestra su najmanje jedan registrovani predmet i ispunjene finansijske obaveze studenta.

Član 114.

(Ispitni termini)

- (1) Završni ispiti se organizuju u tri redovna ispita roka: januarsko-februarskom, junsko-julskom i septembarskom roku.
- (2) Student polaže završni ispit na ispitnim terminima u okviru ispitnih rokova iz stava (1) ovog član, a koji su organizovani kao:
 - a) Redovni ispitni termin, koji se održava nakon završetka nastave u semestru,
 - b) Popravni ispitni termin, koji se održava nakon redovnog ispitnog termina, i
 - c) Septembarski ispitni termin, koji se održava u vremenskom okviru utvrđenom Akademskim kalendarom.
- (3) U redovnom i popravnom ispitnom terminu polažu se ispiti iz predmeta koje je student pohađao u predmetnom semestru, a u septembarskom ispitnom terminu polažu se ispiti iz oba semestra.
- (4) Ispitnim terminima navedenim u stavu (2) ovog člana mogu pristupiti samo studenti koji su zadovoljili uslove pohađanja nastave, i koji su prikupili potreban broj bodova tokom semestra koji im omogućava da polože predmet na završnom ispitu.
- (5) Za stručno-umjetničke predmete kod kojih zbog prirode nastavnog procesa ponavljanje ispita nije moguće, završni ispit se organizira isključivo u redovnom ispitnom terminu.
- (6) Popis stručno-umjetničkih predmeta kod kojih zbog prirode nastavnog procesa ponavljanje ispita nije moguće uređuje se i objavljuje posebnom odlukom vijeća fakulteta.

- (7) Studentu završne godine kojem je ostao jedan ispit za završetak studija Univerzitet može dozvoliti integralno polaganje završnog ispita (tzv. "Single exam") u dodatnom ispitnom terminu, u skladu sa uslovima i na način koji su propisani pravilima studiranja.

Član 115.

(Komisijsko polaganje ispita)

- (1) Student koji nije zadovoljan postignutom ocjenom na ispitu može, u roku od dva radna dana od dana objavljivanja rezultata ispita, podnijeti obrazložen zahtjev da ispit ponovi pred komisijom.
- (2) Ako ocijeni da je zahtjev opravdan, dekan fakulteta imenuje predsjednika i dva člana ispitne komisije pri čemu predmetni nastavnik čijom ocjenom student nije zadovoljan ne može biti član niti predsjednik komisije, izuzev u slučajevima objektivne nemogućnosti održavanja komisijskog ispita.
- (3) U slučaju zahtjeva iz stava (1) ovog člana, pismeni ispit ili pismeni dio ispita neće se ponoviti pred komisijom, već će postojeći ocijenjeni pismeni rad komisija ponovno pregledati i ocijeniti, dok je ponavljanje usmenog ispita ili usmenog dijela ispita pred komisijom obavezno. Praktični dio ispita komisija će preispitati osnovu audio/video zapisa i drugih oblika dokumentiranja polaganja ispita.
- (4) Prilikom utvrđivanja ocjene, komisija će uzimati u obzir sve verificirane rezultate rada studenta u toku nastave.
- (5) Odluka komisije se donosi većinom glasova članova komisije.
- (6) Na ocjenu koja je utvrđena od strane ispitne komisije, student nema pravo žalbe.

Član 116.

(Izuzeće predmetnog nastavnika)

- (1) Student može podnijeti zahtev dekanu fakulteta za izuzeće predmetnog nastavnika najkasnije sedam dana prije održavanja ispita, o čemu je dekan fakulteta dužan donijeti odluku u roku od tri radna dana od dana prijema zahtjeva.
- (2) U slučaju da utvrdi da je zahtjev studenta opravdan, ili da postoje drugi razlozi za izuzeće predmetnog nastavnika, dekan fakulteta imenuje komisiju za izvođenje ispita, tako da izuzeti član akademskog osoblja nije član komisije.
- (3) Kod rješavanja zahtjeva za izuzeće, dekan fakulteta će uzeti u obzir sve razloge ili okolnosti koje mogu dovesti u pitanje nepristrasnost nastavnika u pogledu ocjene rada studenta, kao što su: porodični, poslovni ili slični odnosi.
- (4) Zahtjev za izuzećem može podnijeti i predmetni nastavnik po istoj proceduri kao kada izuzeće traži student.

Član 117.

(Pohađanje nastave kod obnove godine)

- (1) Studentu koji obnavlja godinu studija, Univerzitet može dozvoliti unutar jednog ciklusa, u skladu sa svojim kapacitetima i organizacionim mogućnostima, pohađanje nastave i polaganje nastavnih predmeta iz naredne studijske godine pod uslovom da ukupno opterećenje studenata po semestru ne prelazi 30 ECTS studijskih bodova.
- (2) Pod kapacitetima i organizacionim mogućnostima se podrazumijeva dovoljan broj nastavnog osoblja i prostornih kapaciteta za realizaciju nastavnog procesa.
- (3) Student koji je prenio ispite u narednu godinu ne može upisati još jednu višu godinu dok ne položi te prenesene ispite.

Član 118.
(Nadareni studenti)

- (1) Studentu koji je u bilo kojem semestru ostvario prosjek ocjena 3,7 ili više (prema međunarodnoj skali), može se odobriti da u narednom semestru upiše dodatne predmete, u maksimalnom obimu do 42 ECTS studijskih bodova, na koji način student može okončati studij i u kraćem vremenskom periodu.
- (2) Registraciju i pohađanje dodatnih predmeta u skladu sa ovim članom može odobriti dekan na molbu studenta ukoliko za to postoje organizaciono-tehnički kapaciteti, uz uslov da student zadovoljava sve predulove za registraciju dodatnih predmeta.
- (3) Upravni odbor može utvrditi iznos cijene školarine za studente koji registruju dodatne predmete iznad 30 ECTS bodova po semestru, odnosno iznad 60 ECTS bodova u toku jedne akademske godine.

Član 119.
(Studenti sa posebnim statusom)

- (1) Studenti sa invaliditetom, studenti koji su roditelji djeteta kojima je neophodna posebna njega, samohrani roditelj, trudnica, porodilja, studenti koji učestvuju na međunarodnim takmičenjima, studenti vrhunski sportisti, studenti priznati umjetnici, studenti treneri vrhunskih sportista, studenti sa hroničnim oboljenjima, priznaje se pravo stjecanja statusa studenta sa posebnim statusom.
- (2) Studentima sa posebnim statusom priznaje se pravo na individualizaciju u postupku realizacije nastavnog procesa, odnosno prisustvovanje nastavi, pauziranje studijskog procesa, učestvovanje u izvođenju pojedinih nastavnih sadržaja, kao i na vrednovanjima postignuća studenata.
- (3) Licima sa utvrđenim invaliditetom osiguran je pristup visokom obrazovanju na bilo kojem studijskom programu na svim ciklusima studija, pod uslovom da je lice:
 - a) položilo prijemni ispit;
 - b) sposobno obavljati praktične zadatke u nastavi;
 - c) steklo pravo upisa na odgovarajući ciklus studija i
 - d) dostavilo dokaz nadležne institucije o statusu lica sa invaliditetom i procentu invaliditeta.
- (4) Prava iz stava (2) ovog člana posebno se odnose na dodatne konsultacije, smanjen procent obaveznog prisustvovanja nastavnim aktivnostima i mogućnost evaluacije cjelokupnog nastavnog sadržaja na predmetu (sveobuhvatan ispit).
- (5) Kandidati za upis i studenti sa poteškoćama u razvoju i invaliditetom imaju pravo na tutora u cilju pružanja pomoći kod apliciranja za upis, praćenja nastavnih sadržaja kao i na provjerama znanja.
- (6) Status studenta sa posebnim statusom u pravilu se stječe na jedan semestar, odnosno jednu akademsku godinu s mogućnošću produženja.
- (7) Postupak stjecanja statusa studenta sa posebnim statusom detaljnije je uređen pravilima studiranja.

Član 120.
(Okolnosti pod kojima se gubi status studenta)

- (1) Status studenta prestaje u sljedećim situacijama:
 - a) kada student okonča ciklus studija;
 - b) kada se student ispiše sa Univerziteta;
 - c) izricanjem disciplinske mjere prestanka statusa studenta odnosno isključenjem sa Univerziteta po postupku i uz uvjete utvrđene zakonom, Statutom ili drugim općim aktom Univerziteta;

- d) kada student ne okonča studij u roku utvrđenim zakonom, Statutom ili općim aktom Univerziteta;
 - e) kada student kojem ne miruju prava i obaveze ne upiše narednu godinu studija, odnosno ne obnovi upis u istu godinu studija;
 - f) kada student odbije ili ne potpiše ugovor o studiranju;
 - g) kada student ne ispuni uslove u slučaju uslovnog upisa;
 - h) i u drugim slučajevima utvrđenim općim aktima Univerziteta.
- (2) Studentu koji prethodno izgubio status studenta, Univerzitet može dozvoliti ponovno uspostavljanje statusa studenta, o čemu odlučuje rektor imajući u vidu organizacijske, kadrovske i druge mogućnosti progama.
 - (3) Odlukom kojom se studentu određuje pravo na nastavak studija utvrđuju se obaveze koje je obavezan ispuniti kako bi uspješno završio studij.
 - (4) U zahtjevu za ponovno stjecanje statusa studenta, student je obavezan detaljno obrazložiti okolnosti koje su dovele do gubitka statusa studenta.
 - (5) Postupak obnove statusa studenta detaljnije je uređen pravilima studiranja.

Član 121.

(Pravila studiranja)

Pravilima studiranja za svaki ciklus studija uređuje se detaljnija organizacija i nominalno trajanje studija, način upisa, mirovanje prava i obaveza studenta, postupak ispitivanja i ocjenjivanja, uslovi i postupak provođenja završnog rada, određivanje i zamjena mentora, formiranje komisija u postupku stjecanja akademskih zvanja, provjera plagijarizma, uslovi za dodjelu diplome, kao i ostala relevantna pitanja u vezi sa studijem.

POGLAVLJE II - ŠKOLA ENGLESKOG JEZIKA – ELS (ENGLISH LANGUAGE SCHOOL)

Član 122.

(Program škole engleskog jezika)

- (1) U okviru IUS LIFE-a, uspostavljen je program Škole engleskog jezika (u daljem tekstu: ELS), koji se sastoji od četiri nivoa.
- (2) Cilj ELS-a je unaprijediti znanje studenta na nivo na kojem će biti osposobljen za pohađanje nastave.
- (3) Trajanje programa ELS-a utvrđuje u odnosu na nivo trenutnog poznavanja jezika.
- (4) Zadovoljenje kriterija ELS sastavni je dio svakog studijskog progama i predstavlja jedinstven preduslov za slušanje nastavnih predmeta na Univerzitetu.
- (5) Uslovi za pohađanje ELS, kriteriji zadovoljenja finalnog ispita engleskog jezika („Proficiency Exam“), kao i druga pitanja koja se odnose na ELS, bliže se uređuju se pravilima studiranja i posebnim općim aktom o ELS koji usvaja Senat, uz saglasnost Upravnog odbora.

POGLAVLJE III - PRAVA I OBAVEZE STUDENATA

Član 123.

(Prava studenata)

- (1) Studenti imaju pravo da aktivno učestvuju u nastavi i naučnoistraživačkom radu, u saradnji sa akademskim osobljem, a u skladu sa studijskim programima.
- (2) Pored prava utvrđenih Statutom i zakonom, student ima i sljedeća prava:
 - a) da se upozna sa pravima, obavezama i dužnostima na početku studijske godine;
 - b) da sluša nastavu u skladu sa nastavnim planovima i programima, rasporedom nastave i ispita;

- c) da bude ravnopravan u pogledu uslova studija i tretmana na Univerzitetu;
 - d) da završi studij u propisanom roku, uz redovno izvršavanje svojih obaveza;
 - e) da se izjašnjava o kvaliteti nastave i radu nastavnika i saradnika,
 - f) da koristi biblioteku, računarsku opremu i druge resurse Univerziteta,
 - g) pravo na zaštitu od diskriminacije,
 - h) pravo na zdravstvenu zaštitu u skladu sa zakonom,
 - i) pravo na konsultacije i pomoć akademskog osoblja u savladavanju nastavnog sadržaja,
 - j) pravo učešća u studentskim organizacijama i predstavničkim tijelima u skladu sa zakonom i Statutom, i
 - k) druga prava utvrđena općim aktima Univerziteta.
- (3) Za realizaciju prava studenata iz stava (1) i (2) ovog člana, odgovorni su rektor i dekani fakulteta.

Član 124. (Obaveze studenata)

Student ima obavezu:

- a) pridržavati se svih pravila utvrđenih zakonom, Statutom i općim aktima Univerziteta,
- b) pristojno se odnositi prema akademskom i administrativnim osoblju, kao i prema drugim studentima i posjetiocima,
- c) poštovati utvrđene kodeks ponašanja,
- d) završiti studij u skladu sa propisanim rokovima;
- e) pridržavati se i drugih obaveza utvrđenih zakonom, Statutom i općim aktima Univerziteta.

Član 125. (Disciplinska odgovornost studenata)

Načela odgovornosti studenta za vrijeme trajanja studija, postupak za utvrđivanje disciplinske i materijalne odgovornosti, teže i lakše povrede studentskih obaveza, sankcije i mjere, disciplinski organi, kao i druga relevantna pitanja uređuju se Pravilnikom o disciplinskoj i materijalnoj odgovornosti studenata, koji donosi Senat.

Član 126. (Mobilnost studenata)

- (1) Studentu se može odobriti studijski boravak na drugim visokoškolskim ustanovama posredstvom međunarodnih programa za razmjenu studenata ili na bazi bilateralnih programa za razmjenu studenata, kao i na bazi vlastitog aranžmana.
- (2) Osnovna načela mobilnosti studenata Univerziteta kao i gostujućih studenata drugih visokoškolskih ustanova, vrste i trajanje mobilnosti, postupak prijave, javne isprave, prava i obaveze studenata, kao i ostala pitanja u vezi sa provođenjem mobilnosti preciznije se uređuju Pravilnikom o učešću u programima razmjene.

POGLAVLJE IV – STUDENTSKE ORGANIZACIJE

Član 127.

(Studentska organizacija)

- (1) Studenti imaju pravo organizovanja u studentsku organizaciju sastavljenu od predstavnika studenata svih ciklusa studija, u skladu sa statutom studentske organizacije.
- (2) Studentska organizacija bavi se ostvarivanjem i zaštitom prava i interesa studenata uključujući prava i interese iz domena studentskog standarda i društvenog života studenata.
- (3) Studenti putem studentske organizacije biraju svoje predstavnike i imenuju ih u tijela Univerziteta u kojima je predviđeno učešće studenata u skladu sa zakonom i aktima Univerziteta (Senat, vijeće fakulteta, Etički savjet, Ured za osiguranje kvaliteta, Tim za osiguranje kvaliteta i druga).
- (4) Postupak izbora i razrješenja predstavnika studenata u tijela Univerziteta uređuje studentska organizacija svojim statutom. Predstavnici studenata imaju jednaka prava i obaveze kao i drugi članovi tijela Univerziteta.

Član 128.

(Podrška radu studentskih asocijacija)

Univerzitet obezbjeđuje finansijsku podršku za rad studentskih asocijacija kao i prostor za njihovo funkcionisanje, u skladu sa Zakonom o studentskom organizovanju u Kantonu Sarajevo.

DIO DEVETI - SISTEM OSIGURANJA KVALITETA

Član 129.

(Sistem osiguranja kvaliteta i njegova primjena)

- (1) U okviru strateškog menadžmenta, Univerzitet utvrđuje politiku unutrašnjeg osiguranja kvaliteta (u daljem tekstu: Politika unutrašnje kontrole kvaliteta) i osigurava efikasan interni sistem za njegovo sprovođenje.
- (2) Odluku o uspostavi Politike unutrašnje kontrole kvaliteta iz stava (1) ovog člana usvaja Upravni odbor.
- (3) Sistem unutrašnjeg osiguranja kvaliteta fokusiran je na uspostavljanje procedura i procesa za kontinuirano unapređenje Univerziteta sa svrhom pružanja podrške unapređenju procesa nastave i učenja, istraživanja i razvoja umjetnosti, doprinosa društvu, kao i ukupnih upravljačkih i administrativnih procesa.
- (4) Postupak instutucionalnog samovrednovanja i samovrednovanja studijskih programa (u daljem tekstu "procedure samoevaluacije") se provodi kontinuirano, u skladu sa zakonom i Pravilnikom o osiguranju kvaliteta Univerziteta.
- (5) Postupak samoevaluacije uzima u obzir mišljenje studenata kao i mišljenje drugih internih i eksternih zainteresovanih stranaka.
- (6) Postupak samoevaluacije studijskih programa podrazumijeva procjenu nastavnih planova i programa, nastavne opreme, stepena ostvarivanja ishoda učenja i njihovog značaja za tržište rada, kvalifikaciju akademskog osoblja, načine realizacije nastavnog procesa, stopu prolaznosti studenata na ispitima, kao i ostale neophodne indikatore uspjeha rada Univerziteta, a koji su detaljnije definišu Pravilnikom o osiguranju kvaliteta na Univerzitetu koji donosi Upravni odbor na prijedlog Senata.

Član 130.

(Vanjska ocjena kvaliteta)

Postupak vanjske ocjene sistema osiguranja kvalitete (institucionalna akreditacija i akreditacija studijskih programa) provodi se u skladu sa aktima, standardima, smjernicama i kriterijima za akreditaciju visokoškolskih ustanova i studijskih programa, koje donose Agencija za razvoj visokog obrazovanja i osiguranje kvaliteta Bosne i Hercegovine i Ministarstvo, te u skladu sa "Standardima i smjernicama za osiguranje kvaliteta u Evropskom prostoru visokog obrazovanja".

DIO DESETI - IZBOR U AKADEMSKA ZVANJA

POGLAVLJE I – AKADEMSKA ZVANJA I PERIOD IZBORA

Član 131.

(Akademska zvanja)

- (1) Univerzitet dodjeljuje naučnonastavna i umjetničkonastavna zvanja, i to:
 - a) redovni profesor;
 - b) vanredni profesor;
 - c) docent;
 - d) lektor;
 - e) viši asistent;
 - f) asistent.
- (2) Lica koja su izabrana u akademska zvanja iz stava (1) tač. a), b) i c) ovog člana su nastavnici, a lica izabrana u akademska zvanja iz stava (1) tač. d), e) u f) ovog člana su saradnici.
- (3) Akademske osoblje na Univerzitetu bira se na određeni izborni period, i to:
 - a) asistent na period od četiri godine bez mogućnosti ponovnog izbora u isto zvanje;
 - b) viši asistent na period od pet godina s mogućnošću jednog ponovnog izbora u isto zvanje;
 - c) viši asistent u umjetničko-nastavnom zvanju na period od pet godina sa mogućnošću jednog ponovnog izbora u isto zvanje isključivo ukoliko nakon izbora ostvari javno predstavljene oblike umjetničkog stvaralaštva, što se bliže uređuje Smjernicama;
 - d) lektor na period od pet godina s mogućnošću ponovnog izbora i mogućnosti napredovanja u višeg lektora uz uslov da objavi tri rada u relevantnim naučnim časopisima;
 - e) docent na period od pet godina s mogućnošću jednog ponovnog izbora u isto zvanje;
 - f) vanredni profesor se bira na period od šest godina s mogućnošću jednog ponovnog izbora u isto zvanje;
 - g) redovni profesor u naučno-nastavnom zvanju se bira u trajno zvanje;
 - h) redovni profesor u umjetničko-nastavnom zvanju se bira u trajno zvanje.

POGLAVLJE II - USLOVI ZA IZBOR U AKADEMSKA ZVANJA

Član 132.

(Smjernice za izbor u akademska zvanja)

- (1) Polazeći od minimalnih uslova za izbor koji su definisani zakonom, uslovi za izbor u naučno-nastavna zvanja na Univerzitetu utvrđuju se na način da uzimaju u obzir opća naučna dostignuća i doprinos, nastavničke sposobnosti i doprinos, doprinos procesu internacionalizacije, te društveni doprinos, a što se detaljnije razrađuje Smjernicama kao obavezujućim općeprihvaćenim standardima struke koji važe za izbor u akademska zvanja na Univerzitetu (u daljem tekstu: Smjernice), koje donosi Senat uz obavezujuće mišljenje Savjeta ministarstva za visoko obrazovanje u Kantonu Sarajevo.
- (2) Smjernice iz stava (1) ovog člana bliže utvrđuju: osnovne pojmove vezane za izbor u akademska zvanja, opće kriterije za vrednovanje kvantitativnih i kvalitativnih uslova za izbor u akademska zvanja, opće kriterije za vrednovanje i prijedlog liste relevantnih naučnih baza i ostalih naučnih baza podataka, opće kriterije za vrednovanje priznatih publikacija i ostalih oblika i rezultata naučnog i umjetničkog rada akademskog osoblja, kriterije, kategorizaciju i vrednovanje naučnih radova objavljenih u priznatim publikacijama indeksiranim u relevantnim i/ili priznatim naučnim bazama, kriterije za vrednovanje publikacija od posebnog društvenog značaja i interesa koji se kao relevantni priznaju u postupku izbora onih naučnih i umjetničkih grana koja zbog specifičnosti istraživanja i mjerenja naučnih i umjetničkih rezultata imaju poseban način vrednovanja uslova za izbora u akademska zvanja, kriterije za vrednovanje rezultata naučnog i istraživačkog rada onih naučnih i umjetničkih grana koja zbog specifičnosti istraživanja i mjerenja naučnih i umjetničkih rezultata imaju poseban način vrednovanja uslova za izbora u akademska zvanja, vrednovanje rezultata vezanih za proces internacionalizacije i doprinos unapređenju kvaliteta života na visokoškolskoj ustanovi i zajednici, metodologiju za procjenu utjecaja smjernica na ukupne rezultate naučnoistraživačke i umjetničke produktivnosti i kvaliteta u Kantonu, kao i druga relevantna pitanja općeprihvaćenih standarda koja su vezana za izbor u akademska zvanja.
- (3) Smjernicama se utvrđuju i kriteriji vezani za ocjenu iz oblasti nastavničke sposobnosti i doprinosa, oblasti doprinosa procesu internacionalizacije kao i oblasti društvenog doprinosa, posebnom vodeći računa o specifičnostima vezanim za izbor i vrednovanje rezultata rada u naučnim oblastima, poljima i granama koja zbog specifičnosti istraživanja i mjerenja naučnih rezultata imaju poseban način vrednovanja uslova za izbora u akademska zvanja.
- (4) Senat vrši revidiranje Smjernica u ciklusima od najmanje pet godina. Revidiranje se vrši na osnovu procjene utjecaja Smjernica na ukupne rezultate naučnoistraživačke i umjetničke produktivnosti i kvalitet u Kantonu Sarajevo, a sa ciljem unaprjeđenja kvaliteta naučnoistraživačkog i umjetničkoistraživačkog rada.

POGLAVLJE III - NAČIN IZBORA U AKADEMSKA ZVANJA

Član 133. (Javni konkurs)

Izbor akademskog osoblja u akademska zvanja vrši se u svim slučajevima javnim konkursom, u skladu sa kriterijima i uslovima utvrđenim zakonom i Smjernicama, kao i procedurom koja je propisana zakonom, Statutom i općim aktom.

Član 134. (Izbor člana akademskog osoblja)

- (1) Član akademskog osoblja bira se na jednu ili više srodnih naučnih/umjetničkih grana unutar naučnog polja, te može sudjelovati u realizaciji nastavnog, naučnoistraživačkog, umjetničkog i umjetničkoistraživačkog procesa iz nastavnih predmeta koji pripadaju grani i/ili granama na koje je izvršen izbor.
- (2) Klasifikaciju naučnih/umjetničkih oblasti, polja, grana i njima pripadajućih predmeta donosi Senat, na prijedlog vijeća fakulteta, u roku od šest mjeseci od dana donošenja Statuta.
- (3) Za sve članove akademskog osoblja koji su prethodno izabrani u neko od akademskih zvanja za jedan ili više nastavnih predmeta odnosno za naučne oblasti koje su bile utvrđene na Univerzitetu prije donošenja klasifikacije naučnih/umjetničkih oblasti polja, grana i predmeta, Senat će nakon donošenja klasifikacije iz stava (2) ovog člana, na prijedlog nadležnog vijeća, izvršiti ekvivalenciju prethodnih izbora u akademska zvanja na naučno/umjetničko polje ili granu/e unutar polja.
- (4) Srodnost naučnih/umjetničkih grana i polja u smislu ovog člana, utvrđuje vijeće fakulteta.
- (5) U postupku osnivanja do konstituisanja tijela nove organizacione jedinice, Senat u nadležnosti komisije matičara postupa i donosi odluke iz tačke (2), (3) i (4) ovog člana.

Član 135. (Izbor člana naučnoistraživačkog osoblja)

- (1) U naučno i istraživačko zvanje može biti izabrano lice koje ispunjava uslove utvrđene zakonom o naučnoistraživačkoj djelatnosti.
- (2) Postupak izbora u naučna i istraživačka zvanja pokreće se na inicijativu vijeća članice na način i pod uslovima utvrđenim Zakonom o naučnoistraživačkoj djelatnosti.
- (3) Postupak za izbora naučnoistraživačkog osoblja zaposlenog na Univerzitetu provodi se analogno postupku za izbor naučnonastavnog osoblja, u skladu sa općim aktom.

Član 136. (Poznavanje engleskog jezika kao kriterij za izbor)

- (1) Kandidati za izbor u akademsko zvanje obavezni su dokazati sposobnost održavanja nastave na engleskom jeziku. U slučaju da se prije, u toku ili nakon izbora u zvanje ustanovi da nastavnik ili saradnik ne posjeduje sposobnost za držanje nastave na engleskom jeziku, Univerzitet ima pravo zahtijevati dodatnu provjeru znanja odnosno odrediti mjere za neophodno usavršavanje zaposlenika.
- (2) U slučaju odbijanja ili izostanka donošenja dokaza od strane zaposlenika u smislu ovog člana, Univerzitet može otkazati ugovor o radu sa zaposlenikom, po osnovu:
 - a) odbijanja zakonske obaveze za usavršavanjem (skriveni otkaz ugovora o radu);

- b) neispunjenja obaveznih kvalifikacija za traženo radno mjesto u okviru važeće sistematizacije radnih mjesta; ili
 - c) ličnih osobina, nedostataka ili nesposobnosti za rad (lično uvjetovan otkaz o radu).
- (3) Procedura iz stava (2) ovog člana provodi se u postupku propisanim općim aktom Univerziteta.

Član 137.

(Prava i obaveze u vezi sa izborom u zvanje)

- (1) U slučaju da kandidat pri izboru u akademsko zvanje nije ispunio neki od sljedećih uslova: objavljena knjiga, mentorstvo ili originalni stručni uspjeh kao što je projekt, patent ili originalni metod, navedeni uslov može biti zamijenjen ispunjavanjem drugih kriterija, u skladu sa Zakonom.
- (2) Objektivni razlozi i dodatne zamjene za naučne grane koje zbog specifičnosti istraživanja i mjerenja naučnih i umjetničkih rezultata imaju poseban način vrednovanja i ispunjavanja propisanih kriterija preciznije će se utvrditi Smjernicama.

Član 138.

(Produženje izbora u zvanje)

Rokovi za izbor akademskog osoblja produžit će se za vrijeme provedeno na porodiljskom odsustvu, bolovanju dužem od šest mjeseci, javnoj dužnosti, za period priznatog profesionalnog usavršavanja odobrenog od strane Univerziteta, za period njege člana uže porodice kao i u slučaju povećanih administrativnih dužnosti za vrijeme trajanja izbora ili drugih naročito opravdanih razloga, o čemu u svakom konkretnom slučaju odluku donosi rektor Univerziteta uz saglasnost Upravnog odbora, u skladu sa općim aktom.

Član 139.

(Prijevremeni izbor)

- (1) Član akademskog osoblja u zvanju docenta i vanrednog profesora ima pravo biti izabran u više zvanje i prije isteka perioda na koji je biran ukoliko je u zvanju na Univerzitetu proveo dvije trećine izbornog perioda, ispunio sve uslove za izbor u više akademsko zvanje bez supstitucija, te ukoliko je realizirao više od propisanog broja radova za izbor u više zvanje i to za:
 - a) vanrednog profesora u naučno-nastavnom zvanju dodatno objavio najmanje tri naučna rada u relevantnim naučnim bazama;
 - b) redovnog profesora u naučno-nastavnom zvanju dodatno objavio najmanje četiri naučna rada u priznatim publikacijama indeksiranim u relevantnim naučnim bazama;
 - c) vanrednog i redovnog profesora u umjetničkonastavnom zvanju dodatno realizovao javno predstavljeni oblik/e umjetničkog stvaralaštva sa međunarodnim priznanjem.
- (2) Relevantnost naučnih baza i predstavljenih oblika umjetničkog stvaralaštva, kao i ostala relevantna pitanja iz stava (1) ovog člana, detaljnije se uređuju Smjernicama i općim aktom.

Član 140.

(Pitanja u vezi sa izborom u akademsko zvanje)

- (1) Uslovi za izbor u akademsko zvanje uzimaju se u obzir samo ukoliko su nastali u vremenu od izbora u posljednje zvanje.

- (2) Vrijeme od izbora u posljednje zvanje iz stava (1) ovog člana podrazumijeva ukupan period u kojem je član akademskog osoblja proveo u svom posljednjem zvanju prije apliciranja za više zvanje.
- (3) U smislu stava (2) iz ovog člana, član akademskog osoblja u zvanju docenta i vanrednog profesora može biti biran u više zvanje ukoliko ispuni uslove za vrijeme trajanja drugog izbornog perioda, u kojem slučaju se takav izbor neće smatrati prijevremenim, već će se uzeti u obzir svi radovi nastali za vrijeme provedeno u posljednjem akademskom rangu (zvanju).
- (4) Ukoliko je član akademskog osoblja biran više puta i u vremenskom diskontinuitetu u isto akademsko zvanje na više visokoškolskih ustanova, čime je ispunio vremenski uslov za napredovanje u više zvanje, u postupku imenovanja uzet će se u obzir svi radovi postignuti za vrijeme trajanja predmetnog naučnonastavnog ranga (zvanja).
- (5) Akademsko osoblje koje je izabrano u jedno akademsko zvanje, ne može istovremeno posjedovati izbor u dva ili više različitih akademskih zvanja.
- (6) Za kandidate koji dolaze iz zemalja u kojima je sistem imenovanja u akademska zvanja različit u odnosu na opće nivoe akademskih zvanja u Bosni i Hercegovini, komisija za izbor ima pravo procjene prethodnog akademskog zvanja i rangiranja stečenog akademskog zvanja u odnosu na zvanje koje je u primjeni u Kantonu Sarajevo.
- (7) U postupku izbora u akademsko zvanje naučni rad se smatra objavljenim i u slučaju kada je od izdavača časopisa izdana zvanična potvrda koja sadrži DOI broj, odnosno ukoliko je rad prihvaćen za objavu, pri čemu takva potvrda mora sadržavati naznaku očekivanog datuma objave rada.
- (8) Izabrani član akademskog osoblja dužan je dokaz o objavi rada iz tačke (9) ovog člana dostaviti nadležnom dekanu najkasnije u roku od 7 dana od dana objave, u suprotnom, dekan je obavezan pokrenuti postupak oduzimanja dodijeljenog zvanja, u skladu sa odredbama o oduzimanju akademskog zvanja iz ovog Statuta.
- (9) U smislu ovog člana, sve koautorske publikacije i radovi tretiraju se kao i autorska djela, u skladu sa vrijednovanjem koje se definiše Smjernicama.

POGLAVLJE IV - POSTUPAK IZBORA U AKADEMSKO ZVANJE

Član 141.

(Pokretanje postupka)

- (1) Postupak za izbor u akademsko zvanje pokreće vijeće fakulteta, utvrđivanjem prijedloga za raspisivanje konkursa.
- (2) Prijedlog za raspisivanje upućuje dekan Senatu u roku od 5 dana od dana donošenja prijedloga.
- (3) Najkasnije četiri a najranije šest mjeseci prije isteka izbornog perioda postojećeg člana akademskog osoblja, odnosno (bez rokova) u slučaju utvrđene nastavne potrebe za upošljavanje novog osoblja, dekan fakulteta objavljuje konkurs za izbor u akademsko zvanje u roku od pet dana od dana davanja saglasnosti Senata.
- (4) Obavijest o konkursu se objavljuje u jednom dnevnom listu, a cjelovit tekst konkursa se objavljuje na internet stranici Univerziteta.-
- (5) Konkurs za izbor akademskog osoblja raspisuje se u zavisnosti od utvrđene nastavne potrebe i u svakom slučaju na osnovu dinamičkog plana potreba za raspisivanje konkursa za izbor u akademska zvanja, na koji je data saglasnost Upravog odbora.
- (6) Konkurs za izbor se može raspisati za:
 - a) uposlenog nastavnika u isto ili više zvanje uključujući i prijevremni izbor, ili

- b) novog nastavnika ili saradnika za kojeg je utvrđena dodatna nastavna potreba.
- (7) U smislu konkursa iz ovog člana, Univerzitet može imenovati član akademskog osoblja i bez zaključivanja ugovora o radu, ukoliko nema druge mogućnosti zadovoljenja nastavne potrebe i ukoliko kandidat najkasnije do donošenja odluke o izboru podnese izjavu da nije u mogućnosti zaključiti ugovor o radu nakon izvršenog izbora.

Član 142.

(Sadržaj i produženje konkursa)

- (1) Konkurs sadrži informacije o akademskom zvanju, uslovima i ostalim specifičnostima vezanim za izbor u zvanje, naučnu/umjetničku granu/e za koju se bira, vrstu radnog angažmana, potrebnu dokumentaciju, adresu Univerziteta i rok za prijave, koji ne može biti kraći od 7 dana.
- (2) U slučaju da se niko od kandidata nije prijavio po raspisanom konkursu, dekan može odlučiti da isti konkurs produži
- (3) U redovnom toku postupka, fakultet je obavezan putem nadležnih tijela okončati započeti postupak izbora u akademsko zvanje u roku od 90 dana od isteka roka za podnošenje prijave na konkurs.
- (4) Ukoliko se postupak izbora u akademsko zvanje iz objektivnih razloga nije mogao okončati u roku propisanom u stavu (9) ovog člana, isti rok se može produžiti za dodatnih 30 dana posebnom odlukom vijeća fakulteta.
- (5) Pod objektivnim razlozima navedenim u stavu (4) ovog člana podrazumijevaju se:
 - a) ukoliko član komisije imenovan sa druge visokoškolske ustanove nije u mogućnosti blagovremeno okončati svoje dio rada u komisiji odnosno dostaviti dokumentaciju potrebnu za proceduru izbora;
 - b) bolest i/ili smrt imenovanog člana komisije;
 - c) nemogućnost obezbjeđenja javnosti za održavanje pristupnog predavanja;
 - d) i drugi objektivni razlozi utvrđeni posebnom odlukom vijeća fakulteta u za svakom konkretnom slučaju.

Član 143.

(Stručna služba)

- (1) Stručna služba fakulteta obavezna je, prije dostavljanja pristiglih prijava na konkurs komisiji za izbor u zvanja, potvrditi, u pisanoj formi, blagovremenost i urednost pristiglih prijava sa uslovima utvrđenim konkursom te naznačiti broj prijavljenih kandidata.
- (2) Pisana potvrda iz stava (1) ovog člana se dostavlja dekanu prije donošenja odluke o imenovanju komisije za izbor i predstavlja sastavni dio izvještaja komisije za izbor u zvanja.

POGLAVLJE V - KOMISIJA ZA IZBOR

Član 144.

(Komisija za izbor)

- (1) Dekan je u roku od 15 dana od dana isteka roka za podnošenje prijava obavezan uvrstiti prijedlog za formiranje komisije za pripremanje prijedloga za izbor u akademsko zvanje (u daljem tekstu: Komisija za izbor) u dnevni red sjednice vijeća.
- (2) Komisiju za izbor člana akademskog osoblja imenuje vijeće fakulteta.
- (3) Komisiju za izbor nastavnika čine najmanje tri nastavnika u istom ili višem zvanju od zvanja za koje se vrši izbor u naučnoj/umjetničkoj oblasti.
- (4) Članovi komisije za izbor saradnika su u zvanju docent, vanredni ili redovni profesor.

- (5) Izuzetno, kada nije moguće sastaviti komisiju u skladu sa stavom (3) ovog člana, komisije mogu činiti nastavnici iz srodne naučne/umjetničke oblasti za koju se kandidat bira, pod uslovom da vijeće članice u konkretnom slučaju utvrdi srodnost naučnih oblasti.

Član 145.

(Izveštaj Komisije za izbor)

- (1) U roku od 30 dana od dana imenovanja Komisija za izbor obavezna je sačiniti i vijeću dostaviti izvještaj s prijedlogom za izbor u akademska zvanja.
- (2) Izvještaj iz stava (1) ovog člana treba da sadrži minimalno biografiju kandidata, imena članova komisije za izbor, prethodno akademsko zvanje kandidata i pregled relevantnih radova u toku posljednjeg akademskog zvanja, postignuća kandidata, predmetno akademsko zvanje i oblasti/grane imenovanja, informacije o stepenu ispunjavanja ili neispunjavanja uslova za izbor, kao i ostale okolnosti u vezi sa izborom, te obrazložen prijedlog za imenovanje ili neimenovanje kandidata.
- (3) Komisija u pravilu sačinjava dvojezični izvještaj, na bosanskom i engleskom jeziku.

Član 146.

(Pristupno predavanje)

- (1) Kandidat koji nije sudjelovao u realizaciji nastavnog procesa na visokoškolskoj ustanovi obavezan je da pred studentima i Komisijom za izbor održi pristupno predavanje iz naučne polja/grane za koju/e je konkurisao.
- (2) Kandidat koji konkuriše za prvi izbor u umjetničkonastavno zvanje, obavezan je Komisijom održati ogledno umjetničko i umjetničko-pedagoško predavljanje.
- (3) Komisija iz stava (1) i (2) ovog člana u postupku izbora kandidata ocjenjuje uspješnost pristupnog predavanja odnosno oglednog umjetničkog i umjetničko-pedagoškog predavljanja uzimajući u obzir rezultate sljedećih kriterija: uspješnost komunikacije na engleskom jeziku, sposobnost da zainteresuje studente za svoje predavanje kao i znanje kandidata o temi koju predaje.
- (4) Ukoliko neki od članova komisije iz stava (3) ovog člana iz opravdanih razloga bude spriječen da prisustvuje pristupnom predavanju kandidata, vijeće fakulteta imenovat će njegovog zamjenika prema istim uvjetima kao i za imenovanje člana komisije.
- (5) Poznavanje engleskog jezika predavlja kriterij koji se obavezno uzima u obzir i ocjenjuje od Komisije prilikom izbora u akademsko zvanje i čiji kvalitet implementacije Univerzitet kontinuirano prati.
- (6) U slučaju izbora člana akademskog osoblja na jednu ili više srodnih grana u polju filologije stranog jezika ili drugih naučnih/umjetničkih polja, koje zbog svoje specifičnosti zahtjevaju poznavanje drugih jezika, pristupno predavanje se može održati i na nekom od jezika relevantnih za izbor.
- (7) Temu pristupnog predavanja određuje Komisija za izbor u dogovoru sa kandidatom.
- (8) Univerzitet je obavezan na javan i transparentan način oglasiti vrijeme održavanja pristupnog predavanja.
- (9) U slučaju nepojavljivanja zainteresiranih studenata-pratilaca pristupnog predavanja nakon urednog obavještanja, isto se može održati pred komisijom i bez prisustva studenata.
- (10) Kandidat koji na pristupnom predavanju dobije negativnu ocjenu komisije, ne učestvuje u daljnjem postupku izbora.

POGLAVLJE VI – PRIJEDLOG ODLUKE O IZBORU

Član 147.

(Prijedlog odluke o izboru)

- (1) U roku od 30 dana od dana imenovanja Komisija za izbor obavezna je sačiniti i vijeću dostaviti izvještaj s prijedlogom za izbor u akademska zvanja.
- (2) Vijeće može, ukoliko to ocijeni potrebnim, zatražiti od Komisije dopunu izvještaja ili dodatna pojašnjenja u vezi sa izvještajem.
- (3) Vijeće utvrđuje prijedlog odluke o izboru u zvanje.
- (4) Odluku o pitanjima izbora iz svoje nadležnosti vijeće donosi većinom glasova od ukupnog broja članova s tim da članovi vijeća prilikom glasanja ne mogu biti suzdržani.
- (5) U slučaju kada vijeće ne utvrdi pozitivan prijedlog odluke iz stava (3) ovog člana, odluka vijeća se također dostavlja Senatu na odlučivanje.

Član 148.

(Obaveza dekana)

Dekan fakulteta obavezan je u roku od pet dana od dana održavanja sjednice vijeća na kojoj se glasalo o prijedlogu komisije za izbor u naučnonastavno/umjetničkonastavno/naučnoistraživačko zvanje, prijedlog odluke vijeća dostaviti Senatu na dalje postupanje.

POGLAVLJE VII – ODLUKA O IZBORU

Član 149.

(Odluka o izboru u zvanje)

- (1) Na prijedlog vijeća fakulteta/članice, odluku o izboru ili neizboru u zvanje donosi Senat Univerziteta.
- (2) Odluka iz stava (1) ovog člana donosi se većinom glasova od ukupnog broja članova Senata, a članovi Senata prilikom glasanja ne mogu biti suzdržani.
- (3) Senat može, ukoliko to ocijeni potrebnim, zatražiti od predlagača dopunu prijedloga ili dodatna pojašnjenja u vezi sa prijedlogom.
- (4) Odluka Senata o izboru iz stava (1) prosljeđuje se organizacionoj jedinici radi dostavljanja iste kandidatima i upoznavanja o izvršenom izboru.
- (5) Odluka Senata je konačna i protiv iste se može pokrenuti upravni postupak pred nadležnim sudom u Sarajevu u roku od 30 dana od dana prijema odluke.

POGLAVLJE VIII – ODGOVORNOST KOMISIJA

Član 150.

(Odgovornost imenovanih komisija)

- (1) Sve komisije imenovane od strane Univerziteta obavezne su povjerene zadatke obavljati savjesno, u skladu sa etičkim načelima i u rokovima propisanim općim aktima i rješenjem o imenovanju.
- (2) Članovima komisija iz ovog člana za koje se utvrdi da su djelovali u suprotnosti sa propisima koji definišu povjerene aktivnosti i rokove, može se zabraniti učešće u radu tijela i komisija koje imenuje Univerzitet na određeni vremenski period, a može im se izreći i druga mjera u skladu općim aktom Univerziteta.

Član 151.

(Postupak i razlozi za oduzimanje akademskog zvanja)

- (1) Ukoliko nakon dodjele akademskog zvanja Univerzitet zaprimi prijavu da su jedan ili više radova, knjiga ili drugih publikacija navedenih u izvještaju komisije za izbor bili plagirani ili da su prikazana postignuća ili informacije u izvještaju bili bazirani na lažnim podacima, vijeće fakulteta će po službenoj dužnosti imenovati tročlanu komisiju radi provjere navoda iz prijave.
- (2) Nakon dostavljenog izvještaja komisije iz člana (1) ovog člana, vijeće razmatra donosi kojom utvrđuje prijedlog odluke o oduzimanju ili neoduzimanju akademskog zvanja odnosno odluku o odbacivanju navoda iz prijave.
- (3) Ukoliko vijeće utvrdi prijedlog odluke iz stava (2) ovog člana, isti prosljeđuje na konačno odlučivanje Senatu Univerziteta.
- (4) Senat može, ukoliko to ocijeni potrebnim, zatražiti od vijeća dopunu prijedloga ili dodatna pojašnjenja u vezi sa prijedlogom.
- (5) Senat je obavezan konačno odlučiti rješenjem u roku od 60 dana od dana dostave prijedloga.
- (6) Dejstvo rješenja iz stava (5) ovog člana u pravilu nastupa od dana stupanja na snagu odluke Senata, čime imenovani član akademskog osoblja gubi sva prava u vezi sa izborom u akademsko zvanje.
- (7) Odluka o oduzimanju zvanja objavljuje se u službenim novinama.
- (8) Odluka Senata je konačna i protiv iste se može pokrenuti upravni postupak pred nadležnim sudom u Sarajevu u roku od 30 dana od dana prijema odluke.

POGLAVLJE IX – REDOVNI PROFESOR

Član 152.

(Angažman redovnog profesora na Univerzitetu)

- (1) Redovni profesor ima naglašenu nastavnu, naučnoistraživačku/umjetničkoistraživačku, mentorsku i društvenu odgovornost.
- (2) Redovni profesor u naučno-nastavnom zvanju koji u ciklusima od sedam godina nije objavio tri naučna rada u publikacijama u relevantnim naučnim bazama ili jednu knjigu ili bio rukovodilac projekta, kao i ostvario propisane rezultate u vezi sa doprinosom procesu internacionalizacije i društvenim doprinosom, ne može biti na rukovodećim pozicijama.
- (3) Redovni profesor u umjetničko-nastavnom zvanju ima obavezu da u ciklusima od sedam godina realizuje javno predstavljene oblike umjetničkog stvaralaštva koji znatno doprinose razvoju kulture i umjetnosti ili podizanje umjetničkog kadra i uspjesi postignuti za vrijeme mentorstva (solistički angažmani, uspjesi na natjecanjima i sl.).
- (4) Izvještaj o rezultatima i aktivnostima iz st. (1), (2) i (3) ovog člana, redovni profesor dostavlja vijeću članice na usvajanje u ciklusima od sedam godina i javno je dostupan na internet stranici fakulteta.
- (5) Prije predaje izvještaja iz stava (4), redovni profesor ima obavezu ostvariti minimalnu pozitivnu ocjenu rada na svakogodišnjim evaluacijama akademskog osoblja na Univerzitetu, a koja čini sastavni dio izvještaja iz stava (4) ovog člana.
- (6) Izvještaj koji ne sadrži prolaznu evaluaciju redovnog profesora za vrijeme sedmogodišnjeg ciklusa neće se razmatrati u smislu ovog člana, te će isti predstavljati osnov za prestanak ugovora o radu, a što se detaljnije uređuje Pravilnikom o evaluaciji akademskog osoblja koji usvaja Senat uz saglasnost Upravnog odbora, i općim aktom Univerziteta.

Član 153.

(Radnopravni status redovnog profesora sa navršениh 65 godina)

- (1) Član akademskog osoblja može ostati u radnom odnosu na Univerzitetu do navršениh 65 godina života, odnosno do isteka studijske godine ukoliko 65 godina života navršava u toku studijske godine.
- (2) Ukoliko postoji iskazana nastavna potreba, redovnom profesoru sa navršениh 65 godina života koji je ispunio uslove propisane članom 163. ovog Statuta, moguće je produžiti radni odnos najduže za dvije studijske godine, uz prethodnu saglasnost Upravnog odbora Univerziteta.

POGLAVLJE X - POČASNI DOKTORAT

Član 154.

(Počasni doktorat)

Univerzitet dodjeljuje počasni doktorat istaknutim naučnim, kulturnim i drugim javnim radnicima iz zemlje i inostranstva za izuzetan doprinos u pojedinim oblastima nastavnonaučnog, naučnoistraživačkog, umjetničkog, umjetničkoistraživačkog, kulturnog kao i drugog oblika javnog stvaralaštva.

Član 155.

(Postupak dodjele počasnog doktorata)

- (1) Odluku o dodjeljivanju počasnog doktorata donosi Senat Univerziteta.
- (2) Promocija počasnog doktora obavlja se na svečanoj ceremoniji kojom predsjedava rektor.
- (3) Sadržaj i oblik diplome počasnog doktora utvrđuje Senat Univerziteta.
- (4) Diplom o počasnom doktoratu potpisuje rektor Univerziteta.
- (5) Bliži kriteriji i postupak dodjele počasnog doktorata propisuju se općim aktom koji donosi Senat uz prethodnu saglasnost Osnivača.

Član 156.

(Diploma o počasnom doktoratu)

Diploma o počasnom doktoratu Univerziteta ispisuje se na jednom od službenih jezika u upotrebi u Bosni i Hercegovini i na engleskom jeziku.

POGLAVLJE XI - PROFESOR EMERITUS

Član 157.

(Dodjela počasnog zvanja)

- (1) Na prijedlog vijeća fakulteta, Senat može dodijeliti počasno zvanje profesor emeritus bez provođenja javnog konkursa naučnim ili umjetničkim radnicima i predavačima koji su se svojim naučnim ili umjetničkim radom posebno istakli i ostvarili međunarodnu reputaciju odnosno penzionisali na domaćoj ili stranoj visokoškolskoj ustanovi.
- (2) Kriteriji za dodjelu počasnog zvanja su broj i kvalitet objavljenih akademskih radova, broj doktorskih i magistarskih mentorstava, rezultati predavanja i istraživanja kao i cjelokupni doprinos odgovarajućem obliku nastavnonaučnog, naučnoistraživačkog, umjetničkog, umjetničkoistraživačkog, kulturnog kao i drugog oblika javnog stvaralaštva.

Član 158.

(Komisija za ocjenu prijedloga dodjele počasnog zvanja)

- (1) Nakon dostavljenog prijedloga, Senat imenuje komisiju za ocjenu istog koja se sastoji od najmanje tri redovna profesora.
- (2) Većina članova komisije mora biti iz uže naučne odnosno umjetničke oblasti/polja predloženog kandidata.
- (3) Komisija podnosi pisani izvještaj Senatu na razmatranje i usvajanje koji sadrži ocjenu, mišljenje kao i potpis svih članova komisije iz stava (1) ovog člana.

Član 159.

(Pravilnik o dodjeli počasnog zvanja profesor emeritus)

Detaljnija pitanja oko postupka dodjele počasnog zvanja profesor emeritus uređuju se Pravilnikom o dodjeli počasnog zvanja profesor emeritus, koji usvaja Senat.

POGLAVLJE XII – STRUČNI SARADNICI

Član 160.

(Vrste stručnih saradnika)

Za osposobljavanje studenata za praktični i stručni rad, kao i za pomoć akademskom osoblju u organizaciji i realizaciji nastavnog, naučnoistraživačkog umjetničkog i umjetničkoistraživačkog procesa, Univerzitet bez raspisivanja konkursa može angažovati:

- a) stručne/umjetničke saradnike (metodičar, umjetnički saradnik, viši stručni saradnik za jezik, samostalni umjetnički saradnik i korepetitor),
- b) doktorande,
- c) postdoktorande,
- d) tutore, i
- e) eksperte iz prakse.

Član 161.

(Procedura za angažovanje stručnog saradnika)

- (1) Potrebu za angažovanje stručnog saradnika iz člana 160. Statuta, uključujući vrstu, period angažovanja i predmete na kojima se angažman predlaže utvrđuje programsko vijeće te istu podnosi dekanu zajedno sa biografijom predloženog kandidata.
- (2) Dekan donosi odluku po prijedlogu programskog vijeća ili po potrebi zahtjeva dodatne podatke od programskog vijeća, programskog koordinatora ili odgovornog nastavnika.
- (3) Odluka o angažovanju stručnog saradnika uključuje informacije kao što su vrsta angažmana, vrijeme angažmana i predmete na kojima je angažman odobren.
- (4) Stručni saradnik potpisuje ugovor o radu sa Univerzitetom na period angažmana.

Član 162.

(Uslovi za angažman stručnog saradnika)

- (1) Stručni saradnik mora da posjeduje neophodno znanje, vještine i kompetencije potrebne za angažman.
- (2) Minimalni uslovi za angažman su završen odgovarajući prvi ciklus visokog obrazovanja i aktivno vladanje engleskim jezikom.
- (3) Vijeće studijskog programa može predložiti i posebne uslove koje stručni saradnik mora posjedovati, uključujući stručno iskustvo i iskustvo u nastavi kao i dodatne kvalifikacije.

Član 163.

(Period angažovanja stručnog saradnika)

- (1) Stručni saradnik je angažovan za onaj period za koji postoji potreba za angažmanom.
- (2) Period angažmana može da bude jedan semester, dva semestra, akademska godina ili u posebnim slučajevima kada je angažman potreban za tačno određeno vrijeme angažman se vrši za taj vremenski period.
- (3) Uslovi, postupak angažmana i ostala relevantna pitanja u vezi sa angažmanom stručnih saradnika mogu se bliže urediti općim aktom.

Član 164.

(Angažman stručnih saradnika na projektu)

Saradnik, doktorand, postdoktorand i ekspert na projektu se može angažirati na određeno vrijeme, bez raspisivanja konkursa, pri čemu zadržava taj status u zavisnosti od perioda trajanja projekta i finansira se iz sredstava projekta.

DIO JEDANAESTI - ANGAŽMAN AKADEMSKOG OSOBLJA BEZ ZASNIVANJA RADNOG ODNOSA

POGLAVLJE I - VRSTE ANGAŽMANA

Član 165.

(Angažman akademskog osoblja sa druge visokoškolske ustanove)

- (1) Univerzitet može angažovati akademsko osoblje u svojstvu predmetnog nastavnika sa druge domaće ili inostrane visokoškolske ustanove bez raspisivanja konkursa, ukoliko se na raspisani konkurs za izbor člana akademskog osoblja nije prijavio nijedan kandidat ili po provedenom konkursu nije izabran nijedan od prijavljenih kandidata odnosno, i to dok se u konkursnom postupku ne izabere novi član akademskog osoblja.
- (2) U cilju realizacije angažmana iz stava (1) ovog člana, vijeće fakulteta na prijedlog dekana, donosi odluku o angažmanu u predmetnom semestru ili studijskoj godini.
- (3) U odluci vijeća obavezno se naznačava naziv predmeta i predmetno opterećenje imenovanog člana akademskog osoblja.
- (4) Odredbe ovog člana analogno se primjenjuju i u slučaju sporazumnog ili jednostranog otkaza ugovora o radu, smrti, kao i drugih sličnih razloga, a najduže za jednu godinu od nastupanja navedenih okolnosti.
- (5) Angažman iz ovog člana se vrši do obima propisanog Standardima i normativima.

Član 166.

(Angažman osobe koja posjeduje izbor u akademsko zvanje)

- (1) Ukoliko postoji utvrđena nastavna potreba, Univerzitet može angažovati izabranu osobu u akademskom zvanju koja ne ostvari radni odnos u okviru visokoškolske ustanove odnosno koja već radi u realnom ili javnom sektoru, pod uslovom da takvoj osobi nije istekao izbor u zvanje i uz prethodno pribavljenu saglasnost njegovog poslodavca.
- (2) Odredba iz stava (1) ovog člana podrazumijeva i slučaj kada je izabrana osoba stekla akademsko zvanje na Univerzitetu, ali je odbila zasnovati radni odnos.
- (3) Univerzitet nema obavezu pribavljanja saglasnosti poslodavca iz stava (1) ovog člana ukoliko u trenutku angažmana izabrana osoba nije u radnom odnosu ili je samozaposlena.

- (4) Konačnu odluku o vrsti angažmana člana akademskog osoblja iz ovog člana donosi vijeće fakulteta na prijedlog dekana fakulteta.

Član 167.

(Eksperti u praksi)

- (1) U cilju upoznavanja studenata s naučnim/umjetničkim dostignućima s primjenom naučnih rezultata u praksi, praktičnim radom i drugim vidovima stručnog usavršavanja ili u cilju izvođenja pojedinih specifičnih predavanja, izvođenja nastave stranog jezika, vježbi, seminara i drugih oblika rada, fakultet može na prijedlog predmetnog nastavnika angažovati istaknutog naučnog radnika, umjetnika, odnosno stručnjaka iz prakse da učestvuje u ostvarivanju dijela nastave na nastavnom predmetu.
- (2) Na osnovu prijedloga predmetnog nastavnika, vijeće fakulteta donosi odluku o angažmanu lica navedenih u stavu (1) ovog člana.
- (3) Angažirana lica iz stava (1) ovog člana u pravilu nisu predmetni nastavnici.

Član 168.

(Član akademskog osoblja izabran na javnu funkciju)

- (1) Univerzitet može člana akademskog osoblja koji je izabran na Univerzitetu ili drugoj visokoškolskoj ustanovi, odnosno imenovan na neku javnu dužnost, angažovati u svojstvu predmetnog nastavnika u naučnonastavnom/umjetničkonastavnom procesu, za svo vrijeme trajanja javne dužnosti.
- (2) U odluci vijeća kojom se daje saglasnost za angažman člana akademskog osoblja iz stava (1) ovog člana ustanove obavezno se naznačava da član akademskog osoblja, za kojeg se daje saglasnost, ispunjava zakonske uvjete za angažman u pogledu izvršenog izbora u zvanje.
- (3) Član akademskog osoblja iz stava (1) zaključuje poseban ugovor o realizaciji nastave za dati semestar, u skladu sa odlukom o nastavnim zaduženjima.

Član 169.

(Angažman akademskog osoblja u drugim opravdanim slučajevima)

- (1) Univerzitet može u opravdanim slučajevima kao što su porodijsko odsustvo, bolovanje duže od šest mjeseci, stručnom usavršavanju, javnoj dužnosti člana akademskog osoblja, suspenzije, kao i u drugim opravdanim slučajevima koje utvrđuje vijeće u svakom konkretnom slučaju, za izvođenje nastavnog procesa, u periodu odsustva, bez raspisivanja konkursa i zasnivanja radnog odnosa, angažovati člana akademskog osoblja koji ima odgovarajući izbor u zvanje.
- (2) U slučaju iz stava (1) ovog člana, vijeće fakulteta na prijedlog dekana konstatuje predmetnu okolnost te donosi odluku o angažmanu člana akademskog osoblja u svojstvu nosioca datog predmeta, po ugovoru o realizaciji nastave na određenom nastavnom predmetu.
- (3) Dekan koji predlaže angažman člana akademskog osoblja obavezan je dostaviti odgovarajuće dokaze da predloženi nastavnik ispunjava sve uvjete u pogledu izvršenog izbora u zvanje.
- (4) U odluci vijeća kojom se daje saglasnost za angažman člana akademskog osoblja sa druge domaće ili strane visokoškolske ustanove obavezno se naznačava da član akademskog osoblja, za kojeg se daje saglasnost, ispunjava zakonske uvjete za angažman u pogledu izvršenog izbora u zvanje.

Član 170.

(Gostujući profesori)

- (1) Univerzitet može pokrenuti postupak angažmana na određeno vrijeme nastavnika ili istraživača koji dolazi sa druge domaće ili inostrane visokoškolske ustanove u svojstvu gostujućeg profesora i koji posjeduje akademsko zvanje na ustanovi sa koje dolazi.
- (2) Na prijedlog nadležnog vijeća fakulteta, Senat donosi odluku o imenovanju gostujućeg profesora u pravilu u zvanje koje to lice posjeduje na matičnoj visokoškolskoj ustanovi (gostujući redovni profesor, gostujući vanredni profesor, gostujući docent i sl.).
- (3) U slučaju iz stava (2) ovog člana, postupak, kriteriji i vrijeme imenovanja koji se primjenjuju za redovno imenovanje i izbor u akademsko zvanje, neće se primjenjivati na gostujuće profesore, već će se preuzeti već dodijeljeno zvanje.
- (4) Ukoliko gostujući profesor postigne zadovoljavajuću ocjenu o radu od strane Univerziteta i studenata u predmetnoj godini angažmana, Univerzitet može takav angažman obnoviti produžiti.
- (5) Odnos broja gostujućih profesora u nastavi i stalno uposlenog akademskog osoblja određuje se Standardima i normativima.

Član 171.

(Dodjela počasnog zvanja - *Honorary Professor*)

- (1) U izuzetnim slučajevima, Univerzitet može kao svoje akademsko osoblje zaposliti ili angažirati lice čiji je naučni ili umjetnički opus okarakterisan kao regionalno, evropski i svjetski značajan (*honorary staff*), a koji bi svojim angažmanom doprinio podizanju kvaliteta i razvoja Univerziteta i društva u cjelini.
- (2) Značajnost i nivo naučnog ili umjetničkog opusa iz stava (1) ovog člana utvrđuje Senat uz saglasnost Upravnog odbora, na temelju obrazloženog prijedloga odluke nadležnog vijeća fakulteta.
- (3) Odlukom Senata iz stava (2) ovog člana dodjeljuje se zvanje počasnog profesora (*Honorary Professor*), koje u pravilu ne predstavlja zamjenu akademskom osoblju u nastavi, već navođenje takvog imena služi isključivo međunarodnoj naučnoj reputaciji i akademskoj referenci Univerziteta.

DIO DVANAESTI - PRAVA I OBAVEZE AKADEMSKOG OSOBLJA

Član 172.

(Realizacija nastavnih, istraživačkih i drugih aktivnosti)

- (1) Akademsko osoblje je obavezo redovno izvršavati nastavne, istraživačke i druge obaveze u skladu sa zakonom, Standardima i normativima, Statutom i općim aktima Univerziteta, te ispunjavati obaveze u odnosu na naučni, umjetnički i stručni rad koji obavljaju, u skladu sa rasporedom i strukturom 40-satne radne sedmice.
- (2) Nastavnici i saradnici odobrene oblike naučnog i stručnog rada mogu obavljati i izvan Univerziteta u skladu sa zakonom i Statutom, što u svakom konkretnom slučaju na osnovu pismenog i obrazloženog zahtjeva nastavnika i saradnika odobrava dekan.
- (3) Nastavnicima i saradnicima u okviru 40 satne radne sedmice može se izvršiti privremena preraspodjela radnog opterećenja na način određen Pravilnikom o radu i općim aktom Univerziteta.
- (4) Akademsko osoblje obavezno je ličnim prisustvom i angažmanom u potpunosti realizirati utvrđeni plan i program.

- (5) Izuzetno, iz opravdanih razloga koje usvoji vijeće fakulteta, izabrano akademsko osoblje u realizaciji nastavnog plana i programa, mogu zamijeniti i druga adekvatna akademska lica koja predloži dekan, uz prethodno pribavljenu saglasnost vijeća.
- (6) U pogledu prava i obaveza, kao i zaštite prava akademskog osoblja, primjenjuje se Zakon o radu.

Član 173.

(Praćenje izvršavanja obaveza akademskog osoblja)

- (1) Metode praćenja izvršavanja nastavnih obaveza su:
 - a) izvještavanje o realiziranoj nastavi putem redovnih izvještaja;
 - b) analiza izvještaja;
 - c) analiza povratnih informacija pristiglih od studenata i studentskih anketa,
 - d) elektronski sistem evidentiranja prisustva na radnom mjestu; i
 - e) druge metode koje utvrdi Ured za osiguranje kvaliteta.
- (2) Način i postupak praćenja i izvršavanja obaveza akademskog osoblja u vezi sa realizacijom nastave, kao i dostavljanja ispitnih materijala, bliže se mogu urediti općim aktom Univerziteta.

Član 174.

(Realizacija plana rada)

- (1) Plan rada za nastavni predmet obavezno uključuje opis provjera znanja koje se realiziraju tokom semestra, kao i termine za provjere znanja.
- (2) Provjera znanja studenata u toku trajanja semestra vrši se testiranjem, zadaćama, kvizovima, prezentacijama i drugim oblicima provjere.
- (3) Sistem bodovanja svih aktivnosti kao i provjera znanja moraju biti jasno naznačeni u planu rada za svaki nastavni predmet.
- (4) O izvršavanju obaveza studenata za vrijeme trajanja semestra, u smislu ovog člana, vodi se evidencija od strane predmetnog nastavnika.
- (5) U slučaju da predmetni nastavnik zbog bolesti, više sile ili drugih objektivnih razloga, nije u mogućnosti da održi završni ispit, dekan fakulteta određuje drugog nastavnika imenovanog na istu ili srodnu naučnu/umjetničku oblast/granu, da održi završni ispit.

Član 175.

(Analiza uspješnosti provedenih ispita)

- (1) Dekan ima pravo tražiti od odgovornog nastavnika izvještaj o uspješnosti provedenih ispita, ukoliko odnos prolaznih i neprolaznih ocjena bitno odstupa od standarda koji utvrđuje Senat.
- (2) Dekan provodi postupak utvrđivanja razloga i okolnosti koje su dovele do odstupanja od standarda navedenog u stavu (1) ovog člana.

Član 176.

(Prava i obaveze akademskog osoblja)

U izvođenju naučnonastavnog i umjetničkonastavnog procesa akademsko osoblje u zvanju docenta, vanrednog profesora i redovnog profesora, ima pravo i obavezu da:

- a) u potpunosti održi nastavu prema rasporedu nastave, u predviđenom broju časova utvrđenim nastavnim planom i programom;
- b) vodi evidenciju o prisustvu studenata nastavi, obavljenim ispitima i postignutom uspjehu studenata;
- c) organizuje i izvodi naučnoistraživački rad;

- d) preporučiti udžbenike i priručnike za nastavni predmet koji izvodi;
- e) redovno održava provjere znanja studenata prema rasporedu, u propisanim rokovima i putem svih utvrđenih oblika provjere znanja;
- f) obavlja konsultacije sa studentima u svrhu savladavanja nastavnog gradiva uživo, putem e-maila ili neke od internet platformi, i to minimalno 5 sati sedmično, uz obavezu transparentnog istjecanja satnice konsultacija;
- g) inicira usklađivanje i izmjenu nastavnog plana i programa;
- h) predlaže teme završnih radova i u svojstvu mentora pomaže studentima pri izradi završnog rada na prvom, drugom i trećem ciklusu studija;
- i) obraća posebnu pažnju na studente i potiče ih u samostalnom radu i sudjelovanju u stručnom, naučnom i umjetničkom radu; i
- j) obavlja i druge poslove utvrđene zakonom, Statutom i općim aktom Univerziteta.

Član 177.

(Odgovornost predmetnog nastavnika)

- (1) Ako na jednom nastavnom predmetu nastavu izvodi samo jedan nastavnik, on se smatra odgovornim nosiocem predmeta (u daljem tekstu: predmetni nastavnik).
- (2) Na predmetima u čijem izvođenju učestvuje više izabranih nastavnika, svi se smatraju odgovornim za povjereni dio nastave i obavljenju provjeru znanja studenata, dok je jedan od njih odgovorni nosilac nastavnog predmeta, odnosno predmetni nastavnik.
- (3) U okviru jednog nastavnog predmeta, dio nastave može izvoditi i nastavnik sa drugog studijskog programa ukoliko ima adekvatan izbor u zvanje.
- (4) Član akademskog osoblja može predavati predmete koji pripadaju drugom studijskom programu pod uvjetom pripadnosti istih naučnoj/umjetničkoj grani za koju je imenovan.
- (5) Izuzetno, preraspoređivanje nastavnih aktivnosti može naložiti i rektor posebnom odlukom.
- (6) Preciznije obaveze predmetnog nastavnika u vezi sa evidencijom održane nastave, predispitnim (kviz, projekat, esej, seminarski rad, domaća zadaća i sl.) i ispitnim aktivnostima studenata (parcijalni, završni i popravni ispit), kompletiranjem i dostavom dokumentacije, definišu se posebnim uputstvom koje donosi rektor.

Član 178.

(Raspored akademskog osoblja)

- (1) Član akademskog odnosno naučnoistraživačkog i umjetničkoistraživačkog osoblja učestvuje u realizaciji nastavnog, odnosno naučnoistraživačkog i umjetničkoistraživačkog procesa na Univerzitetu na predmetima i granama za koje je imenovano.
- (2) Član akademskog osoblja obavezan je realizirati nastavu i na nastavnim predmetima za koje je naknadnom odlukom vijeća fakulteta odnosno Senata utvrđena srodnost ili pripadnost istih sa predmetnim poljem ili granom imenovanja.
- (3) Akademsko osoblje imenovano na Univerzitetu može biti angažovano u realizaciji nastave i na drugoj visokoškolskoj ustanovi pod uslovom da uredno ispunjava svoje obaveze i da pribavi odobrenje nadležnog dekana i saglasnost rektora, a nakon podnošenja zahtjeva za takav angažman.
- (4) Saglasnost za angažman može se uskratiti ukoliko član akademskog osoblja ostvaruje optimalno ili veće nastavno opterećenje propisano Standardima i normativima i općim aktom.

Član 179.

(Prava i obaveze akademskog osoblja u zvanju višeg asistenta i asistenta)

U izvođenju naučnonastavnog i umjetničkonastavnog procesa, akademsko osoblje u zvanju višeg asistenta i asistenta ima prava i obaveze da:

- a) vrši pripreme i izvodi vježbe pod stručnim nadzorom predmetnog nastavnika;
- b) pomaže nastavniku u pripremi naučnonastavnog procesa;
- c) vodi evidenciju o prisustvu studenata na vježbama;
- d) pomaže predmetnom nastavniku u organizaciji svih oblika provjere znanja studenata;
- e) obavlja konsultacije sa studentima u svrhu savladavanja nastavnog gradiva uživo, putem e-maila ili neke od internet platformi, i to minimalno pet sedmično, uz obavezu transparentnog istjecanja satnice konsultacija;
- f) radi na ličnom stručnom i naučnom usavršavanju radi pripremanja za samostalan nastavni i naučnoistraživački rad u svrhu stjecanja višeg akademskog zvanja;
- g) obavlja i druge poslove u skladu sa zakonom, Statutom i općim aktima Univerziteta.

Član 180.

(Plaćeno i neplaćeno odsustvo)

- (1) Članu akademskog osoblja Univerzitet može odobriti plaćeno odsustvo u trajanju do dva semestra ili neplaćeno odsustvo u trajanju do četiri semestra radi izrade magistarskog ili doktorskog rada, naučnog, umjetničkog ili stručnog usavršavanja ili obavljanja aktivnosti od posebnog interesa za Univerzitet.
- (2) Za odobrenje odsustva koje je duže od mjesec dana, potrebna je prethodna saglasnost Upravnog odbora.
- (3) Osim razloga iz stava (1) ovog člana, općim aktom se mogu utvrditi i drugi razlozi za odobravanje plaćenog odnosno neplaćenog odsustva člana akademskog osoblja.
- (4) Prije planiranog odsustva, član akademskog osoblja obavezan je podnijeti pismeni i obrazložen zahtjev za odsustvo, te pribaviti službeno odobrenje od rektora za traženo vrijeme odsustva.
- (5) Uvjeti, način, vrijeme i obim obrazovanja, osposobljavanja i stručnog usavršavanja utvrđuju se općim aktom, te preciziraju u svakom konkretnom slučaju odlukom rektora.

Član 181.

(Reorganizacija radnih mjesta)

U skladu sa ustanovljenom potrebom smanjenja nastavnog procesa, Univerzitet može izvršiti preraspoređivanje radnika i na druga radna mjesta, odnosno preduzeti mjere unutrašnje reorganizacije i izmjene sistematizacije radnih mjesta, u skladu sa zakonom i općim aktom.

Član 182.

(Ljekarski pregled)

- (1) U ciklusima od minimalno dvije godine, a na zahtjev rektora i ranije, svaki zaposlenik Univerziteta, obavezan je obaviti sistematski ljekarski pregled u nadležnoj zdravstvenoj ustanovi, te ljekarski nalaz dostaviti Univerzitetu gdje se nalazi njegov personalni dosije.
- (2) Univerzitet ne može dozvoliti bilo kakav anagažman u nastavnom procesu licu koje nije obavilo sistematski ljekarski pregled u skladu sa propisanim rokovima iz stava (1) ovog člana, odnosno licu za koje se odgovarajućom medicinskom dokumentacijom utvrdi da je alkoholičar, ovisnik o narkoticima ili boluje od zarazne ili duševne bolesti.
- (3) Zaposlenik Univerziteta kod kojeg se utvrde zdravstvene anomalije iz stava (2) ovog člana, odmah po utvđivanju datih anomalija odlukom rektora će biti udaljen iz procesa rada i upućen na liječenje.

- (4) Nakon uspješnog završetka liječenja, zaposlenik ima pravo da se vrati na istu ili sličnu poziciju ili na drugi položaj u skladu sa potrebama Univerziteta i u skladu sa zakonom.
- (5) U slučaju da se ustanove zdravstvene anomalije iz stava (2) ovog člana i ukoliko navedene anomalije nisu izlječive, Univerzitet može raskinuti ugovor o radu.

DIO TRINAESTI - EVALUACIJA AKADEMSKOG OSOBLJA

Član 183.

(Godišnja evaluacija akademskog osoblja)

- (1) Akademsko osoblje na Univerzitetu podliježe godišnjem postupku evaluacije rada.
- (2) Evaluacija rada akademskog osoblja se provodi u tri glavne oblasti, i to:
 - a) nastava,
 - b) administrativni i javni angažman, i
 - c) rad u oblasti istraživanja/umjetnosti i projekti.
- (3) Članovi akademskog osoblja koje kroz tri evaluacije ne postignu očekivanu ocjenu rada na Univerzitetu, može se otkazati ugovor o radu, u postupku i na način propisan općim aktom.
- (4) Načela, kriteriji, postupak i efekti evaluacije rada akademskog osoblja kao i ostala relevantna pitanja preciznije se utvrđuje Pravilnikom o evaluaciji akademskog osoblja, koji donosi Senat Univerziteta, uz saglasnost Upravnog odbora.

DIO ČETRINAESTI - NEAKADEMSKO OSOBLJE

Član 184.

(Zaštita prava neakademskog osoblja)

U pogledu prava i obaveza iz radnog odnosa neakademskog osoblja i stručnih službi Univerziteta, primjenjuju se odredbe Zakona o radu i Pravilnika o radu Univerziteta.

Član 185.

(Evaluacija neakademskog osoblja)

- (1) Evaluacija neakademskog osoblja vrši se u pravilu na kraju kalendarske godine.
- (2) Detaljnije uređenje načina i obima vrednovanja postignutih rezultata rada neakademskog osoblja uređuju se Pravilnikom o evaluaciji nenastavnog osoblja.

Član 186.

(Stručno usavršavanje)

Neakademsko osoblje ima obavezu kontinuiranog usavršavanja, pri čemu se način i oblik ostvarivanja prava na usavršavanje detaljnije uređuje općim aktom.

Član 187.

(Dokumentacija i evidencija)

- (1) Univerzitet vodi matične knjige i evidencije o izdatim diplomama studenata bez obzira na vrstu studija.
- (2) Pravilnik o sadržaju i izgledu, načinu vođenja matičnih knjiga i evidencije o izdatim diplomama donosi Ministarstvo na prijedlog Univerziteta.

- (3) Pored dokumentacije iz stava (1) ovog člana, Univerzitet vodi i evidenciju o ispitima, uspjehu studenata i ostalu evidenciju utvrđenu zakonom, ovim statutom i drugim općim aktima.
- (4) Sva dokumentacija iz st. (1) i (3) ovog člana se vodi i u elektronskoj formi na način utvrđen pravilnikom iz stava (2) ovog člana.
- (5) Matične knjige i evidencije o izdatim diplomama čuvaju se trajno, a postupak, način vođenja i čuvanja ostalih vrsta evidencija, odnosno dokumentacije donosi Univerzitet.
- (6) Podaci u matičnim knjigama i evidencijama razvrstavaju se po spolu.

Član 188.

(Javne isprave)

- (1) U poslovima u kojima izdaje javne isprave, Univerzitet vrši javna ovlaštenja.
- (2) Javne isprave, u smislu Zakona, su: odgovarajući identifikacijski dokument, diploma o stečenom zvanju, dodatak diplomi, uvjerenje o položenim ispitima, uvjerenje o stečenom zvanju, uvjerenje o ekvivalenciji ranije stečenog zvanja sa novim zvanjem, uvjerenje o završenom programu cjeloživotnog i necikličnog obrazovanja, "mikrokvalifikacije", rješenje o akademskom priznavanju kvalifikacija, certifikat o završenom kratkom programu studija i stečenim kompetencijama i druge javne isprave u skladu sa zakonom.
- (3) Pravilnik o sadržaju javnih isprava donosi Ministarstvo, na prijedlog Univerziteta.
- (4) Javne isprave, se izdaju na jednom od zvaničnih jezika Bosne i Hercegovine i na engleskom jeziku, a na način kako je to definisano pravilnikom iz stava (3) ovog člana.
- (5) Akademske titule, naučna/umjetnička i stručna zvanja na javnim ispravama koje izdaje Univerzitet navode se kako u muškom, tako i ženskom gramatičkom rodu.
- (6) Univerzitet, na osnovu podataka iz evidencije, izdaje duplikat diplome o stečenom zvanju poslije proglašenja originalne diplome nevažećom u „Službenim novinama Kantona Sarajevo“, sa naznakom da se radi o duplikatu diplome, a što se bliže uređuje Pravilnikom o postupku izdavanja duplikata diplome koji donosi Senat.

Član 189.

(Poništavanje i oglašavanje diplome nevažećom)

- (1) Univerzitet je obavezan poništiti i oglasiti nevažećom diplomu, dodatak diplomi i uvjerenje o stečenom zvanju u slučaju ako imalac diplome nije ispunio sve ispitne obaveze na studiju na način i prema postupku koji je utvrđen propisima iz oblasti visokog obrazovanja koji su bili na snazi u vrijeme izdavanja javne isprave, zakonom i studijskim programom .
- (2) Oglašavanje nevažećom diplome, dodatka diplomi i uvjerenja o stečenom zvanju objavljuje se u "Službenim novinama Kantona Sarajevo".
- (3) Ukoliko diploma, dodatak diplomi i uvjerenje o stečenom zvanju sadrže grešku u imenu, broju, pisanju, kao i druge formalne netačnosti, ispravka se vrši u skladu sa zakonom.
- (4) Uvjeti, način i postupak poništavanja diploma i oglašavanje iste nevažećom kao i druga relevantna pitanja bliže se uređuju općim aktom koji donosi Senat.

DIO PETNAESTI - POSLOVNA TAJNA

Član 190.

(Pojam poslovne tajne)

- (1) U skladu sa Zakonom o slobodi pristupa informacijama, na Univerzitetu se određeni podaci i dokumentacija mogu smatrati povjerljivim.
- (2) Poslovnom tajnom smatraju se podaci zbog čijeg bi se saopštavanja ili davanja na uvid neovlaštenom licu mogle nastupiti štetne posljedice za poslovni interes i ugled

Univerziteta i/ili organizacionih jedinica u njegovom sastavu, odnosno ugled zaposlenika i studenata.

- (3) Klasifikacija povjerljivosti utvrđuje se posebnim aktom koji donosi Upravni odbor.
- (4) Univerzitet i organizacione jedinice uskratit će davanje podataka javnosti ukoliko su isti označeni kao poslovna tajna.
- (5) Rektor ima pravo ukinuti oznaku tajnosti sa dokumenta ili informacije, nakon odobrenja Upravnog odbora.

Član 191.

(Dužnost čuvanja poslovne tajne)

- (1) Zaposleni na Univerzitetu dužni su čuvati isprave i podatke koji su od strane nadležnog tijela proglašeni poslovnom tajnom.
- (2) Dužnost čuvanja poslovne tajne traje i po prestanku radnog odnosa zaposlenog, odnosno prestanka funkcije na Univerzitetu, u skladu sa zakonom i općim aktom Univerziteta.
- (3) Povreda obaveze čuvanja poslovne tajne predstavlja povredu radne discipline.
- (4) Isprave koje predstavljaju poslovnu tajnu i koje su kao takve označene, čuvaju se i evidentiraju u posebnoj arhivi, pod posebnim brojevima i od strane lica koje za to posebno ovlasti rektor.

DIO ŠESNAESTI - AKTI UNIVERZITETA

Član 192.

(Opći akti)

- (1) U skladu sa zakonom i ovim Statutom, Univerzitet donosi sljedeće:
 - 1) Pravilnik o radu;
 - 2) Pravilnik o radu Upravnog odbora i
 - 3) Pravilnik o cjeloživotnom učenju.
 - 4) Pravila studiranja za prvi ciklus studija;
 - 5) Pravila studiranja za drugi ciklus studija;
 - 6) Pravila studiranja za treći ciklus studija; i
 - 7) Pravilnik o organizaciji Vijeća doktorskog studija;
 - 8) Poslovnik o radu Senata;
 - 9) Pravilnik o postupku izbora u akademska zvanja;
 - 10) Pravilnik o pokretanju, promjenama i evaluaciji studijskih programa;
 - 11) Pravilnik o bitnim elementima ugovora o studiranju;
 - 12) Pravilnik o osiguranju kvaliteta;
 - 13) Pravilnik o disciplinskoj i materijalnoj odgovornosti studenata;
 - 14) Pravilnik o priznavanju inostranih visokoškolskih kvalifikacija;
 - 15) Pravilnik o postupku evaluacije akademskog osoblja;
 - 16) Pravilnik o postupku vrednovanja znanja studenata;
 - 17) Pravilnik o priznavanju položenih predmeta i ekvivalenciji;
 - 18) Pravilnik o poslovnoj tajni;
 - 19) Pravilnik o javnosti rada;
 - 20) Etički kodeks;
 - 21) Pravilnik o izdavačkoj djelatnosti;
 - 22) Pravilnik o priznanjima;
 - 23) Pravilnik o radu studenata demonstratora;
 - 24) Pravilnik o dodjeli počasnog zvanja profesor emeritus;
 - 25) Pravilnik o studiju učenja na daljinu;
 - 26) Pravilnik o postupku evaluacije rada neakademskog osoblja;

- 27) Pravilnik o osnivanju i radu studentskih klubova;
- 28) Pravilnik o službenoj prepisci i arhiviranju;
- 29) Pravilnik o postupku izdavanja duplikata diplome;
- 30) Pravila o akademskom neuspjehu;
- 31) Pravila o stažiranju i obavljanju stručne prakse za vrijeme studija;
- 32) Pravilnik o učešću u programima razmjene; i
- 33) Druge opće akte u skladu sa zakonom i ovim Statutom.

DIO SEDAMNAESTI - PRELAZNE I ZAVRŠNE ODREDBE

Član 193.

(Tumačenje općih akata)

- (1) Autentično tumačenje Statuta i općih akata daje tijelo koje ga je donijelo u skladu sa zakonom.

Član 194.

(Stupanje na snagu)

- (1) Ovaj Statut stupa na snagu narednog dana od dana donošenja.
- (2) Danom stupanja na snagu ovog Statuta stavlja se van snage Statut broj: IUS-SENAT-11-1980/2018 od 13.08.2018. godine.
- (3) Svi opći i pojedinačni akti doneseni na osnovu zakona i Statuta iz stava (2) ovog člana primjenjuju se do donošenja novih općih akata, osim u dijelu u kojem su u suprotnosti sa važećim zakonom i ovim Statutom.

PREDSJEDAVAJUĆI SENATA

Prof. dr. Ahmet YILDIRIM

POTVRDA O OBJAVLJIVANJU STATUTA

Opravak Statuta objavljen je istjecanjem na oglasnoj ploči Internacionalnog univerziteta u Sarajevu dana 23.10.2024. godine, u 8:30 sati.

Opravak Statuta objavljen je objavom teksta istog na internet stranici Internacionalnog univerziteta u Sarajevu dana 23.10.2024. godine, u 8:30 sati.

PREDSJEDAVAJUĆI SENATA

Prof. dr. Ahmet YILDIRIM